

إنجيل عيسى مسيح د مطابق

متى

پيشگفتار

زندگی نامه عیسی مسیح که د وسیله متی نویشته شده قد زندگی نامه های که د وسیله مرقس و لوقا نویشته شده تقریباً همنظر استه، چون مطلب های که د امزی سه زندگی نامه نویشته شده تا حد کلو قد یگدیگه خو میخانه، لیکن زندگی نامه عیسی مسیح که نویشته یوحنا استه، موضوع های مختلف دره و کلوتر د باره محبت خدا و الوهیت عیسی مسیح مختلطف داره و بیان مونه.

زندگی نامه عیسی مسیح که د وسیله متی نویشته شده ای حقیقت ره ثابت مونه که عیسای ناصیری «مسیح وعده شده استه»، یعنی امو پادشاه انتخاب شده و نجات دهنده که د کتاب مقدس یهودیا د باره آمدون شی پیشگویی شده؛ و ام

ای که خوشخبری آمدون امزی پادشاه انتخاب شده فقط بله
قوم یهود نییه، بلکه بله تمام قوم های دنیا.

متی قد دقت خاص نوشتیه خو ره د باره تولد عیسی مسیح
شروع مونه و د باره غسل تعیید و آزمایش های شی ادامه
میدیه. بعد ازو د باره موعظه ها و تعلیم ها و معجزه های
شی که د منطقه های جلیلیه انجام دده توره موگیه و د باره
سفر مسیح از جلیلیه د اورشلیم معلومات دده واقعه هفتیه آخر
مسیح و د صلیب میخکوب شدون شی ره بطور واضح بیان
مونه.

ای زندگی نامه عیسی مسیح ره معلم و تفسیر کننده شریعت
خدا و نجات دهنده عالم و آدم معرفی مونه. متی د امزی
زندگی نامه کلوتر از عبارت های که د مینکل یهودیا رواج
بود استفاده مونه، مثلاً د جای «پادشاهی خدا» عبارت
«پادشاهی آسمو» ره استفاده مونه، چون یهودیا د مطابق حکم
سوّم تورات کلو کوشش مونه که کلمه «خدا» ره سُبک و یا د
مقصد باطل د زیون خو نیره و د جای شی کلمه «آسمو» ره
استفاده کنه. امزی مو میدنی که مخاطبین ازی زندگی نامه
کلوتر مردم یهود آسته.

فهرستِ عنوان ها

- پُشت نامه عیسیٰ مسیح (فصل ۱ آپه ۱)
- تَوَلْدِ عیسیٰ مسیح (۱۸:۱)
- سِتاره-شِناسا عیسیٰ ره مُپاله (۱:۲)
- دُوتا کدو دَ مصر (۱۳:۲)
- پس آمدو دَ وطن (۱۹:۲)
- یحیای تعمید دِھنده (۱:۳)
- غُسل تعمید عیسیٰ از دِستِ یحییٰ (۱۳:۳)
- آزمایش عیسیٰ د بیابو (۱:۴)
- شروع کارِ عیسیٰ د جلیلیه (۱۲:۴)
- چار ماهی گیر یارِ عیسیٰ مُوشہ (۱۸:۴)
- تعلیم و خِدمت های عیسیٰ (۲۳:۴)
- موعِظِه سِر کوه (۱:۵)
- د باره نُور و نَمَک (۱۳:۵)
- د باره پُوره کدون شریعت (۱۷:۵)
- د باره قتل (۲۱:۵)
- د باره زِنا (۲۷:۵)
- د باره طلاق (۳۱:۵)
- د باره قَسم (۳۱:۵)
- د باره انتِقام (۳۸:۵)

دَ بَارِهِ دَوْسَتْ دَشْتُونْ دُشْمَنَا (٤٣:٥) (١٤:٦) دَ بَارِهِ خَيْرَاتْ (٥:٦) دَ بَارِهِ دُعَا كَدو (٦:٦) دَ بَارِهِ رَوْزَهِ گَرْفَتو (٦:١٦) دَ بَارِهِ مَالْ-وَدَولَتْ (٦:١٩) غَمْ-وَغُصَّهِ نَخُورِيدْ (٦:٢٥) قَضَاوَتْ دَ بَارِهِ دِيَگَرُو (٧:١) طَلَبْ كُنِيدْ، بُپَالِيدْ وَطَخْ طَخْ كُنِيدْ (٧:٧) دَ بَارِهِ رَاهِ آسَمُو (٧:١٣) دِرْخَتِ مِيَوه (٧:١٥) مَثَلِ دُو خَانَه (٧:٢٤) جَوْرْ شُدُونِ يَگْ آدَمِ كَولَى (٨:١) اِيمَانِ قَوْمَنْدَانِ رُومَى (٨:٥) عِيسَى نَاجُورَا رَه شَفَا مِيدِيه (٨:١٤) قِيمَتِ پَيَرَوِي كَدو اَز عِيسَى مَسِيح (٨:١٨) عِيسَى طَوفَانِ رَه آرَامِ مُونَه (٨:٢٣) شَفَائِي دُو آدَمِ جِندَى (٨:٢٨) جَوْرْ شُدُونِ يَگْ آدَمِ شَل (٩:١) متَى مَالِيَهِ گَيرِ يَارِ عِيسَى مُوشَه (٩:٩) دَ بَارِهِ رَوْزَه (٩:١٤)

شفا دَدونِ خاتُونِ ناجور و زِنده کدونِ دُختر (۱۸:۹)
جور شُدونِ دُو کور (۲۷:۹)
دُعا بَلِدِه حاصلات (۳۵:۹)
(۱:۱۰) رَبِّي کدونِ دوازده رسول
سوالِ یحییٰ از عیسیٰ (۱:۱۱)
وای دَ حالِ شارای که توبه نَمُونه (۲۰:۱۱)
آسُودَگی از زیرِ بار و زَحمتکشی (۲۵:۱۱)
سوال دَ بارِه روزِ آرام (۱:۱۲)
خِدمتگارِ انتِخاب شُدِه خُدا (۱۵:۱۲)
عیسیٰ و بَعلزِبُول یعنی رئیسِ جنیات (۲۲:۱۲)
عالِمای یهُود و فریسیا مُعجزه طلب مُونه (۳۸:۱۲)
آبه و پِرارونِ عیسیٰ (۴۶:۱۲)
مَثَلٌ چار رقم زمی (۱:۱۳)
مَثَلٌ عَلْفِ بیکاره (۲۴:۱۳)
مَثَلٌ تُخْمِ شَرَشم (۳۱:۱۳)
تشریح مَثَلٌ عَلْفِ های بیکاره (۳۶:۱۳)
مَثَلٌ گنجِ تашه شده (۴۴:۱۳)
مَثَلٌ جالِهای ماهی گیری (۴۷:۱۳)
مردُمِ ناصره عیسیٰ ره رد مُوكنه (۵۳:۱۳)
مرگِ یحییٰ تعمید دهنده (۱:۱۴)

عیسیٰ پنج هزار نفر ره نان میدیه (۱۳:۱۴)
د باره پاکی و ناپاکی (۱:۱۵)
عیسیٰ چار هزار نفر ره نان میدیه (۲۹:۱۵)
طلبِ معجزه (۱:۱۶)
خمیرماپه فریسیا و صدوقیا (۵:۱۶)
اقرار کدون پترس د باره مسیح (۱۳:۱۶)
عیسیٰ د باره مرگ خو پیشگویی مونه (۲۱:۱۶)
تبديلی شکل عیسیٰ (۱:۱۷)
شفا ددون باچه مړگی (۱۴:۱۷)
مالیه بلده خانه خدا (۲۴:۱۷)
کی د مینکل مردم بزرگ آسته (۱:۱۸)
مَثَلِ گوسپون گم شده (۱۰:۱۸)
براری که د ضید از شمو گناه مُوکنه (۱۵:۱۸)
مَثَلِ غلامی که نَمُوبخشہ (۲۱:۱۸)
د باره طلاق (۱:۱۹)
جوانِ دولتمند (۱۶:۱۹)
مَثَلِ کارگرای باغ انگور (۱:۲۰)
سِومنه پیشگویی عیسیٰ د باره مرگ شی (۱۷:۲۰)
تقاضای یگ آبه (۲۰:۲۰)
شفای دُو آدم کور (۲۹:۲۰)

داخِل شُدونِ پیروزمندانِه عیسیٰ د اورشلیم (۱:۲۱)

عیسیٰ د خانِه خُدا (۱۲:۲۱)

عیسیٰ درختِ انجیر ره لعنت مُوکنه (۱۸:۲۱)

سوال دَ بارِه اختیارِ عیسیٰ (۲۳:۲۱)

مَثَلِ دُو باچه (۲۸:۲۱)

مَثَلِ باغوان های ظالم (۳۳:۲۱)

مَثَلِ توى (۱:۲۲)

سوال دَ بارِه مالیات (۱۵:۲۲)

بحث دَ بارِه قیامت (۲۳:۲۲)

بُزرگترین حُکمِ خُدا (۳۴:۲۲)

مسیح کی آسته (۴۱:۲۲)

برملا کدونِ کارای غلطِ فریسیا و عالمای دین (۱:۲۳)

خرابی خانِه خُدا و بَلَاهای آخر زمان (۱:۲۴)

انتِظار بَلَدِه پس آمدونِ مسیح (۳۶:۲۴)

مَثَلِ دَه دُختِرِ جوان (۱:۲۵)

مَثَلِ سِه غُلام (۱۴:۲۵)

روزِ قضاوت (۳۱:۲۵)

نقشِه قتلِ عیسیٰ (۱:۲۶)

مسح شُدونِ عیسیٰ دَ بَیت عنیا (۶:۲۶)

خیانتِ یهودای اسخريوطی (۱۴:۲۶)

آخری شام عیسیٰ قدیارای شی (۱۷:۲۶)

پیشگویی دباره انکار پترس (۳۱:۲۶)

دعای عیسیٰ دباغ گتسیمانی (۳۶:۲۶)

گرفتار شدون عیسیٰ (۴۷:۲۶)

محاکمه دحضور شورای یهود (۵۷:۲۶)

انکار پترس دباره عیسیٰ (۶۹:۲۶)

محکوم شدون عیسیٰ دمرگ (۱:۲۷)

عیسیٰ دحضور پیلاتس (۱۱:۲۷)

عسکرا قد عیسیٰ ریشخندی مونکنه (۲۷:۲۷)

عیسیٰ دصلیب کشته موشہ (۳۳:۲۷)

مرگ عیسیٰ (۴۵:۲۷)

دفن کدون عیسیٰ (۵۷:۲۷)

پیرهداری از قبر (۶۲:۲۷)

دوباره زنده شدون عیسیٰ (۱:۲۸)

رشوت ددو دپیرهدارا (۱۱:۲۸)

وظیفه بزرگ (۱۶:۲۸)

پُشت نامِه عیسیٰ مسیح

۱ پُشت نامِه عیسیٰ مسیح، اولادِ داؤود، اولادِ ابراهیم:

۲ ابراهیم آته اسحاق، اسحاق آته یعقوب و یعقوب آته یهودا و
برارون ازو بود؛^۳ یهودا آته فاریص و زارح از تامار شد. فاریص
آته حصرон، حصرون آته ارام،^۴ ارام آته عیناداب، عیناداب
آته نحشون، نحشون آته سلمون،^۵ و سلمون آته بوغاز از
راحاب شد. بوغاز آته عوبید از روت شد. عوبید آته یسی^۶ و
یسی آته داؤود پادشاه بود.

داوود آته سلیمان از خاتون اوریا شد.^۷ سلیمان آته رحیعام،
رحیعام آته آبیا، آبیا آته آسا،^۸ آسا آته یهوشافاط، یهوشافاط
آته یورام، یورام آته عزیزا،^۹ عزیزا آته یوتام، یوتام آته آحاز،
آحاز آته حزقیا،^{۱۰} حزقیا آته منسی، منسی آته آمون و آمون
آته یوشیا بود.^{۱۱} یوشیا آته پکنیا و برارون ازو شد د زمانی که
یهودیا د بابل بردہ شد.

۱۲ بعد از اسیر شدو د بابل: پکنیا آته شیلتیئیل و شیلتیئیل
آته زربابل^{۱۳} و زربابل آته آبیهود و آبیهود آته ایلیاقیم و
ایلیاقیم آته عازور^{۱۴} و عازور آته صادوق و صادوق آته یاکیم و
یاکیم آته ایلیهود^{۱۵} و ایلیهود آته العازار و العازار آته متان و
م atan آته یعقوب^{۱۶} و یعقوب آته یوسف شد و یوسف شوی
مریم بود و مریم عیسی ره که لقب شی «مسیح» بود، د دنیا

اُورد.

^{۱۷} پس تمام نسل ها از ابراهیم تا داؤود چارده نسل و از داؤود تا بُرده شدون یهودیا دَ باپل چارده نسل و از بُرده شدو دَ باپل تا مسیح چارده نسل استه.

تَوْلِدِ عِيسَى مسيح

^{۱۸} تَوْلِدِ عِيسَى مسيح اينى رقم واقع شُد: وختیکه مریم آبه عیسى خوسته یوسف بُود، پیش ازی که هر دُوى شی یگجای شُننه، او دَ وسیله روح الْقُدُس حامله شُد. ^{۱۹} خوسته شی یوسف، ازی که آدم دُرستکار بُود و نمیخاست او ره رسوا کُنه، قَصد کد که او ره خَپ-و-چَپ ايله بِدیه. ^{۲۰} وختیکه او هنوز دَزی باره فِکر مُوكد، ملایکه خُداوند دَ عالم خاو دَزو ظاهر شُده گفت: "آی یوسف أولاً دِه داؤود، از گِرفتونِ مریم بحیثِ خاتون خُو ترس نَخور، چُون نِلغِه که دَ کَوره شی دَ وجود آمده از روح الْقُدُس استه. ^{۲۱} او يگ باچه دَ دُنيا میره و تُونام شی ره عیسى بیل، چُون او قَوم خُوره از گناه های شی نِجات مِیدیه. ^{۲۲} پگ امزی چِيزا واقع شُد تا توره که خُداوند دَ وسیله پَيغمبر گفتند، پُوره شُننه:

۲۳ ”اینه، یگ دُخترِ خانه حامله مُوشه و یگ باچه دَ دُنیا

میره

و نام شی ره «عِمانُوئیل» میله، ”

که معنای شی «خُدا قد از مو» استه.^{۲۴} وختیکه یوسُف از خاو بیدار شُد، او امُو رقم کد که ملایکه خُداوند دَزُو امر کُدد: او مریم ره بحیثِ خاتون خُو گِرفت.^{۲۵} مگم او قد شی یگجای نَشُد تا وختیکه مریم باچه خُو ره دَ دُنیا آورد؛ و یوسُف نام اُزو ره عیسیٰ ایشت.

سِتاره-شِناسا عیسیٰ ره مُوباله

۱ بَعْد از تَوْلِدِ عِيسَى دَبَيْت-لَحَمِ يَهُودِيه، دَ زَمَانِ هِيرُودِيس پادشاه، چند سِتاره-شِناس از سرزمینی‌ای مشرق دَشار اورُشَلِیم آمد^۲ و پُرسان کده گفت: ”کُجا یَه امُو نَوزَیده شُدَه که پادشاه یَهُودِيا أَسْتَه؟ چُون مو سِتاره شی ره دَ سرزمینی‌ای مشرق دیدی و آمدَه که او ره پَرَسِتِش کُنَى.^۳“ وختیکه هِيرُودِيس پادشاه ای توره ره شِنید، او و پگِ مردم اورُشَلِیم قد اُزو وَرَخْطاً شُد و او تمام پیشوایونِ عالی مقام و عالِمای دِین ره از قَومِ

إِسْرَائِيل جم کد و از وا پُرسان کد که مسیح دَكُجا باید تَوَلُّد

شُنَه. أُونا دَزُو گفت: "دَبَيْت-لَحَم يَهُودِيه؛ چُون دَوْسِيلِيه

پَيْغَمْبَرِ اِينَى رقم نوِشته شُدَه:

وَتُو، أَى بَيْت-لَحَم، دَسَرْزِمِين يَهُودِيه^٦

دَمِينَكِل حُكمَرَانَى يَهُودَا از هِيجِنِگَاه كَمَتَرِ نِيَستَى،

چراکه از تُويَگ حُكمَرَان ظَهُورِ مُونَه

كَه قَوْم مَه إِسْرَائِيل رَه رَهْبَرِي مُوكُنَه.^٧

اوخته هیرودیس، سِتاره-شِناسا ره تاشَکی کُوی کد و دَبارِه

وختِ ظَهُورِ سِتاره، ازوا تَحْقِيق کد. ^٨ بعد ازُو أُونا ره دَبَيْت-

لَحَم رَى کده گفت: "بورِيد و امُونِلغه ره خُوب اوَگَل کُنید؛

غَيْتِيکه او ره پَيَدا کَدِيد دَز مَه خبرِ بدِيد تا ما ام بِيِّم و او ره

پَرستِش کُنم.^٩ بعد از شِنِيدُون تورِه پادشاه، سِتاره-شِناسا دَ

راهِ خُو رَى شُد و سِتاره ره که أُونا دَمَشِرق هُوش کَدَد پَيَش

پَيَش ازوا مورَفت تا دَبَلِه سر امْزو جای رسِيدَه اِيَسْتَه شُد که

نِلغه دَأونجَى بُود.^{١٠} وختِيکه أُونا سِتاره ره دِيد، أُونا قد

خوشی کَلو خوشحالی کد.^{١١} امَى که أُونا دَداخِل خانه رفت و

نِلغه ره قد آيَه شى مریم دید، رُوى دَخاک اُفتَدَه امُونِلغه ره پرسِتِش کد و صندوقاي خزانه خُوره واز کده سوغات ها، يعني طِلّا، کندر و مُر دَزُو تقدِيم کد.^{۱۲} و ازى که دَخاو دَزوا آخطار دَده شُد که دُوباره پيش هيروديس نَروه، اونا از راه دِيگه پس سُون وطن خُورفت.

دُوتا کدو دَ مصر

بعد از رفتوں سِتاره-شِناسا، ملايکه خُداوند دَخاو دَيُوسُف ظاهر شُدَه گفت: "باله شُو، نِلغه و آيَه شى ره گِرفته دَ مصر دُوتا کُو و دَ امونجى بِشى تا غَيْتِيكه تُوره خبر بِدم، چراکه هيروديس دَزُودى نِلغه ره مُپاله تا او ره نابُود کُنه." ^{۱۳} اوخته يوُسُف باله شُد و نِلغه و آيَه شى ره گِرفته دَ وخت شاو سُون مصر رَى شُد ^{۱۴} و تا مرگ هيروديس دَ امونجى مَند. دَ امزى رقم توره که خُداوند دَ وسِيله پَيغمبر گفته بُود پُوره شُد:

"باچه خُوره از مصر کُوي کُدم."

وختي هيروديس دید که سِتاره-شِناسا او ره بازى دَده، او ^{۱۵}

کَلُو قار شُد و نفرا ره رَيَى كد و تمام بچِكِيچا ره دَ بَيْت-لَحَم و
أَطْرَاف شَى كه دُو ساله و كمَّتَ از دُو ساله بُود دَ قتل رَسَند،
مُطَايق دَ زَمانِي كه أُو از سِتاره-شِناسا تحقِيق كُدد. ^{١٧} اوخته
توره های كه دَ وسِيله إرميا پَيغمبر گُفتَه شُدَّد، پُوره شُد:

“يَك آواز دَ رامه شِنِيده شُد، ^{١٨}

آوازِ مَختَه-و-چخرا و ماتِمِ كَلَه،

راحيل بَلَده بچِكِيچاي خُو چخرا مُونه و آرام نَمُوشَه،

چراكه أونا دِيكَه وجود نَدرَه.”

پس أَمَدَو دَ وَطَن

پس از مرگِ هيروديس، ملايکه خُداوند دَ مصر دَ خاو دَ^{١٩}
يوسف ظاهر شُدَّه ^{٢٠} گُفت: “باله شُو، باچه و آبه شى ره گِرفته
پس دَ سرزمينِ إسرائيل بورُو، چون کسای كه قَصِدِ جانِ نِلغَه
ره كُدد، مُرده.” ^{٢١} اوخته يوسُف باله شُدَّه باچه و آبه شى ره
گِرفت و پس دَ سرزمينِ إسرائيل رفت.

مَكْمُونَ وَخَتَىٰ شِنِيدَ كَه آرَخِلَاوسَ دَ جَاهِ آتِهٗ خُو هِيرُودِيَسَ دَ بَلِهٗ يَهُودِيهٗ حُكْمَرَانِي مُونَه، أُو از رَفْتُو دَ أُونِجَى تَرسَ خُورَدَ وَ بَعْدَ اُزُو كَه دَ خَاهَ دَزُو أَخْطَارَ دَدَه شُدَّ، أُو دَ مَنْطَقَه جَلِيلِيهٗ رَفَتَ وَ دَ أُونِجَى رَسِيدَه دَ يِگَ شَارَ دَ نَامَ نَاصِرَه جَاهِ-دَ-جَاهِ شُدَّ. دَمْزِي رَقْمَ تَورِهٗ كَه دَ وَسِيلَهٗ پَيْغَمْبَرَا گَفْتَه شُدَّدَ "أُو نَاصِرِي گَفْتَه مُوشَه، "پُورَه شُدَّ.

يَحِيَايِي تَعْمِيدِ دِهِنَدَه

^١ دَ اَمْزُو رَوْزَهَا يَحِيَايِي تَعْمِيدِ دِهِنَدَه دَ بِيَابُونِ يَهُودِيهٗ ظَاهِرَ شُدَّ. أُو إِعلَانَ كَدَه مُوكَفَتَ: ^٢ "اَز گَنَاهَهَايِي خُو تَوْيَهٗ كُنِيدَ، چَراَكَه آمَدونِ پَادِشاَهِي آسمَو نَزِدِيَكَ شُدَّه." ^٣ يَحِيَايِي اَمُو كَسَ أَسْتَهَ كَه اَشْعِيَايِي نَبِيٍّ دَ بَارِهٗ شَى خَبَرَ دَدَه مُوكَيَه:

"آواَزِ كَسَيَ كَه دَ بِيَابُونِ چِينَ-وَفَرِيَادَ مُونَه:

رَاهَ رَه بَلِدَه خُداَونَدَ آمَادَه كُنِيدَ

وَ رَاهَرَوَيِي شَى رَاهَ رَاستَ-وَسِيدَه كُنِيدَ."

۴ یحییٰ کالای ره که از پاشمِ اشتر بُود مُوبو شید و دَگرد کمر خو یگ کمر بندِ چرمی داشت و خوراک شی ملخ و عسلِ
صحرایی بُود.^۵ مردم از اورشلیم و تمام یهودیه و از پیگِ
منطقه های گردوبیر دریای اردن دَپیشِ ازو میمَد و گناه های
خو ره اقرار کده از دستِ ازو دَدریای اردن غسلِ تعمید
میگرفت.

۶ مگم وختی یحییٰ دید که غدر فریسیا و صدوقیا بله غسلِ
تعمید دَپیشِ ازو مییه، دزوا گفت: "او اولادی تیرمار! کی
دَز شُمو اخطار دَد که از غَضَبی که آمدَنی یه دوتا کُنید؟ پس
ثمری بَدید که لايقِ توبه بشه^۷ و ای توره ره دَفِکر خو جای
نَدید که بُگید: 'ابراهیم بابه کلون مو یه،' چون ما دَز شُمو
مُوگم که خُدا میتنه امزی سنگا بله ابراهیم اولاده پیدا کنه.^۸
۹ و آلی تیشه دَریشه درختا ایشته شده؛ پس هر درختِ که
ثمرِ خوب نَدیه، قطع شده دَآتش پورته مُوشه.

۱۰ ما شُمو ره بله توبه شُمو قد آو غسلِ تعمید میدم، ولے
کسی که بعد از مه مییه از مه کده قدرتمند استه؛ ما حتی
لايقِ باله کدون چپلی های شی ره ام نَدرُم. او شُمو ره قد روح
القدس و آتش غسلِ تعمید میدیه.^{۱۱} شاخی ازو دَدست شی

آسته و او خرمونجوي خو ره پاک کده گندم خو ره د دی خانه

خو ذخیره موکنه، ولے کاه ره د آتش گل ناشدنی دار میدیه.

غسل تعمید عیسی از دست یحیی

۱۳ د امزو زمان عیسی از جلیلیه د دریای اردن پیش یحیی آمد

تا از دست ازو غسل تعمید بگیره. ^{۱۴} مگم یحیی او ره منع

کده گفت: "ما ضرورت درم که از دست از تو غسل تعمید

بگیرم و تو پیش ازمه میبی که غسل تعمید بگیری؟"

۱۵ عیسی د جواب ازو گفت: "آلی بیل که امی رقم شنه، چون

بلدیه ازمو مناسب آسته که د امی رقم تمام عدالت ره پوره

کنی. " اوخته یحیی راضی شد. ^{۱۶} وختیکه عیسی غسل

تعمید گرفت، فوری از آو بُر شد؛ دمزو لحظه آسمو بلدیه شی

واز شد و او روح خدا ره دید که رقم کوترا آلی نازل شده د بله

شی میبیه. ^{۱۷} د امزو غیت یگ آواز از آسمو آمده گفت:

"اینمی باچه دوست-دشتانی مه یه که ما از شی خوش-و-

راضی آستم."

^۱ اوخته عیسیٰ د وسیله روح القدس د بیابو هدایت شد تا
ایلیس او ره وسوسه کنه. ^۲ او چل شاو-و-روزه گرفت و
بعد ازو گشنه شد. ^۳ اوخته وسوسه‌گر دیر ازو آمده گفت:
”اگه تو باچه خدا آستی، د امزی سنگا بُگی که نان جور
شنه.“ ^۴ عیسیٰ د جواب ازو گفت: ”د کلام خدا نوشه شده
که،“

’انسان تنها د وسیله نان زنده نییه،‘

”بَلِکِهَ دَ وسِيلَه هَرْ تُورَه كَه اَز دَانِ خُدا بُرْ مُوشَه.“

^۵ اوخته ایلیس عیسیٰ ره د شارِ مُقدَّس بُرد و د بلندی خانه خدا
ایستَلْجی کد ^۶ و دُزُو گفت: ”اگه تو باچه خدا آستی خود ره تا
پورته کُو، چون نوشه شده که،“

’او د باره از تو د ملایکه های خو حکم مونه‘

و اونا تو ره د بَلِه دِستای خو مِیگیره،

نَشْنَهُ كَهْ پَايِ تُو دَ كُدَم سنَگ ڈَكَهْ كُنه. ”

^v عِيسَىٰ ذَرْوَ گُفت: ”بِسْ نُوِّشَتَه شُدَه كَهْ،

”خُداوند، خُدَىٰ خُو ره آزمایش نَكُوا! ”

^A بعد اُزْ اِبْلِيس اُو ره دَ بَلَه يَگ كَوهِ غَدر قِيل بُرَدَه تمامِ

مَمَلَكتَى دُنيا و شان-و-شَوَّكَت شَى ره ذَرْوَ نِشَو دَد⁹ و دَزشى گُفت: ”اَكَه رُوي دَ خاك اُفتَدَه مَره سَجَدَه كُنى، پَگِ امزِيا ره دَز تُو مِيدُم.“ ¹⁰ اوخته عِيسَىٰ دَز شَى گُفت: ”دُور شُو، آى

شَيَطَو! چُون نُوشَتَه شُدَه:

”خُداوند، خُدَىٰ خُو ره سَجَدَه كُو

”و تَنَهَا اُو ره عِبَادَت كُو.“

¹¹ بعد اُزْ اِبْلِيس اُو ره اِيلَه كَد و مَلَيكَه هَا آمَدَه اُو ره خِدمَت كَد.

شُرُوعِ كَارِ عِيسَىٰ دَ جَلِيلِيه

وختی عیسیٰ شنید که یحییٰ دستگیر شده، او پس د جلیلیه رفت^{۱۲} و ناصره ره ایله کده د شارِ کفرناحوم جای-د-جای شد که د بغل دریای جلیلیه، د منطقه های زیولون و نفتالی بود،^{۱۳} تا چیزی که د وسیله اشعیای نبی گفته شدد، پوره شنه:^{۱۴}

”سرزمین زیولون و سرزمین نفتالی^{۱۵}

د راه دریا، د او طرف دریاچه اردن،

جلیلیه ملت های غیر یهود،

قومی که د تریکی زندگی موکنه^{۱۶}

نور بزرگ ره مینگره

و د بله کسای که د سرزمین مرگ و ساپه شی زندگی مونه،

یگ نور روشنی مونه.“

امزو زمان عیسیٰ د اعلان پیغام خو شروع کده گفت: ”تبه کنید، چراکه آمدون پادشاهی آسمو نزدیک شده.“^{۱۷}

چار ماهی گیر یار عیسیٰ مُوشہ

وختی عیسیٰ د لب دریای جلیلیه قدم میزد، دو برار ینعنى شِمعون مشهور د پترس و برار شی آندریاس ره دید که تور ماھی گیری ره د دریا میندزه، چون اونا ماھی گیر بود.^{۱۹} او دزوا گفت: "از پُشتِ ازمه بیید تا شمو ره شکارچی مردم جور کنم."^{۲۰} اونا فوری تور های ماھی گیری خو ره ایله کد و از پُشتِ ازو ری شد.^{۲۱} عیسیٰ د حالیکه ازونجی مورفت، دو برار دیگه ینعنى یعقوب باچه زیدی و برار شی یوحنا ره دید که قد آته خو زیدی د کشته شسته و تور های ماھی گیری خو ره آماده مونه. اوخته او اونا ره کوی کد^{۲۲} و اونا فوری کشته و آته خو ره ایله کده از پُشتِ ازو ری شد.

تعلیم و خدمت های عیسیٰ

عیسیٰ د سراسر جلیلیه میگشت و د عِبادت خانه های ازوا تعلیم میدد و خوشخبری پادشاهی خدا ره اعلان مُوكد و هر رقم مَرض و ناجوری مردم ره شفا میدد.

پس نام ازو د تمام سُوریه مشهور شد و اونا تمام ناجورای

ره که دَ مَرْضَهای رقم رقم و دَرَدَهَا گِرْفَتَار بُود و ام جِنْدِيَا و
مِرْگَهَا و شَلَهَا ره دَ پِيشِ ازُو مِيُورَد و او اونا ره شَفَا
مِيدَد.^{۲۵} و جَمِيعَتِهای کَثِيرَه از جَلِيلِيه، دِيكَابُولِيس، اوْرُشَليِيم،
يهُودِيه و از او طَرفِ درِيَايِ اُرْدُن از پُشتِ ازُو رَيِي شُد.

موعِظِه سِرِ كوه

۵ وختی عیسیٰ جَمِيعَتِه ره دِيد، او دَ بَلَه کوه رفت و
امی که شِشت، يارای شی ام دَ پِيشِ ازُو آمد.^۳ او خته او دان
خُوره واز کد و اونا ره تعلیم دَده گُفت:

۳ نیک دَ بَختِ کسای که دَ روح فروتن آسته،

چراکه پادشاهی آسمو ازوا یه.

۴ نیک دَ بَختِ کسای که ماتم مُونه،

چراکه اونا تَسلی پَيدا مُوكنَه.

۵ نیک دَ بَختِ کسای که حلِيم-و-شِكسته نَفس آسته،

چراکه اونا وارِثِ زمی مُوشه.

۶ نیک دَبَختِ کسای که گُشنه و تُشنِه عدالت آسته،

چراکه اونا سیر مُوشه.

۷ نیک دَبَختِ کسای که رَحم مُونه،

چراکه دَزوا رَحم مُوشه.

۸ نیک دَبَختِ کسای که دِل های ازوا پاک آسته،

چراکه اونا خُدا ره مینگره.

۹ نیک دَبَختِ کسای که صُلح مُوکنه،

چراکه اونا بچکِیچای خُدا گُفته مُوشه.

۱۰ نیک دَبَختِ کسای که بخاطرِ عدالت آزار-و-آذیت

مُوشه،

چراکه پادشاهی آسمو ازوا آسته.

۱۱ نیک د بَخت شُمو و ختِیکه مردُم شُمو ره از خاطرِ ازمه
دَو-و-دَشنام مِیدیه و آزار-و-آذیت مُونه و هر رقم توره بَد ره د
ضِد شُمو بَطْوَر دروغ مُوگیه.

۱۲ خوشی کُنید و خوشحال بَشید، چون اجر شُمو د عالم
باله غَدر بُزرگ أَسته،

چراکه د امزى طرِيق اُونا پیغمبرای ره که پیش از شُمو
بُود ام آزار-و-آذیت کد.

د باره نُور و نَمَك

۱۳ شُمو نَمَكِ دُنيا أَستِيد! ليکِن اگه نَمَك مَزَه خُوره از دِست
بِدیه، چِطُور مِيتنه که شوری شی پس بیبه؟ او دِیگه د هیچ
چیز کار نَمییه بَغَیر که پورته شده زیر پای مردُم پایمال شُنه.

۱۴ شُمو نُور دُنيا أَستِيد. شاری که د سرِیگ تِپه آباد شده
بَشه، او تашه شده نَمِيتنه. ^{۱۵} هیچ کس چِراغ ره روشو نَمُونه
که او ره د زیرِیگ کاسه بیله، بَلکِه د بَلِه چِراغدان میله تا
روشنی شی بَلدِه پِگِ کسای که د خانه أَسته بَرسه. ^{۱۶} دَمزى

رقم بیلید که نور از شُمو ام دَ مردم روشنیٰ بِدیه تا اونا کارای
نيک شُمو ره دیده آته شُمو ره که دَ آسمو آسته، سِتايش گُنه.

د باره پوره کدون شريعت

۱۷ فِكْر نَكْنِيد که أَمَدِيم تا تَورات يا نوِشته های پیغمبرا ره
باطِل کُنم. ما نَمَدِيم که باطِل کُنم، بَلْكِه أَمَدِيم تا اُونا ره پوره
کُنم. ۱۸ ما حَقِيقَة ره دَز شُمو مُوكُم: تا آسمو و زمی از بَيَن
نَرَفته، ریزه تَرِین حرف يا نُقطِه تَورات هرگِز از بَيَن نَمُوره تا اِی
که پَگ شی پوره شُنه. ۱۹ پس هر کسی که يکی از ریزه تَرِین
امزی احکام ره مَیده کُنه و دَ مردم ام تعليِيم بِدیه که امُو رقم
کُنه، او دَ پادشاهی آسمو کم تَرِین شخص حِساب مُوشَه.

۲۰ چون ما دَز شُمو مُوكِيْم: تا عدالت شُمو از عدالتِ عالِمای
دِين و فَرِيسِيا کده کلو نَشُنه، شُمو هرگِز دَ پادشاهی آسمو
داخِل نَمُوشِيد.

د باره قتل

۲۱ شُمو شِنِيدِيد که دَ مردمای زمانِ قدِيم گُفتَه شُدد، قتل

نَكُو! و هر کسی که قتل کنه سزاوارِ قضاوت آسته.^{۲۲} مگم

ما دَز شُمو مُوگم، هر کس که بِدُونِ کُدَم دلیل دَ سِرِ بِرار خُو
قار شُنه، سزاوارِ قضاوت آسته و هر کس که دِ بِرار خُو بُگیه

او لَوْدَه!^{۲۳} او سزاوارِ محاکمه دَ شورا آسته؛ و هر کس که
بُگیه او آحمق!^{۲۴} او سزاوارِ آتِشِ دوزخ آسته. پس وختیکه

هدیه خُو ره دَ قُربانگاه مُوبیری و دَ اونجی دَ یاد تُو مییه که
برار تُو دَ ضد تُو کُدَم شِکایت دَره،^{۲۵} هدیه خُو ره دَ امونجی دَ

پیشِ قُربانگاه ایله بِدی و رفته اوّل قد بِرار خُو آشتی کُو و بعد
ازو آمدہ هدیه خُو ره تقدیم کُو.^{۲۶} دَ حالیکه قد مُدعی خُو

سُون مَحکمه موری، دَ راه قد ازو صُلح کُو؛ اگه نَه، مُدعی
تُو، تُو ره دَ دِستِ قاضی تسلیم مُونه و قاضی تُو ره دَ دِستِ

عسکر مِیدیه و تُو دَ بنَدی خانه آندخته مُوشی.^{۲۷} ما حقيقة ره
دَز تُو مُوگم، تاکه آخرین پیسه ره نَدی، ازو نجی بُر شده

نمیشنی.

دَ بارِه زِنا

شُمو شِنیدید که گفتہ شُده، زِنا نَكُو.^{۲۸} لیکن ما دَز شُمو
مُوگم، هر کس که سُون یگ خاتُو قد نِگاهِ شَهُوت آمیز تو خ
کنه، او امو لحظه دِ دل خُو قد ازو زِنا کده.^{۲۹} پس اگه چِیم

راست تُو باعِث مُوشه که تُو گُمراه شُنی، او ره بُر کده دُور

پورته کُو؛ چون بَلِدِه تُو خُوبَرَ آسته که يکی از أَعْضَاءِ جِسْم

خُوره از دِسْتِ بِدِی تا إِی که تمامِ جِسْم تُو دَ دوزَخَ آندخته

شُنَه.^{۳۰} اگه دِسْتِ راست تُو باعِث مُوشه که تُو گُمراه شُنی، او

ره قَطَعَ کده دُور پورته کُو؛ چون بَلِدِه تُو خُوبَرَ آسته که يکی

از أَعْضَاءِ جِسْم خُوره از دِسْتِ بِدِی تا إِی که قد تمامِ جِسْم

خُوره دَ دوزَخَ بُقْتَنی.

دَ بَارِه طلاق

امْجُنَانَ گُفْتَه شُدَه، هُر کس که خاتُونَ خُوره طلاق بِدِیه،^{۳۱}

باید یگ طلاق نامه دَرُزَ بِدِیه.^{۳۲} مَكْمَم ما دَرُز شُمو مُوكَمْ، هر

کسی که خاتُونَ خُوره بَغَيْرِ از عِلَّتِ زِنا طلاق بِدِیه، باعِث

مُوشه که او زِنا کاری کُنَه و هر کس که قد خاتُونَ طلاق شُدَه

تُوي کُنَه، زِنا مُونَه.

دَ بَارِه قَسْم

بَسَم شُمو شِنِيدِيد که دَ مرْدَمَای زِمانِ قدِيم گُفْتَه شُدَد، قَسْمِ^{۳۳}

دروغ نَخُور، بَلِكِه قَسْم هَای ره که دَ نَامِ خُداوند خوردَے دَرُوا

وَفَا كُوٌ.^{٣٤} مِكْمَ مَا دَزْ شُمُو مُوْگُم، هِرْگِزْ قَسْم نَخُورِيد، نَهْ دَ آسمو چراکه تختِ خُدا أَسْتَه^{٣٥} وَنَهْ دَ زَمِي، چراکه چَوْكَى تَى پَاي شَى أَسْتَه، وَنَهْ دَ اوْرُشَلِيم چراکه شَارِ امْزُو پادشاَه بُزْرَگ^{٣٦} أَسْتَه، وَنَهْ امْ دَ سَرْ خُو قَسْم بُخُور، چراکه تُو حتَى يِكْ تَارِ مُوْيِ رَه سِيَاه يَا سَفِيدَ كَدَه نَمِيَّتَنِي.^{٣٧} بَلَكِه تُورِه شُمُو كَه «أَرِ» أَسْتَه، «أَرِ» بَشَه وَ«نَهِ» شُمُو «نَهِ»، چراکه كَلوَتَر ازِي از شَيَطُو أَسْتَه.

دَ بَارِه إِنْتِقَام

شُمُو شِينِيدِيدَ كَه گُفتَه شُدَه،^{٣٨} چِيم دَ عِوَضِ چِيم وَدَندَو دَ عِوَضِ دَندَو.^{٣٩} مِكْمَ مَا دَزْ شُمُو مُوْگُم، دَ بَرَابِرِ شَخْصِ شِيرِير ايسَتَه نَشْنِيد؛ بَلَكِه اَگَه يَكِو كَس دَ كَوْمَه رَاست تُو قد چَپَات مِيزَنَه كَوْمَه دِيَگِه خُو رَه ام سُون ازُو دَورِ بدِي.^{٤٠} وَ اَگَه يَكِو كَس بِخَايَه كَه تُو رَه دَ مَحْكَمَه بُرْدَه پِيَرُون تُو رَه بِكِيرَه، چَپَن خُو رَه ام دَزُو ايلَه بدِي.^{٤١} وَ اَگَه يَكِو كَس تُو رَه مَجْبُور مُونَه كَه يَكِيَّ كَجَى رَاه بُوري، دُو كَجَى قد شَى بُورُو.^{٤٢} هَر كَس كَه از تُو يَكِو چِيز طَلَب مُونَه، دَزُو بدِي وَ كَسَى كَه از تُو قَرَض طَلَب مُونَه، رُوي خُو رَه ازُو دَور نَدِي.

د باره دوست دشتون دشمنا

شمو شنیدید که گفته شده، همسایه خوره دوست دشته
بَشُّ و قد دشمون خُو دشمنی کُو.^{۴۳} مگم ما ذز شمو
مُوگم، دشمنای خُوره دوست دشته بشید و بلده کسای که
شمو ره آزار-و-اذیت مونه دعا کنید^{۴۴} تا شمو بچکیچای آته
خُو که د عالم باله آسته شنید، چراکه او آشتو خُوره د بله
مردمای بد و خوب بلند مونه و بارش خُوره د بله نیکوکارا و
بدکارا مُوبارنه.^{۴۵} اگه شمو تنها کسای ره دوست دشته بشید
که شمو ره دوست دره، شمو چی اجر درید؟ آیا مالیه‌گیرا ام
امی کار ره نمُوکنه؟^{۴۶} اگه تنها بِرaron خُوره سلام بیدید،
شمو از دیگرو کده چی زیادی درید؟ آیا حتی مردمای غیر
يهود ام امی کار ره نمُونه؟^{۴۷} پس شمو کامل بشید، امو رقم
که آته آسمانی شمو کامل آسته.

د باره خیرات

۶^۱ احتیاط کنید که نیکی خوره د پیش روی مردم انجام
نَدید تا اونا شمو ره بِنگره؛ اگه امی رقم کنید، شمو د پیش

آتِه خُو که د آسمو آسته، کُدم آجری ندرييد.^۲ پس هر وختيکه خيرات ميدي، پيش رُوي خُو سُرنى زده اعلان نکو، رقمى که رياكارا د عبادت خانه ها و سرک ها مونه تا مردم اونا ره تعريف-و-تصيف کنه. ما حقيقت ره دز شمو موگم، اونا آجر خُو ره گرفته.^۳ مگم تو هر وختيکه خيرات ميدي، از چيزى که دست راست تو مونه، نه ايل که دست چپ تو خبر شنه^۴ تا خيرات تو تашه بمنه؛ و آتِه تو که چيزاي تашه ره مينگره، آجر تو ره ميديه.^۵

د باره دعا کدو

و هر وختيکه دعا مونى، رقم رياكارا ن بش، چون اونا خوش دره که د عبادت خانه ها و گوشه-و-كنار سرک ها ايسته شده دعا کنه تا مردم اونا ره بـنگره. ما حقيقت ره دز شمو موگم، اونا آجر خُو ره گرفته.^۶ ولے تو، وختيکه دعا مونى د داخل اتق خُو رفته درگه ره کـيـپـ کـوـ و دـپـيشـ آـتـهـ کـهـ دـيـدهـ نـمـوشـهـ دـعاـ کـوـ. اوخته آـتـهـ توـ کـهـ چـيـزـايـ تـاشـهـ رـهـ اـمـ مـيـنـگـرـهـ، آـجـرـ توـ رـهـ مـيـديـهـ.^۷

و د غـيـتـ دـعاـ کـدوـ رقمـ مـلـلتـ هـايـ غـيرـ يـهـودـ حـرـفـايـ بـيـعـنىـ^۸

ره يكسره گفته نَرَوِيد، چون اُونا فِكْر مُونه که از يكسره گفتوا
دُعَای ازوا قبُول مُوشَه.^٨ پس رقم ازوا نَبَشِيد، چون آتِه شُمو
مِیدَنَه که شُمو دَ چِيز خيل ضُرُورَت دَرِيد، پیش ازی که از شی
درخاست کُنِيد.

^٩ پس شُمو اینی رقم دُعا کُنِيد:

آی آتِه مو که دَ آسمو آستَى،

نام تُو مُقدَّس باد؛

^{١٠} پادشاهی تُو بييَه؛

إرادِه تُو امُو رقم که دَ آسمو إجرا مُوشَه،

دَ زمَى ام إجرا شُنَه؛

^{١١} نانِ روزانِه مو ره امروز دَرِ مو بِدَى؛

^{١٢} قرض های مو ره بُبَخش،

امُو رقم که مو ام قرضداری خُو ره مُوبَخشی؛

بِدی،

[چراکه پادشاهی، قُدرت و جلال تا آبداللاباد از تُو آسته،

آمین.]

چون اگه شُمو خطاهای مردم ره بُبخشید، آته آسمانی شُمو
ام شُمو ره مُوبَخشه.^{۱۵} لیکن اگه شُمو مردم ره نَبخشید، آته
آسمانی شُمو ام خطاهای شُمو ره نَمُوبَخشه.

د باره روزه گرفتو

وختیکه روزه مِیگِیرید، رقمِ ریاکارا تُرشُروی نَبَشِید، چون
أونا رنگ-و-رُوی خُو ره تغییر مِیدیه تا دَ مردم نِشو بِدیه که
روزه دَره. ما حِقیقت ره دَز شُمو مُوگُم، أونا آجر خُو ره گِرفته.
مِگم تُو وختیکه روزه مِیگِیری، سر خُو ره چرب کُو و رُوی
خُو ره بُشوي^{۱۶} تا دَ نظرِ مردم روزهدار معلوم نَشْنی، بَلکِه دَ
نظرِ آته خُو که دِیده نَمُوشه روزهدار معلوم شُنی؛ و آته تُو که
چیزای تاشه ره ام مِینگره، آجر تُو ره مِیدیه.

د باره مال-و-دولت

۱۹ مال-و-دولت د زمی بلده خو جم نکنید، د جایی که کویه و زنگ او ره از بین موبیره و دُزا در آمده دُزی مُونکه؛^{۲۰} بلکه مال-و-دولت د عالم باله بلده خو جم کنید، د جایی که کویه و زنگ او ره از بین نموبیره و دُزا در نمییه و دُزی نمُونکه.
۲۱ چون هر جای که مال-و-دولت تو آسته، دل تو ام امونجی
یه.

۲۲ چیم چراغِ جان آسته. پس اگه چیم تو بینا بشه، تمام وجود تو روشو آسته.^{۲۳} لیکن اگه چیم تو فاسد بشه، تمام وجود تو پُر از تریکی آسته. پس اگه امو روشنی که د وجود تو آسته تریک بشه، چی یگ تریکی بزرگ آسته!

۲۴ هیچ کس نمیتنه که دو بادار ره خدمت کنه، چون حتماً از یگ شی بد موبیره و دیگه شی ره دوست میدنه، و یا دیگ شی وفادار مومنه و دیگه شی ره خار-و-حقیر حساب مونه. دمزی رقم شمو نمیتنید که ام بنده خدا بشید و ام بنده مال-و-دولت.

امزى خاطر دَز شُمو مُوْگم: دَ بارِه زِندگى خُو تَشْوِيش نَكْنِيد ^{٢٥}
 که چى بُخورِيد يا چى وُچى كُنِيد و نَه دَ بارِه جِسم خُو که چى
 بُپوشِيد. آيا زِندگى از خوراک و جِسم از پوشاك کده مُهمِتر
 نَيِيه؟ ^{٢٦} مُرغَكوى آسمو ره توخ كُنِيد: أونا نَه كِشت مُونه، نَه
 درَو و نَه ام دَ دَى خانه ها ذَخِيره مُوكُنه، ولے آته آسمانى شُمو
 روزى ازوا ره مِيديه. آيا أَرْزِش از شُمو ازوا کده كَلوتَر نَيِيه؟

كُدَم از شُمو مِيتَنِيد که قد غَمَ-و-غُصَّه خوردو يِگ ساعت ^{٢٧}
 عمر خُو ره دراز كُنِيد؟ ^{٢٨} و شُمو چرا بَلَدِه كالا غَمَ-و-غُصَّه
 مُخورِيد؟ گُل های سوَسَن دَشت ره بِنْگَرِيد که چى رقم كَله
 مُوشَه؛ أونا نَه زَحْمَت مِيكَشَه و نَه مِيرِيشَه. ^{٢٩} ولے ما دَز شُمو
 مُوْگِيم که حتَى سُلَيْمان ام قد تمام شان-و-شَوَكَت خُو رقم يِكى
 امزوا كالا نَپوشِيد. ^{٣٠} پس اگه خُدا عَلْفِ دَشت ره که اِمروز
 أَسْتَه و صَبَاح دَتَنْدُور آندخته مُوشَه اِي رقم مُوپوشَه، آيا شُمو
 ره غَدر كَلو خُوبَتَر نَمُويشَه، آيِ كِم ايمانا؟ ^{٣١} پس غَمَ-و-غُصَّه
 نَخورِيد که بُكِيد، 'چى بُخورِي؟' يا 'چى وُچى كُنِي؟' و يا
 'چى بُپوشِي؟' ^{٣٢} جُون مردمای غَير يَهُود دَ طلبِ پِگِ امزى
 چيزا أَسْتَه، مَكِم آته آسمانى شُمو مِيدَنه که شُمو دَ پِگِ امزى

چیزا ضرورت دَرید. ^{۳۳} بَلکِه اوَّل دَطلب پادشاهی خُدا و

عدالت ازو بشید؛ اوخته تمام امzi چیزا ام دَز شُمو دَده مُوشه. ^{۳۴} پس غَم-و-غُصَّه صباح ره نَخورید، چراکه صباح غَم-و-غُصَّه خود خُو ره دَره؛ مُشكِّلاتِ امروز بَلَدِه امروز بس آسته.

قضاياَت دَ بارِه دِيگَر و

^۱ **۷** دَ بارِه دِيگَر و قضاوت نَكْنِيد تا قضاوت نَشَنِيد. ^۲ چون هر رقم که شُمو دَ بارِه دِيگَر و قضاوت کُنید، امُو رقم دَ بارِه شُمو قضاوت مُوشه؛ و قد هر مَنَك که اندازه کُنید، قد امُزو بَلَدِه شُمو اندازه مُوشه. ^۳ چرا پَر کاه ره دَ چِيمِ بِرار خُو مِينَگَري، ولَه از دِستَكِ چيوی که دَ چِيمِ خود تُو آسته بَه خبری؟ ^۴ يا چطُور مِيتَنَى که دَ بِرار خُوبُگَى، مَرَه بِيل که پَر کاه ره از چِيم تُو بُر کُنم ^۵ دَ حاليکه دَ چِيمِ خود تُو دِستَكِ چيو آسته؟ او رياکار، اوَّل دِستَكِ چيو ره از چِيمِ خود خُو بُر کُو، اوخته خُوبَتَر مِينَگَري و مِيتَنَى پَر کاه ره از چِيمِ بِرار خُو بُر کُنى.

چیزای ره که مُقدَّس آسته، دَسَگَا نَدِید و مُرواری های خُو ره
دَ پیش خُوك ها پورته نَکِنید. نَشنه که خُوك ها مُرواری ها ره
پایمال کُنه و سَگَا دَور خورده شُمو ره پاره پاره کُنه.

طلب کُنید، بُپالِید و طَخ طَخ کُنید

طلب کُنید و دَز شُمو دَده مُوشه؛ بُپالِید و شُمو پَیدا مُونید؛
طَخ طَخ کُنید و درگه بَلِدِه شُمو واز مُوشه؛ ^١چُون هر کسی که
طلب کُنه، دَدِست میره و هر کسی که بُپاله، پَیدا مُونه و هر
کسی که طَخ طَخ کُنه، درگه بَلِدِه شی واز مُوشه. ^٢آیا دَ مینکل
شُمو اُوطور کسی آسته که اگه باچه شی اژو نان طلب کُنه، او
دَزشی سنگ بِدیه؟ ^٣و یا اگه ماهی طلب کُنه، دَزُو مار بِدیه؟
^٤پس اگه شُمو که آدمای شریر استید، مُوفامِید که چی رقم
تُحفه های خُوب دَ بچکِیچای خُوب بِدید، چیقس کَلوتر آته شُمو
که دَ آسمو آسته، چیزای خُوب ره بَلِدِه کسای مِیدیه که از شی
طلب مُونه.

^٥پس هر چیزی که میخاهید مردم دَز شُمو انجام بِدیه، شُمو ام
امُو چِیز ره بَلِدِه ازوا انجام بِدید؛ چُون اینمی آسته خلاصِه
تُورات و نوشتة های پَیغمبرا.

از درگه تَنگ داخل شُنید؛ چون درگه که کله و راهی که پراخ آسته د نابودی آخر مُوشه و کسای که دَزشی داخل مُوشه کلویه.^{۱۳} مگم درگه که تَنگ و راهی که مشکل آسته، او د زندگی آخر مُوشه و کسای که او ره پیدا مونه کم آسته.^{۱۴}

دِرختِ میوه

از پیغمبرای دروغی احتیاط کنید، چراکه د کالای گوسپو د پیش شمو مییه، ولے د باطن گرگای دَرنده آسته.^{۱۵} اونا ره از میوه های ازوا مینخشید. آیا انگور از بُوتہ خار و انجیر از بُوتہ جارو چینده مُوشه؟ نه!^{۱۶} د امزی رقم، هر درختِ خوب میوه خوب میدیه و هر درختِ بد میوه شی بد آسته.^{۱۷} درختِ خوب نمیتنه میوه بد بُدیه و درختِ بد ام نمیتنه که میوه خوب بُدیه.^{۱۸} هر درختِ که میوه خوب ندیه، قطع شده د آتش آندخته مُوشه.^{۱۹} پس د امزی طریقه، شمو اونا ره از میوه های ازوا مینخشید.

نه هر کسی که مره «یا مولا، یا مولا» بُگیه د پادشاهی^{۲۰}

آسمو دا خل مُوشه، بَلِکِه تنها کسی که اراده آته مَره که د

آسمو آسته، د جای بیره. ^{۲۲} د امزو روز غَدر کسا دَز مه

مُوگیه، 'يا مَولا، يا مَولا، آيا مو د نام از تو نبَوت نَکدی و د

نام از تو جَنیات ره بُر نَکدی و د نام از تو مُعجزای کلو

نَکدی؟ ^{۲۳} اوخته ما دَزوا واضح مُوگم که 'ما هرگز شُمو ره

نَشِنَخْتم. از پیشِ مه دُور شُنید، او بَدکارا!

مَثَلِ دُو خانه

^{۲۴} پس هر کسی که امی تورای مَره بِشنوه و دَزوا عمل کُنه،

رقمِ آدمِ دانای آسته که خانه خُو ره دَبِله سنگ آباد کده.

^{۲۵} بارِش بارِید، سیل ها آمد و باد ها پُف کده امُو خانه ره زَد،

مگم او چَپه نَشد، چراکه تادو شی دَبِله سنگ ایشته شُدد.

^{۲۶} ولے هر کسی که تورای مَره بِشنوه و دَزوا عمل نَکنَه، رقمِ

آدمِ نادانی آسته که خانه خُو ره دَبِله ریگ آباد کده. ^{۲۷} بارِش

بارِید، سیل ها آمد و باد ها پُف کده امُو خانه ره زَد و او چَپه

شُد و خرابی شی غَدر کلو بُود. "

^{۲۸} وختیکه عیسیٰ امی تورا ره خلاص کد، مردم از تعلیم شی

خَیرو مَند، ^{۲۹} چُون او رقمِ کسی که صاحبِ قُدرت-و-اختیار

بَشَهْ دَزْوَا تَعْلِيمْ دَدْ، نَهْ رَقْمْ عَالِمَاهِي دِينْ.

جور شُدُونِ يَگ آدمِ كولى

٨ وختیکه عیسیٰ از کوه تا آمد، يَگ جمعیتِ کله از پُشتِ ازو رَیَ شُد. ٩ دَ امزُو لحظه يَگ آدمِ كولی گرفته آمد و دَ پیشِ ازو زانو زَدَه گفت: "يا مَولا، اگه تُو بِخاهی، مِيتني مَره پاک کنی." ١٠ عیسیٰ دست خُوره دراز کد و دَ بَلَه شی ایشته گفت: "ما میخایم، پاک شُو." فَوری مَرضِ كولی ازو پاک شُد. ١١ اوخته عیسیٰ دَزْوَ گفت: "هُوش کُو که دَ کس چیز نَگی، بَلَکِه رفته خود ره دَ پیشوا نِشو بِدی و هدیه ره که مُوسیٰ امر کده، تقدیم کُو تا بَلَدِه ازوا يَگ شاهِدی بَشه."

ایمانِ قومَنداَنِ رُومی

٥ وختی عیسیٰ دَ كَفْرَنَاحُوم داخل شُد، يَگ قومَنداَنِ رُومی پیش شی آمد و عذر-و-زاری کده دَزْوَ گفت: "٦ يا مَولا، خِدمتگار مه شَل شُدَه دَ خانه اُفتَدَه و غَدر دَ رَنج-و-عذاب أَستَه."

٧ عیسیٰ دَزْوَ گفت: "ما آمَدَه او ره شفا مِيدیم." ٨ مَگم

قومَنْدانَ دَ جواب شى گفت: "يَا مَوْلَا، مَا لَا يِقِي ازى ره نَدْرُم

كَه دَ زِيرِ چَتِ خانِه مَه بِيسي؛ بَلَكِه فَقْط حُكْم كُو وَ خِدمتَگار

مَه شَفَاء پَيَدا مُونَه.^٩ چُون خَود مَه آدِم زِيرِ أَمْر أَسْتُم وَ عَسْكَرا

زِيرِ أَمْر ازْمَه أَسْتَه؛ وَختى دَ يِكَ شَى مُوكَم، 'بُورُو!' أُو موره

وَ دَ دِيكَه شَى مُوكَم 'بِيه!' أُو مييَه وَ دَ غُلام خُو مُوكَم 'ايَنى

كار ره بُكُو! أُو مُوكَنَه.^{١٠} وَختىكَه عِيسَى إِي تُورا ره شِينَيد،

تعجبَ كَد وَ دَ جَمْعِيَتَى كَه از پُشت شَى مِيمَد گفت: "ما

حَقِيقَت ره دَز شُمو مُوكَم، دَ مِينَكِلِ مِرْدُم إِسْرَائِيل امِي رقم

ایمان پَيَدا نَكديم.^{١١} ما دَز شُمو مُوكَم كَه غَدر كَسا از شَرق و

غَرب مييَه وَ قد إِبراهِيم وَ إِسْحاق وَ يعقوب دَ پادشاهي آسمو دَ

يِكَ دِسْتَرَخو مِيشِينَه،^{١٢} مِكَم بَچِكِيچَاي امزى پادشاهي دَ

ترِيکى بُرُو پورته مُوشَه، دَ جايى كَه چَخرا وَ دَندوَخَيَي أَسْتَه."

اوخته عِيسَى دَ قومَنْدانِ رُومَى گفت: "بُورُو، دَ مُطَابِقِ^{١٣}

ایمان تُو دَز تُو دَدَه شُنَه." وَ دَ امْزُو لحظه خِدمتَگارِ ازْو شَفَا

پَيَدا كَد.

عِيسَى ناجورا ره شَفَاء مِيدَيَه

وَختى عِيسَى دَ خانِه پِتْرُس رَفَت، دِيد كَه خُسْرِمَادِر شَى تَو^{١٤}

كَده وَ دَ جاَگَه خَاوَ أَسْتَه.^{١٥} عِيسَى دِست خُو ره دَ بَلَه دِست

اژو ایشت و تَوْ او ره ایله کد و او باله شُده دَخِدمت ازوا
مَشْغُول شُد.

١٦ وختیکه شام شُد، غَدر جِندی ها ره دَپیش عیسیٰ آورد و او
قد گفتون یگ کلمه آرواح ناپاک ره بُر کد و تمام ناجورا ره
شفا دَد. ١٧ دَامزی رقم چیزی که دَوسیلِه اشعیای نَبی گفته
شُدد پُوره شُد:

او رَنج های مو ره گِرفت

و ناجوری های مو ره دُور کد.

قِيمَتِ پَيَروِي کدو از عیسیٰ مسيح

١٨ وختیکه عیسیٰ جمعیت کله ره دَگرد خُود دید، أمر کد که دَ
او لبِ دریا تیر شنَه. ١٩ دَمُزو غَیت یگ عالِمِ دین پیش آمده
گفت: "آی أَسْتَاد، هر جای که بوری ما از پُشت تُو میئم."
٢٠ ولے عیسیٰ دَزُو گفت: "روباه ها غار دَره و مُرغَکوی آسمو
وور، مَكْمَ «باقِه إنسان» جای سر ایشتو ام نَدره." ٢١ یگِ
دِیگه از جَمِ يارای شی دَزُو گفت: "يا مَولا، بیل که اوّل رفته

آته خو ره دفن کنم. ”^{۲۲} لیکن عیسی دزو گفت: ”از پشتِ

ازمه بیه و بیل که مُرده ها، مُرده های خو ره دفن کنه. ”

عیسی طوفان ره آرام مونه

^{۲۳} بعد ازو عیسی د کشتنی سوار شد و یارای شی از پشتِ ازو

رفت. ^{۲۴} بے بلغه یگ طوفان شدید د دریا پیدا شد، د اندازه که

جلپه های دریا کشتنی ره مُوپوشند. مگم عیسی خاو بود.

^{۲۵} اوخته، یارا رفته عیسی ره بیدار کد و گفت: ”یا مولا، مو

ره نجات بدی! مو نابود موشی! ”^{۲۶} عیسی دزوا گفت: ”ای

کم ایمانا، چرا ایقس ترس خوردید؟ ” اوخته او باله شد و د بله

باد و دریا هیبت کد و آرامش کامل برقرار شد. ^{۲۷} و اونا حیرت

کده قد یگدیگه خو گفت: ”ای چی رقم آدم استه که حتی باد

و دریا از آید شی موشه! ”

شفای دو آدم جندی

^{۲۸} وختیکه عیسی د او طرف دریا د سرزمین جَدریا رسید، دو

آدم جندی از قد قبرا بُر شده قد ازو رُوى د رُوى شد. اونا

اوقس خطرناک بود که هیچ کس نمیتنست ازو راه تیر شنه.

اوخته امو چندیا چیغ زَدَه گفت: "تُو دَزِ مو چَی غَرَضِ دَرِی،
 آی باچَه خُدا؟ آیا تُو دَاینِجَی اَمَدَے که پیش از وخت مو ره
 عذاب کُنی؟"^{۳۰} کم وَرِی دُورَتَر ازوا یگ گَلَه کِلَه خُوك
 میچَرِید.^{۳۱} اوخته جِنیات دَپیشِ عیسَیٰ عذر-و-زاری کده
 گفت: "اگه مو ره بُرْ مُونی، مو ره دَ داخِل گَلَه خُوك رَبِی
 کُو."^{۳۲} عیسَیٰ دَزَوا گفت: "بورِید!" اوخته اونا بُرْ شُدَه دَ
 پوستِ خُوك ها داخِل شُد و فَورًا تمامِ گَلَه از دامَنِه تِپَه دَ مَنِه
 دریا هُجُوم بُرد و دَ مَنِه آوَ غَرق شُدَه مُرَد.^{۳۳} چوپونوی خُوك
 ها دُوتا کده دَ شار رفت و تمامِ امْزو واقِعه و قِصَّه چندیا ره
 بَلَدِه مرَدُم نقل کد.^{۳۴} اوخته تمامِ مرَدُم شار بُرو اَمَد تا عیسَیٰ
 ره بِنگره. و غَيْتِیکه او ره دید، دَزُو عذر کد که از منطقه ازوا
 بوره.

جور شُدونِ یگ آدمِ شَل

۹ ^۱ پس عیسَیٰ دَ کِشتَی سوار شُد و از دریا تیر شُدَه دَ شارِ
 خود خُو اَمَد.^۲ دَ امْزو غَيْت چند نفر یگ آدمِ فَلَج ره که دَ بَلَه
 یگ جاگَه خاو بُود، دَپیشِ اُزو اُورَد. و ختِیکه عیسَیٰ ایمان
 ازوا ره دید، دَ آدمِ شَل گفت: "باچَه مه، خاطرِ جم بش،

گناهای تُو بخشیده شُد. ”

اوخته بعضی از عالِمای دین قد خود خُو گفت: ”ای آدم ^۳ کفرگویی مُونه.“ ^۴ و عیسیٰ فِکر های ازوا ره فامیده گفت: ”چرا ای فِکر های فاسِد ره دِل خُو جای مِیدید؟ ^۵ کُدم شی آسو آسته: آیا گفتون ازی که، گناه های تُو بخشیده شُد، ^۶ یا گفتون ازی که باله شُو و راه بورُو؟ ^۷ مگم تا بِدَنید که «باقِه انسان» دَرُوی زمی قُدرت-و-اختیار بخشیدون گناه ها ره دَره، پنگرید که چیز کار مُونم.“ پس دَامْزو آدم فَلْج گفت: ”باله شُو و جاگِه خُو ره گرفته خانه خُو بورُو!“ ^۸ و امُو آدم باله شُده خانه خُو رفت. ^۹ وختی امُو جمعیت مردم ای واقعه ره هُوش کد، اُونا غَدر بِیم کد و خُدای ره که بَلِدِه انسان امی رقم اختیار-و-قدرت ره دَده بُود، شُکر-و-سِپاس گفت.

متی مالیه گیر یار عیسیٰ مُوشہ

وختیکه عیسیٰ از اُونجی پیش رفت، او یگ آدم دَنام متی ره دید که دَجای مالیه-گرفتو شِشتُد. عیسیٰ دَزو گفت: ”از پُشتِ ازمه بیه.“ متی باله شُده از پُشتِ ازو رَیی شُد.

د حايلike عيسى د خانه متا سر دستاخو ششت، تعداد
كلون ماليه گيرا و گناهكارا آمد و قد عيسى و ياراي شى
ششت. ^{١١} وختيکه فريسييا اي کار ره ديد اونا د ياراي شى
گفت: "چرا أستاد شمو قد ماليه گيرا نان مۇخوره؟"

عيسى توره ازوا ره شينيده گفت: "کسای که جور آسته، د
طېب ضرورت ندره، بلکه کسای که ناجور آسته د طېب
ضرورت دره. ^{١٣} بوريده و معنى ازى توره ره پى بېرىد: ما
رحمت ميخايم، نه قرباني، چون ما نمديم که مردمای عادل
ره دعوت كنم، بلکه آمديم که گناهكارا ره دعوت كنم."

د باره روزه

بعد ازو ياراي يحيى د پيش ازو آمده گفت: "چرا مو و
فريسييا غدر روزه ميگيرى، ولے ياراي از تو روزه نميگيره؟"
عيسى دزوا گفت: "آيا مهموناي توی خانه تا وختيکه داماد
قد ازوا آسته، ميتنه ماتم كنه؟ ولے روزاي مبيه که داماد ازوا
گرفته موشە؛ اوخته اونا روزه ميگيره. ^{١٥} هېچ کس يگ ٹوڭه
رخت نوره د كالاي كنه پىنه نموكنه، چراكه امو پىنه از كالا
كنده موشە و پارگى از بد بىتر موشە. ^{١٦} و نه ام شراب تازه

ره دَ مَشَكْ هَایِ كُهْنَهِ شَيْوُ مُونَهِ؛ اَگَهُ بُكْنَهِ، مَشَكْ هَا تَرْقِيَدَه

شَرَابْ لَوْوُ مُوشَهِ وَ مَشَكْ هَا ضَاعِيَ مُوشَهِ؛ بَلْكِهِ شَرَابْ تَازَه
رَه دَ مَشَكْ هَایِ نَوْ شَيْوُ مُونَهِ تَا هَرْ دُوَى شَىِ نِگَاهْ شُنَهِ.”

شَفَاءِ دَدَوْنِ خَاتُونِ نَاجُورِ وَ زِنَدَهِ كَدَوْنِ دُخْتَرِ

^{١٨} دَ حَالِيَّكَهِ عِيسَىِ اَمِيِ تُورَا رَه دَزَوَا مُوكَفَتِ، بِيَلْغَهِ يِكَىِ اَزِ
رَهْبَرَايِ عِبَادَتِ خَانَهِ اَمَدَهِ دَپِيشِ اَزُو زَانُو زَدَ وَ گَفَتِ：“ دُخْتَرِ
مَهِ اَمِيِ الَّىِ مُرَدِ؛ لِيَكِنِ بِيهِ وَ دِسْتِ خُو رَه دَبَلِهِ اَزُو بِيلِ وَ اوُ
^{١٩} زِنَدَهِ مُوشَهِ.” وَ عِيسَىِ بَالَهِ شُدَّهِ قَدِ يَارَايِ خُو اَزِ پُشتِ اَزُو
رَيَّبِيِ شُدَّ.

^{٢٠} دَ اَمْزُو وَختِ يِكَ خَاتُو كَهِ مُدَّتِ دَوازَدَهِ سَالِ خُونَرِيزِيِ دَشَتِ،
اَزِ پُشتِ عِيسَىِ اَمَدِ وَ دَ دَامَونِ چَپَنِ شَىِ دِسْتِ زَدِ، ^{٢١} چُونِ اوُ
قَدِ خَودِ خُو گَفَتُدِ：“ اَكَهِ بِتَنَمْ تَنَهَا دَ چَپَنِ شَىِ دِسْتِ بِزَنْمِ، جَورِ
مُوشَمِ.” ^{٢٢} عِيسَىِ دَورِ خَورَدَهِ طَرَفِ اَزُو تَوَخِ كَدَ وَ گَفَتِ：“ دُخْتَرِ مَهِ، خَاطِرِ جَمِ بَشِ، چَرا كَهِ اِيمَانِ تُو، تُو رَهِ شَفَاءِ دَدِ!” وَ
اوُ خَاتُو دَ اَمْزُو لَحَظَهِ شَفَاءِ پَيَداِ كَدِ.

^{٢٣} وَختِي عِيسَىِ دَ خَانَهِ رَهْبَرِ عِبَادَتِ خَانَهِ رَسِيدِ وَ نَوْحَهِ خَانَهِ وَ

مردُمی ره که چخرا-و-مَخته مُوكد دِید، ^{۲۴} او دَزوا گفت: "بُر
شَنِید، چون دُختر نَمُرده، بَلکِه خاو رفته." مَگم اُونا سِر اُزو
خَنده کد. ^{۲۵} وختِیکه مردم ره ازْونجی بُر کد، عیسیٰ داخل
رفت و از دِستِ دُختر گِرفت و اُو باله شُد. ^{۲۶} خبر امزی واقعه
دَ سراسِر امزُو منطقه تیت شد.

جور شُدونِ دُو کور

^{۲۷} دَ حالِیکه عیسیٰ امزُو منطقه مورفت، دُو آدم کور از پُشتِ
ازُو آمد و چیغ زَده گفت: "آی باچه داؤود، دَ بَلَه ازمو رَحْم
کو!"

^{۲۸} وختِیکه عیسیٰ دَ خانه داخل شد، امُو دُو آدم کور دَ پیشِ
ازُو آمد. عیسیٰ دَزوا گفت: "آیا شُمو ایمان دَرید که ما امی
کار ره کده مِیتنم؟" اُونا گفت: "آرے، مَولا." ^{۲۹} اوخته اُو
دِست خُو ره دَ بَلَه چیمای ازوا ایشت و گفت: "مُطابِقِ ایمان
شُمو بَلِدِه شُمو انجام دَده شُنه." ^{۳۰} و چیمای ازوا واز شُد.
عیسیٰ تاکِید کده دَزوا امر کد: "هُوش کُنید که دَزی باره هیچ
کس چیزی نَفامه." ^{۳۱} مَگم اُونا بُر و رفت و خبر دَ باره عیسیٰ
ره دَ سراسِر امزُو منطقه تیت کد.

٣٢ دَ حَالِيَّكَهُ أُونَا بُرُو مُورَفَتْ، مَرْدُم يِگ آدمِ جِنْدِي رَه كَه گُنْگَه
بُود، دَ پِيشِ عِيسَى أَورَدْ. ^{٣٣} وَخْتَى عِيسَى جِنْ رَه اَزُو بُرَ كَدْ،
امُو آدمِ گُنْگَه دَ تُورَه گُفتُو شُدْ وَ مَرْدُم حَيْرَو مَنَدَه گُفتْ: "أَمِي
رَقْم يِگ چِيز هِرَگِز دَ إِسْرَائِيل دِيدَه نَشُدَه." ^{٣٤} مَكْم فَرِيسِيَا
گُفتْ: "أُو دَ وَسِيلَه سَرِدِسْتِه جِنِيَّاتْ، جِنِيَّاتْ رَه بُرَ مُونَهْ."

دُعا بَلَدِه حَاصِلَاتْ

٣٥ عِيسَى دَ تَمَام شَارَا وَ آغِيلا مِيَگَشتْ وَ دَ عِبَادَتْ خَانَهَهَى
ازَوا تَعْلِيم مِيَدَدْ وَ خَوْشَبَرَى رَه دَ بَارِه پَادِشاَهِي آسمَوِ إِعلَان
مُوكَدْ وَ هَر مَرَضْ وَ هَر نَاجُورِي رَه شَفَاء مِيَدَدْ.

٣٦ وَخْتِيَّكَهُ أُو جَمِيعَيَّتِ مَرْدُم رَه دِيدَ، دِلْ شَى دَ حَالِي ازَوا سَوْخَتْ
چِراَكَهُ أُونَا رَقْم گُوسِپِندَوِي بَيْ چُوپُو سَرْگَرَدو وَ دَرْمَنَدَه بُودْ.
٣٧ اوَخْتَه دَ يَارَاي خُو گُفتْ: "حَاصِل كَلَو أَسْتَه، لِيكِنْ كَارَگَر
كم. ^{٣٨} اَمْزِي خَاطِر اَز صَاحِبِ حَاصِل خَاهِش كُنِيَّد كَه كَارَگَرَا رَه
بَلَدِه جَم كَدونِ حَاصِل خُو رَيَّي كُنهْ."

رَبِّيٍّ كَدوْنِ دوازدَه رَسُول

۱۰ عیسیٰ دوازده یار خُو ره کُوی کد و دَزوا اختیار-و-
قدرت دَد تا آرواح ناپاک ره بُر کُنه و هر مَرض و هر ناجوری
ره شفا بدیه.

۱۱ نام های دوازده رسول اینیا آسته: اوّل شِمعون مشهور د
پترس و بِرار شی آندریاس، یعقوب باچه زیدی و بِرار شی
یوحنا، فِیلیپس و بَرْتولما، توما و متّای مالیه‌گیر، یعقوب
باچه حَلفی و تَدَّی، شِمعون غَیرَتی و یهودای اسخَرِبُوطی که
یهودای اسخَرِبُوطی عیسیٰ ره دَگیر دَد.

۱۲ امی دوازده ره عیسیٰ رَبِّی کد و دَزیا نصِیحت کده گفت: "د
سرزمینای غَیر یهود نَرَوِید و دَهیچ کُدم از شارای سامِریا
داخل نَشَنِید، بلکِه دَپیش گوسپندوی گُم شُدِه قَوْمِ اسرائیل
بورِید. و دَحالِیکه مورِید، اعلان کده بُکِید که، پادشاهی
آسمو نزدِیک شُدَه. ناجورا ره شفا بدید، مُردها ره زِنَدَه
کُنِید، کولی گِرفته ها ره پاک کُنِید و جِنیات ره بُر کُنِید. مُفت
پَیدا کَدِید، مُفت بدِید. هیچ طِلّا یا نُقره یا سِکه مِسَى د
کمرَبَنَدَای خُو قد خُو نَرِید، و نَه ام خلطه بلِدَه راه یا دُو کالا

یا کوشره یا تیاق، چراکه کارگر حقدارِ خوراک-و-پوشاك خو
آسته.^{۱۱} د هر شار و آغیل که داخل مُوشید، یَگو آدم ره سُراغ
کُنید که لایق شُمو ره دشته بَشه، و د امونجی بُمنید تا
وختیکه امزُو جای بُر نَشَدید.^{۱۲} وختیکه د خانه داخل مُوشید،
سلام بُکِید.^{۱۳} اگه امُو خانه لایق شُمو ره دشت، بیلید که
سلام شُمو د سِر ازوا قرار بِگیره و اگه لایق شُمو ره نَدشت،
سلام شُمو پس د خودون شُمو مییه.^{۱۴} و اگه کس قد شُمو
خوشآمد نَکد و یا د تورای شُمو گوش نَدد، د وخت بُر شُدو
امزُو خانه یا شار خاکِ پایای خُو ره ٹک بِزنید.^{۱۵} ما حقیقت
ره دَز شُمو مُوگم، د روزِ قضاوت بَلده سرزمینِ سَدوم و عُموره
مجازات سُبُكتَر مُوشه نِسبت د امزُو شار.

“اینه، ما شُمو ره رقمِ گوسپندو د مینکلِ گُرگا رَیی مُونم.^{۱۶}
پس رقمِ مارها هُوشیار و رقمِ کوترا بے آزار بَشید.”

و از مردم احتیاط کُنید، چراکه اُونا شُمو ره د محکمه ها
تسلييم مُونه و د عِبادت خانه های خُو قد قَمچی مِیزَنه^{۱۷} و
شُمو بخارط ازمه د پیشِ والی ها و پادشايو کش مُوشید تا
بَلده ازوا و مردمای غَير يهود شاهدی بِدید.^{۱۸} مگم وختیکه
شُمو ره تسلييم مُونه، غَصّه نَكْنید که چې رقم توره بُکِید و یا

چې بُكِيد؛ چون د امزو غَيْت دَز شُمو گفته مُوشه که چې

بُكِيد،^{٢٠} چراکه توره‌گوی شُمو نِيستيد، بلکه روح آته آسمانى شُمو آسته که از طریق از شُمو توره مُوگه.[“]

برار، برار ره و آته، باچه ره دَ مرگ تسلیم مُونه؛ و^{٢١}
بچکیچا د روی آته و آبه خُو میخیزه و اونا ره د کُشتو میدیه.
از خاطرِ نامِ ازمه، تمامِ مردم از شُمو بد مُوبره، مگم هر^{٢٢}
کسی که تا آخر صَبر-و-حَوصله کُنه، نجات پیدا مُونه.[“]

وختیکه شُمو ره د یگ شار آزار-و-آذیت مُونه، د شار^{٢٣}
دیگه دوتا کنید. ما حِقيقة ره دَز شُمو مُوگم، پیش از آمدون
«باچه انسان» شُمو نَمِيتَنید د تمام شارای إسرائیل بورید.[“]

شاگرد از أُستاد خُو کده بالهتر نییه و نه ام غُلام از بادر^{٢٤}
خُو کده بالهتر آسته.^{٢٥} بلده شاگرد امیقس بس آسته که رقم
أُستاد خُو شُنه و غُلام رقم بادر خُو. اگه اونا کله خانه ره
«بعلزِبُول» گفت، پس چیقس کلوتر عیال خانه اُزو ره بد
مُوگیه.[“]

پس ترس نَخورید ازوا، چون هیچ چیزی نِیسته که پوشیده^{٢٦}

بَشَه و بَرْمَلَا نَشْنَه و هِيچ چِيزِي نِييَه كَه تاشه بَشَه و مَعْلُومَدار

نَشْنَه.^{٢٧} چِيزِي رَه كَه دَتْرِيَكِي دَزْ شُمو مُوْگُم، دَ روشنَيَيِ

بُكِيد و چِيزِي كَه دَگُوش شُمو گُفته شُد، از بَلِه باَم هَا إعلان

كُنِيد.^{٢٨} و از كَسَايِ كَه جِسم رَه مُوكُشَه، ولَسَ رَوح رَه كُشتَه

نَمِيتَه، ترس نَخُورِيد، بَلِكِه امْزُو ترس بُخُورِيد كَه مِيتَه اَم

روح و اَم جِسم رَه دَدوَنَخ نَابُودَ كَنه.^{٢٩} آيا دُو مُرغَك دَيَّگ

پَيسَه سَوَدا نَمُوشَه؟ باوجُودِ اَزِي، يَكِي ازوا اَم بِدُونِ خاست-و-

إرادِه آتِه آسمانِي شُمو دَزمِي نَمُوفَتَه.^{٣٠} و حتى تمامِ مُوي

هَايِ سر شُمو بَكِ شَي دَپِيشِ اَزُو حِساب شُدَه.^{٣١} پس ترس

نَخُورِيد، چُون أَرْزِشِ از شُمو بالهَتَر از هزاران مُرغَك أَستَه.“

”پس هر كَسِي كَه مَره دَپِيشِ مردمِ اِقرار كَنه، ما اَم او رَه دَ

حُضُورِ آتِه خُو كَه دَعَالِم بالهِ أَستَه، اِقرار مُونُم.^{٣٣} ليِكِن هر

كَسِي كَه مَره دَپِيشِ مردمِ انكار كَنه، ما اَم او رَه دَحُضُورِ آتِه

خُو كَه دَآسمَو أَستَه، انكار مُونُم.“

”گُمان نَكِينِيد كَه ما آمَديَم تا صُلح-و-آشتَى رَه دَزمِي بِيرُم.

ما نَمَديَم كَه صُلح-و-آشتَى رَه بِيرُم، بَلِكِه آمَديَم تا شمشير رَه

بِيرُم.^{٣٤} چُون ما آمَديَم تا باچَه رَه دَخِلافِ آتِه شَي، دُختَر رَه دَ

بِيرُم.^{٣٥} آبِه شَي، بِيرِي رَه دَخِلافِ خُسْرِمَادِر شَي قرار بِدِيَم^{٣٦} و

دُشمنون یېگ شخص، عيال خانه خود شى مۇشه. ”

”^{٣٧} هر کسى که آته يا آېھ خۇرە از مه کده گلۇتەر دوست داشتە
بىشە، لايق ازمە رە نَدرە و هر کسى که دُختىر يا باچە خۇرە
^{٣٨} ازمە کده گلۇتەر دوست داشتە بىشە، ام لايق ازمە رە نَدرە. و
هر کسى که صلیب خۇرە بالە نَكْنە و از پۇشت مە نَيىيە، لايق
ازمە رە نَدرە. ^{٣٩} هر کسى که دَ طلبِ جان خۇبىشە او رە از
دِست مِيدىيە و هر کسى که جان خۇرە بخاطر ازمە از دِست
پِدېيە، او رە دَ دِست میرە. ”

”^{٤٠} هر کسى که شۇمو رە قبۇل كُنە، مَرە قبۇل كده و هر کسى
کە مَرە قبۇل كُنە، امُو رە قبۇل كده کە مَرە رَىيى كده. ^{٤١} هر
كسى کە يېگ پىغمبر رە دَ عنوانِ پىغمبر قبۇل كُنە، آجر يېگ
پىغمبر رە دَ دِست میرە و هر کسى کە يېگ آدم عادِل رە دَ
عنوانِ يېگ آدم عادِل قبۇل كُنە، آجر يېگ آدم عادِل رە دَ دِست
میرە. ^{٤٢} هر کسى کە حتى يېگ پىلە آويَخ دَ يىكى امزى آدمائى
رېزە دَ عنوانِ يار ازمە بِدېيە کە وُچى كُنە، ما حقيقة رە دَز
شۇمو مۇڭم كە او بىس آجر نَمۇمنە. ”

سوالِ یحییٰ از عیسیٰ

۱۱ وختیکه عیسیٰ از هدایت دَدوَ دَدوازده یار خُو خلاص
شُد، او از اونجی رَبی شُد تا دَشارای ازوا تعليِم ېدیه و
موعظه کُنه.

۲ وختی یحییٰ دَبندي خانه دَباره کارای مسيح شنید، او دُو نفر
از پيرواي خُوره رَبی کد تا ازو پُرسان کُنه، "آيا تُو امو کس
استی که آمدنی يه، يا مو چيم دَراه کُدم کسِ دِيگه بشی؟"
۳ عیسیٰ دَ جوابِ ازوا گفت: "بورید، چيزای ره که میشنوید و
مینگرید دَ یحییٰ خبر بَدید؛ دَزو بُگید که کورا بینا مُوشہ،
لَنگا راه موره و کولي گرفته ها پاک مُوشہ، کَرها شِنوا
مُوشہ، مُرده ها دُوباره زِنده مُوشہ و دَغريبا خوشخبری دَده
مُوشہ. ۴ نیک دَ بختِ کسی که از مه دلخور نَشنه."

۵ وختیکه پيرواي یحییٰ مورفت، عیسیٰ قد جمعیتِ مردم دَباره
یحییٰ دَ گپ زَدو شُد و گفت: "بَلِدِه توخ کدون چيزخیل دَ بیابو
رفتید؟ بَلِدِه توخ کدون یگ نَی که از باد میلَرَزه؟ ۶ خَی بَلِدِه
توخ کدون چيزخیل رفتید؟ بَلِدِه دیدون آدمی که کالاي
أَبْرِيشْمِي دَ جان شی أَسته؟ اونه، کسای که کالاي أَبْرِيشْمِي

مُوبوشه جای شی دَ قصر های پادشايو آسته.^۹ پس بَلِدِه دِيدون
چيزخيل بُرو رفتید؟ بَلِدِه دِيدون يگ پيغمبر؟ آرے، ما دَز شُمو
مُوگم که يحيى از پيغمبر کده بُزرگتر آسته.^{۱۰} يحيى امُو کسى
آسته که دَ باره شى نوشتنه شده:

‘اينه، ما رسُول خُو ره پيشلون تُو رَيى مُونم’

‘تا راه تُو ره پيش رُوى تُو آماده كُنه.’

۱۱ ما حقيقت ره دَز شُمو مُوگم: دَ مينكلِ کسای که از خاتونو
زَيده شده، هيچ کس از يحيى تعميد دِهنده کده بُزرگتر نَمَدَه؛
ولَئِ ريزه تَرين شخص دَ پادشاهي آسمو ازو کده بُزرگتر آسته.
۱۲ از زمانِ يحيى تعميد دِهنده تا آلى ره پادشاهي آسمو از
جَبر-و-سِتم رَنح بُرده و مردمای زورآور کوشش مُونه که دَ زور
دَزُو دِستَرسِي پيدا كُنه.^{۱۳} چون تمامِ آنبيا و تورات تا ظهورِ
يحيى پيشگويي کده^{۱۴} و اگه شُمو ميخاهيد قبول کُنيد، يحيى
امُو إيلاس آسته که آمدَنى بُود.^{۱۵} هر کسى که گوشِ شِنوا دَره
گوش بِكِيره.

۱۶ اي نسل ره قد چيزخيل برابر كُنم؟ اميَا رقم بچكِيچاي آسته

که دَ بازار ها شِشته و يگدیگه خُوره کُوي کده ^{۱۷} مُوگیه:

بَلِدِه شُمو سُرنَى زَدى، شُمو بازى نَكَدِيد

و نَوْهه خاندی، شُمو ماتم نَكَدِيد.

^{۱۸} چون يحيیا که آمده، او نه مُوخوره و نه وُچی مُونه، اونا
مُوگیه که ^{۱۹} او جن دره. «باچه إنسان» که آمده، ام مُوخوره
و ام وُچی مُونه؛ مردم مُوگیه: 'اونه، او آدم پُرخور و شرابی و
رفیق مالیه‌گیرا و گناهکارا آسته!' ولے حِكمت دَ وسیله اعمال
خُور حق ثابت مُوشه.

واي دَ حالِ شاراي که توبه نَمُونه

^{۲۰} اوخته عيسی شروع دَ ملامت کدون شاراي کد که کلونی
معجزای شي دَ امزُو شارا ظاهِر شُدد، چراکه اونا توبه نَکُدد.
^{۲۱} او گفت: "واي دَ حال تُو، آي خورَزین! و واي دَ حال تُو،
آي بَيت صَيدا! چون معجزای که دَ مَنه از شُمو ظاهِر شُد، اگه

دَ صُور و صَيدون ظاهِر مُوشُد، اونا غَدر وخت پیش پلاس
^{۲۲} مُوپوشید و دَ خَگِشتِر شِشته توبه مُوكد. مَگم ما دَز شُمو

مُوگُم، دَ روزِ قضاوت بَلِدِه صُور و صَيِدون مَجازات سُبُكَتَر
مُوشَه نِسْبَت دَز شُمو. ^{۲۳} و تُو، آیِ كَفْرَنَاحُوم، آيَا تَا آسمو سر
تُو بِلَند مُوشَه؟ نَه، تُو دَ قَارِ عَالِمِ مُرْدَه هَا سِرِنَگُون مُوشَى،
چُون مُعْجَزَى كَه دَ مَنِه ازْتُو ظَاهِرِ شُد، اَكَه دَ سَدُوم ظَاهِر
مُوشَد، اَمُو شَار تَا إِمْرَوْزِ باقِي مُومَنَد. ^{۲۴} مَكَمِ ما دَز تُو مُوگُم،
دَ روزِ قضاوت بَلِدِه سِرِزِمِينِ سَدُوم مَجازات سُبُكَتَر مُوشَه
نِسْبَت دَز تُو.

آسُودَگَى از زِيرِ بَار و زَحْمَتِ كَشَى

دَ امْرُو غَيْتِ عِيسَى دُعا كَدَه گُفت: "آيِ آته، صَاحِبِ آسمو
و زَمِى، ازْتُو شُكْرَگَزارِي مُونُم كَه إِي چِيزا رَه از آدمَى دَانَا و
هُوشِيار تاشَه كَدَه و بَلِدِه بِچِكِيچَايِ رِيزَه بَرَمَلا كَدَه.
آرَه، آيِ آته، چُون خاست-و-إِرادَه ازْتُو امى بُود. ^{۲۶}

آته مَه تمامِ چِيزا رَه دَز مَه تسلِيمِ كَدَه؛ هِيجِ كَس باچَه رَه
نَمِينَخَشَه بَغَيْرِ از آته و امى رقمِ آته رَه ام هِيجِ كَس نَمِينَخَشَه
بَغَيْرِ از باچَه و كَسَايِ كَه باچَه بِخَايَه دَزوا بَرَمَلا كُنه. ^{۲۷} آيِ
تمامِ كَسَايِ كَه دَ زَحْمَت و زِيرِ بَارِ گِرنَگِ أَسْتَيِيد، پِيشِ ازْمَه
بِيِيدِ و ما دَز شُمو آرامِيش مِيدُم. ^{۲۹} يُوغِ ازْمَه رَه دَ گَرْدُون خُو

بیلید و از مه تعلييم بگيريد، چراكه ما حلیم و نرمدیل آستم و
شمو د جان های خو آرامش پیدا مونید، چراكه بُردون یوغ^{۳۰}
ازمه آسو و بار ازمه سُبک آسته.”

سوال د باره روز آرام

۱۲ د امزو زمان عيسى د روز آرام از منه کشت های
گندم تیر موشد و ياراي شى ازى كه گشنه بود، شروع د کندو
و خوردون خوشه های گندم کد. مگم وختيکه فريسيما اي کار
ره هوش کد، اونا دزو گفت: ”اونه، ياراي تو کاري ره انجام
ميديه که د روز آرام روا نيسته.“ ^{۳۱} عيسى دزوا گفت: ”آيا
شمو نخانديد که داود چيز کار کد وختيکه خود شى و رفيقاي
شى گشنه بود؟ ^{۳۲} او د خانه خدا داخل شده نان تقديم شده ره
خورد که خوردون شى بلده ازو و رفيقاي شى روا نبود، بلکه
تنها بلده پيشوايو روا بود. ^{۳۳} يا د تورات نخانديد که د روز آرام
پيشوايو د خانه خدا حرمت روز آرام ره نگاه نمouكne، ولے باز
ام بے گناه آسته؟ ^{۳۴} مگم ما دز شمو موگم، يگو کس بزرگتر از
خانه خدا د اينجy آسته. ^{۳۵} اگه معنای امزى توره ره پې
موبورديد: ’ما رحمت ميخايم، نه قرباني، شمو نفrai بيگناه

ره مَحْكُوم نَمُوكِدِيد، ^١چُون «بَاجِه إِنْسَان» صَاحِبِ رَوْزِ آرَام
أَسْتَه. ^٢

عِيسَى اَزُونجِي رَفَت وَدَ عِبَادَت خَانِه اَزوَا دَاخِل شُدَّه ^٣ يَگ
آدَم رَه دِيدَ كَه يَگ دِسْت شَى خُشَك شُدَّد. وَأُونَا اَز عِيسَى
پُرْسَان كَدَه گُفت: «آيَا شَفَا دَدُو دَ رَوْزِ آرَام رَوا أَسْتَه يَا نَه؟»
أُونَا إِي رَه گُفت تَا او رَه مَلَامَت كُنَه. ^٤عِيسَى دَزَوا گُفت:
«اَگَه كَدَم اَزْشُمَو يَگ گُوسِپُو دَشَتَه بَشِيد وَأُو دَ رَوْزِ آرَام دَ
يَگ چُقُورِي بُفَتَه، آيَا او رَه گِرْفَتَه اَزُونجِي بُر نَمُوكِنِيد؟» ^٥پَس
إِنْسَان اَز گُوسِپُو كَدَه چِيقَس بَاَرِزِشَتَر أَسْتَه؛ او بَايدَ كُومَك
شُنَه. اَمْزِي خاطِر انْجَام دَدُونِ كَارَاي نِيك دَ رَوْزِ آرَام رَوا
أَسْتَه. ^٦اوْختَه دَ اَمْزُو آدَم گُفت: «دِسْت خُو رَه دِراز كُو.»
او دِرازَ كَد وَدِسْت شَى رقمِ دِسْت دِيَگِه شَى وَرَى جُور شُدَّ.
^٧مَكْمُون فَرِيسِيَا بُرُو رَفَت وَدَ ضِيد اَزُو نَقْشَه كَشِيدَ كَه چَى رقم
او رَه نَابُود كُنَه.

خِدمَتَگَارِ إِنتِخَاب شُدِّه خُدا

وَخْتَى عِيسَى اَمْزِي نَقْشَه خَبَر شُدَّ، او اَزُونجِي رَفَت. مَكْمُون
يَگ جَمْعِيَتِ كَنَه اَز پُشْتِ اَزُو رَيَى شُدَّ وَأُو پَگ اَزوَا رَه شَفَا

۱۶ دَد وَذَوَا أَمْرَ كَد كَهُ او رَه بَرْمَلَا نَكْنَه ^{۱۷} تَا چِيزِي كَه دَ

و سِيلِه اشعيای نَبَى گُفْتَه شُدُّد، پُورَه شُنَه:

۱۸ "اينَمِي خِدمَتَگَار مَه آسَتَه كَه او رَه اِنتِخَاب كَديَم

و دَوْسَت دَشْتَنَى مَه كَه جَان مَه از شَى خَوش-و-راضِي
آسَتَه.

ما روح خُورَه دَبَلَه ازُو قَرَار مِيدِيَم

و او عَدَالَت رَه دَمِلَت هَاي غَيرِ يَهُود اِعلَان مُوكَنَه.

۱۹ او جَنْجَال نَمُونَه وَنَه اَم شَر-و-شُور مُوكَنَه،

وَنَه اَم آواز ازُو رَه كَس دَكَوْچَه هَا مِيشَنَوه.

۲۰ او نَه جَغْزِي شُدَه رَه مَيَدَه نَمُونَه

وَنَه اَم پَلِته نِيم سوختَه رَه گُل مُوكَنَه

تا وَختِيكَه عَدَالَت رَه دَپِيرَوزِي بِرسَنه.

۲۱ و دَ نَامِ اُزُو مِلَّتِ هَائِي غَيْرِ يَهُودِ أَمِيدَوَارِ أَسْتَهِ.

عیسیٰ و بَعْلَزِبُولِ یعنی رئیسِ جنیات

۲۲ اوخته اونا یگ آدم چندی ره دَ پیشِ اُزُو اُورد که کور و

گُنگه بُود و عیسیٰ او ره شفا دَد، بطوری که امو گُنگه تَبَسَّت

۲۳ توره بُگیه و بِنَگَرَه. و تمامِ مردُم حَيْرَوَ مَنَدَه گفت: "آیا امی

۲۴ آدم باِچه داُووَد نَبِيَّه؟" مَكْمَ و خَتِيكَه فَرِيسِيا إِي توره ره

۲۵ شِنِيد، اونا گفت: "إِي نَفَرِ جِنِيَّاتِ رَه بُرْ كَدَه نَمِيتَنَه اَكَه دَ

کومَكِ بَعْلَزِبُولِ سَرِدِسَتِهِ جِنِيَّاتِ نَبَشَه." عیسیٰ فِكْرَاهِ ازوا

۲۶ ره پَيِّ بُرد و دَزَوا گفت: "هَرِ مَمْلَكَةَ كَه دَ ضِدِ خَوْدِ خُو تَقْسِيم

تقسِيم شُنَه، بِيرَوِ مُوشَه و هَرِ شَارِ يَا خَانِه کَه دَ ضِدِ خَوْدِ خُو

تقسِيم تقسِيم شُنَه، أَسْتَوارِ نَمُومَه. ۲۷ اَكَه شَيْطَو، شَيْطَو ره بُرْ

کُنه، او دَ ضِدِ خَوْدِ خُو تقسِيم تقسِيم شُدَه؛ پس پادشاھی شی

۲۸ چَطُورِ برقرارِ مُومَه؟ و اَكَه ما دَ وسِيلَه بَعْلَزِبُولِ جِنِيَّاتِ رَه

بُرْ مُونُمْ، پَيَرَوَاهِ ازْشَمُو دَ وسِيلَه چِيزِ خَيْلِ اُونا ره بُرْ مُونَه؟

امزی خاطر، اُونا دَ بَلَه شُمُو قضاوتِ مُوكَنَه. ۲۹ لِيَكِنْ اَكَه ما دَ

وسِيلَه روحِ خُدا جِنِيَّاتِ رَه بُرْ مُونُمْ، بِدَنِيد کَه پادشاھی خُدا دَ

۳۰ بَيْنِ شُمُو اَمَدَه. ۳۱ يَا چَطُورِ يَگِ نَفَرِ مِيتَنَه کَه دَ خَانِه يَگِ آدمِ

زورَتُو دَاخِلِ شُنَه و مَالِهَاهِ شی ره غَارَتِ کُنه، بِدُونِ ازِی کَه

اوْل امُو آدمِ زورتُو ره بسته کُنه؟ ولے بعد اُز میته خانه شی
ره غارت کُنه.^{۳۰} هر کسی که قد ازمه نییه، دَضِد مه آسته و
هر کسی که قد ازمه جم نَمُوكُنه، او تیتپَرَک مُونه.

امزی خاطر دَز شُمو مُوگُم، انسان هر رقم گناه و کفرگویی
که کُنه، میتنه بخشیده شُنه، مگم کفرگویی دَضِد روح الْقُدْس
بخشیده نَمُوشة.^{۳۱} و هر کسی که دَضِد «باقِه انسان» توره
بُگیه، بخشیده مُوشة، مگم کسی که دَضِد روح الْقُدْس توره
بُگیه، او بخشیده نَمُوشة، نَه دِای دُنیا و نَه دِدنیای که
آمدَنی يَه.

اگه درخت ره خُوب کاله کُنید، او میوه خُوب میدیه و اگه
درخت ره خراب کاله کُنید، او میوه خراب میدیه، چون درخت
از میوه خُو شِنَخته مُوشة.^{۳۲} آی اولادای تیرمار، چطور میتنید
چیزای خُوب بُگید، دَحالیکه شریر آستید؟ چون دان انسان از
چیزی که دَدِل انسان پَریمو آسته، توره مُوگیه.^{۳۳} آدم خُوب از
خزانه خُوب دِل خُو چیزای خُوب بُر مُونه و آدم شریر از خزانه
بد خُو چیزای بد بُر مُونه.^{۳۴} مگم ما دَز شُمو مُوگُم که مردم
بلدِه هر توره پُوچ-و-ناسنِجیده که مُوگیه، دَروز قضاوت باید
حساب بِدیه؛^{۳۵} چون از خاطرِ تورای خُو عادل حساب مُوشی و

از خاطرِ تورای خُو مُحکوم مُوشی.

عالِمای یهود و فَرِيسِیا مُعجزه طلب مُونه

^{۳۸} اوخته يگ تعداد از عالِمای دین و فَرِيسِیا دَزو گفت: "آی

^{۳۹} أُستاد، مو میخاهی که از تُو يگ مُعجزه بِنگری. " او د

جوابِ ازوا گفت: "نسل شریر و زِناکار مُعجزه طلب مُونه!

مگم هیچ مُعجزه دَزوا نِشو دَده نَمُوشہ بَغیر از مُعجزه یونس

^{۴۰} پیغمبر. چون امُو رقم که یونس سِه شاو و سِه روز دَکَورِه

ماهی مَند، «باقِه انسان» ام سِه شاو و سِه روز دَکَورِه زمی

^{۴۱} مُومَنه. دَروزِ قضاوت مردم نینوا قد امزی نسل ایسته

مُوشہ و ای نسل ره مُحکوم مُونه، چراکه مردم او زمان بخاطر

موعِظِه یونس توبه کد. و آلی يَگو کس بُزرگتر از یونس د

^{۴۲} اینجی اَسته. ملِکِه جنوب دَروزِ قضاوت قد امزی نسل باله

مُوشہ و امیا ره مُحکوم مُونه، چون او از دُورتَرین منطقه دُنیا

آمد تا حِکمتِ سُلیمان ره گوش بِگیره، و آلی يَگو کس بُزرگتر

از سُلیمان دَ اینجی اَسته.

^{۴۳} وختیکه روحِ ناپاک از يگ آدم بُر مُوشہ بَلِدِه آرام گِرفتو د

^{۴۴} جای های خُشک موره، مگم پیدا نَمیتنه. اوخته او مُوگیه،

پس دَخانِه خُو مورُم، امزُو جای که آمدُم. ^{۴۴} وختیکه پس

مییه، او امو خانه ره خالی، جارُو شده و مُنَظَّم مینگره.

اوخته او رفته هفت روح دیگه ره قد خُو میره که بَدَتَر از ^{۴۵} خود شی یه و اونا دَأونجی داخل شده جای-دَجای مُوشه؛ و آخرِ کار حالت امزُو نفر بَدَتَر از اوّل شی مُوشه. عَيْنِ چیز قد امزی نسلِ شرِیر ام مُوشه.

آبه و بِرارونِ عیسیٰ

دَحَالِیکه عیسیٰ هنوز قد امزُو جمعیت توره مُوگفت، آبه ^{۴۶} شی و بِرارون شی دُبُرو ایسته بُود و میخاست که قد شی توره بُگیه. ^{۴۷} یگ نفر آمده دَزشی گفت: "اونه، آبه تو و بِرارون تو دُبُرو ایسته یه و میخایه که قد تُو توره بُگیه." ^{۴۸} مگم کسی که امی ره گُفتَد عیسیٰ دَجواب شی گفت: "آبه مه کی استه و بِرارون مه کی یه؟" ^{۴۹} و دِست خُو ره سُون یارای خُو دراز کده گفت: "اینیا آبه مه و بِرارون مه اَسته. ^{۵۰} چون هر کسی که خاست-و-ارادِه آته مَره که دَآسمو اَسته دَجای بیره، اوَنمُو بِرار و خوار و آبه مه اَسته."

۱۳ د امْزُو روز عیسیٰ از خانه بُرو رفت و د لبِ دریا
شِشت. ۲ جمعیتِ کله دَ دورِ اُزو جم شُد، دَ اندازه که او د یگ
کِشتنی سوار شُده شِست و پِگِ مردم د لبِ دریا ایسته شُد.

۳ اوخته عیسیٰ چیزای کلو ره دَ مَثَل دَزوا بیان کده گفت: ”
یگ روز یگ دیغو بَلِدِه تُخُم زَدو بُرو رفت. ۴ دَ حالِیکه تُخُم ره
پاش مِیدَد، یگ مِقدار شی دَ راه اُفتَد و مُرَغَکو آمدَه اُونا ره
خورد. ۵ یگ مِقدارِ دِیگِه شی دَ زمِینِ سنگلاخ اُفتَد، دَ جایی
که خاکِ کلو نَدَشت؛ اُونا دَ زُودی سَوز کد، چراکه خاک غَوْج
نَبُود. ۶ مَگم وختِیکه آفتو بُر شُد اُونا سوخت و ازی که ریشه
نَدَشت خُشک شُد. ۷ یگ مِقدار شی دَ مِینکلِ خارا اُفتَد و خارا
کله شُده اُونا ره قَپَه کد. ۸ مَگم یگ مِقدارِ دِیگِه شی دَ زمِینِ
خُوب اُفتَد و ثَمر دَد؛ یَکَگون شی صد برابر، یَکَگون شی شصت
برابر و یَکَگون شی سی برابر. ۹ هر کسی که گوشِ شِنَوا دَره
گوشِ بِگِیره.“

۱۰ اوخته یارای شی دَ پیشِ اُزو آمدَه اُزو پُرسان کد: ”چرا قد
ازوا دَ مَثَل توره مُوگَی؟“ ۱۱ او دَ جوابِ ازوا گفت: ”پَیَ

بُردونِ راز های پادشاهی آسمو بَلِدِه شُمو بخشیده شُده، مگم
دَزوا بخشیده نَشُده، ^{۱۲} چُون کسی که دَره، دَزو کلوَرَ دَده
مُوشه تا پَرِيمو دَشته بشه، مگم کسی که نَدره، حتی امو
چیزی ره که دَره ام از شی گِرفته مُوشه. ^{۱۳} امزی خاطر قد ازوا
دَ مثل توره مُوكیم، چراکه اُونا توخ مُونه، ولے نَمینگره و
گوش مِیگیره ولے نَمیشنوه و پَی نَموبره. ^{۱۴} دَ باره ازوا
پیشگویی اشعیا نَبی پُوره مُوشه که مُوگیه:

شُمو شِنیده مورید، مگم هرگز پَی نَمُوفتید،

دوامدار توخ مُونید، ولے هرگز نَمینگرید،

^{۱۵} چُون دِل امزی قَوم سخت شُده

و گوشای شی گِرنگ شُده

و چیمای خُوره پُوث گِرفته؛

نَشنه که قد چیمای خُوبِنگره

و قد گوشای خُوبِشنوه

و قد دل‌های خوپی بُبره

و پس تاو بُخوره و ما اونا ره شفا بِدیم. ”

“^{۱۶} مگم نیک دَ بَختِ چیمای شُمو که مینگره و گوشای شُمو
که میشنوه. ^{۱۷} ما حقيقة ره دز شُمو مُوگم، غَدر پیغمبرا و
آدمای عادل آرزو داشت که چیزی ره که شُمو مینگرید، بِنگره،
ولے ندید و چیزی ره که شُمو میشندید، بِشنوه، مگم
نَشِنید. ”

“^{۱۸} پس معنای مَثَلِ دیغو ره بِشنود: ^{۱۹} وختیکه یگو کس
کلام پادشاهی آسمو ره میشنوه و او ره نَمُوفامه، شریر مبیه و
چیزی ره که دَ دِلِ اُزو کِشت شُده، دُزی مُونه. ای تُخمي آسته
که دَ راه کِشت شُد. ^{۲۰} تُخمي که دَ زمِین سنگلاخ کِشت شُد،
کسی آسته که کلام ره میشنوه و فوری او ره دَ خوشی قبول
مُونه. ^{۲۱} ولے ازی که از خود ریشه نَدره، فقط بلدِه یگ مُدتِ
کوتاه دَوام مُونه و غَیتیکه مُشكِلات و آزار-و-آذیت بخاطرِ
کلام پیش مبیه، دِستی از راه بُر مُوشه. ^{۲۲} تُخمي که دَ بَینِ
خارا افتَد، کسی آسته که کلام ره میشنوه، لیکن تشویشِ دُنیا
و عِشقِ مال-و-دولت کلام ره قَبَه مُونه و او بَیْثَمَر مُومنه.

۲۳ مگم تُخمى که دَ زمِينِ خُوب اُفتَد كسى أَسْتَه كه كلام ره
ميشنوه و او ره مُوفاشه و پُرثمر شده يَكُون شى صد، يَكُون
شى شصت و يَكُون شى سى برابر ثمر مِيديه.

مَثَلٌ عَلْفٍ بِيَكَارَه

۲۴ عيسىٰ يَكَارَه مَثَلٌ دِيَكَه ره آُورده دَزَوا گُفت: "پادشاهى آسمو
رقمٰ كسى أَسْتَه كه دَ زمِينِ خُوب تُخِم خُوب پاش دَد؛" مگم
وختىكه مردم دَ خاو بُود، دُشمو آمَدَه دَ مَنِه كِشتِ گندُم تُخِم
علفٍ بِيَكَارَه ره پاش دَد و رفت. ۲۵ و غَيْتَيْكَه گندُم سَوز كده
خوشَه كد، علفٍ بِيَكَارَه ام بُر شُد. ۲۶ اوخته غُلامَيِ صاحِبٰ
زمى دَ پِيش شى آمَد و گُفت: 'صاحب، آيا تُو تُخِم خُوب دَ
زمِينِ خُوب پاش نَدَدَه بُودى؟ پس إِي علفَهای بِيَكَارَه از كُجا
شُدَه؟' ۲۷ او دَ جوابِ ازوا گُفت: 'إِي كارِ دُشمو أَسْتَه. ' غُلاما
دَزَو گُفت: 'آيا ميَخاهى كه مو بوري و أونا ره جم كُنى؟'
ليكن او گُفت: 'نَه، نَشْنَه كه دَ وختِ پُوجى كدونِ علفٍ
های بِيَكَارَه گندُم ره ام قد ازوا از رِيشه بِكَنِيد. ۲۸ بِيلِيد كه تا
وختِ دِرَو هر دُوى شى يَكُجَاي رُشد كُنه، بسَه دَ وختِ دِرَو، ما
دِرَوگرا مُوگم كه اوَّل علفَهای بِيَكَارَه ره جم كده قَوْدَه كُنه
تا سوختنَه شُنَه و بعد ازو گندُم ره جم كده دَ دَخانَه مه

”ذِخِيرَهُ كُنِيدَ.

مَثَلٌ تُخْمِ شَرَشَم

۳۱ عیسیٰ یگ مَثَلٌ دِیگه اُورده دَزوا گُفت: ”پادشاهی آسمو رقمِ تُخْمِ شَرَشَم آسته که یگ آدم گِرفته دَ زمین خُو کِشت کد.
۳۲ اگرچه از تمامِ تُخْمِ ها کده ریزه‌تر آسته، ولے غَیتیکه رُشد مُونه از تمامِ بُوٹه ها-و-سَوزی جات کده کله‌تر مُوشہ و رقمِ یگ درخت جور مُوشہ، دَ اندازه که مُرغَکوی هَوا مییه و دَ شاخچه های شی وور جور مُونه.“

۳۳ عیسیٰ یگ مَثَلٌ دِیگه اُورده دَزوا گُفت: ”پادشاهی آسمو رقمِ خمیرمایه آسته که یگ خاتُو او ره گِرفت و قد سِه کاسه آرد گَٹ کد تا تمامِ خمیر رسید.“ ۳۴ عیسیٰ تمامِ ازی چیزا ره دَ مَثَلٌ دَ امزُو جمعیت گُفت و بِدونِ مَثَلٌ هیچ چیز دَزوا نَگفت تا چیزی که دَ وسِیله پیغمبر گُفتہ شُدد، پُوره شُنه:

”ما دان خُو ره بَلِدِه مَثَلٌ گُفتو واز مُونم،

ما چیزای ره مُوگُم که از شُروع دُنیا پوشیده مَنده.“

تشریح مَثَلِ عَلْفِ هَای بیکاره

بعد اُزو عیسیٰ جمعیت ره رُخَصَت کد و دَ داَخِلِ خانه رفت
و یارای شی دَ پیشِ اُزو آمده گفت: "مَثَلِ عَلْفِ هَای بیکاره^{۳۶}
زمی ره دَز مو تشریح کُو." ^{۳۷} او دَ جوابِ ازوا گفت: "کسی
که تُخِمِ خُوب ره کِشت مُونه، «باقِهِ انسان» آسته.^{۳۸} و زمی،
امی دُنیا آسته و تُخِمِ خُوب بچکیچای پادشاهی آسمو؛ عَلْفِ
هَای بیکاره اولادای امزُو شریر آسته؛^{۳۹} و دُشمنی که اونا ره
کِشت کد، ابِلیس آسته. و فصلِ دِرَو آخر زمان آسته و دِرَوْگَرَا
پلایکه ها یه.^{۴۰} پس امُو رقم که عَلْفِ هَای بیکاره جَمِ مُوشَه
و دَ آتِش دَر دَدَه مُوشَه، دَ آخر زمان ام امُو رقم مُوشَه.
«باقِهِ انسان» ملایکه های خُو ره رَبِی مُونه و اونا پَگِ^{۴۱}
گُمراه کُننده ها و تمام بدکارا ره از پادشاهی شی جَمِ مُوكَنَه
و دَ کورِه آتِش پورته مُونه، دَ جایی که چخرا و دَندو خَیی^{۴۲}
آسته.^{۴۳} اوخته آدمای عادِل دَ پادشاهی آته آسمانی خُو رقمِ
آفتَو روشنی میدیه. هر کسی که گوشِ شِنَوا دَرَه، گوش
بِگِیره.^{۴۴}

مَثَلٌ گَنجِ تاشه شُدَه

پادشاهی آسمو رقمِ گنجی تاشه شُدَه دَيگ زمی أسته که
يگ آدم او ره پیدا کده بسم تاشه مُونه؛ اوخته از خوشی ازو
رفته هرچیزی که دَره سَودا مُونه و آمدَه امُو زمی ره میخَرَه.

بسَم، پادشاهی آسمو رقمِ تُجاري أسته که دَ طلبِ مُرواري
های نُورَنَد أسته؛ ^{٤٦} و غَيْتِيکه يگ مُرواري قِيمَتَبَای ره پیدا
کد، او رفته تمامِ مال-و-مُلک خُو ره سَودا کد و امُو مُرواري
ره خَرِيد.

مَثَلٌ جَالِهَايِ ماھي گَيرِي

امْچُنان پادشاهی آسمو رقمِ يگ جَالِ ماھي گَيرِي أسته که دَ
دریا آندخته شُد و ماھيَای رقمِ رقمِ دَ مَنه شَى جَم شُدَه.
^{٤٧}
و خَتِيکه جَال پُر شُد، اونا او ره دَ لَبِ-دریا كَشِيد و بعد ازو
شِشته ماھيَای خُوب ره دَ سَبَدَها جَم کد، ولے ماھيَای بَد ره
^{٤٨}
دُور پورته کد. ^{٤٩} دَ آخرِ زمان ام امِي رقمِ مُوشَه: ملايکه ها
ميَيه و بدکارا ره از مردمَاي عادِل جدا مُونه ^{٥٠} و اونا ره دَ
كورِه آتشِ پورته مُونه، دَ جايى که چخرا و دَندو-خَيَى أسته.

۵۱ آیا تمام امزی تورا ره پې بُردید؟ ”أونا د جواب شی گفت:
۵۲ ”آرے“ عیسیٰ دزوا گفت: ”امزی خاطر، هر عالم دین که د
باره پادشاهی آسمو تعلييم دده شدہ بشه، او رقم صاحب خانه
آسته که از خزانه خو چیزای نو و کھنه بُرمونه.“

مردم ناصره عیسیٰ ره رد مُوکنہ

۵۳ وختی عیسیٰ گفتون امزی مثل ها ره خلاص کد، او ازونجی
رئی شد. ۵۴ و غیتیکه د منطقه خود خو رسید، او مردم ره د
عبادت خانه ازوا تعلييم دد، بطوری که اونا حیرو مَنده گفت:
”ای آدم امی حِکمت و امی قدرت مُعجزه ها ره از کجا کده؟
۵۵ آیا امی آدم باچه نجار نیسته؟ آیا نام آیه شی مریم نییه؟ آیا
يعقوب، یوسف، شِمعون و یهودا برaron شی نیسته؟ ۵۶ و پگ
خوارون شی د اینجی قد ازمو نییه؟ پس تمام امزی چیزا ره
ای آدم از کجا یاد گرفته؟“ ۵۷ و اونا قد ازو مُخالفت کد. مگم
عیسیٰ دزوا گفت: ”د یگ پیغمبر د هیچ جای بے احترامی
نموشه، جُز د منطقه و خانه خود شی.“ ۵۸ و او بخاطر
بے ایمانی ازوا مُعجزه های کلو د اونجی انعام نداد.

١٤

دَ امْزُو زَمَانِ هِيرُودِيسِ حُكْمَرَانِ خَبَرَهَا رَهَ دَ بَارِهِ
عِيسَى شِنِيدَ وَ دَ خِدْمَتَگَارَاهِ خُو گَفتَ: "إِي يَحْيَايِ تَعْمِيدِ
دِهْنَدَهَ أَسْتَهَ؛ إِي ازْ مُرَدَهَا دُوبَارَهِ زِنَدَهَ شُدَهَ وَ امْزَى خَاطِرَ إِي
مُعْجَزَهَا دَ وَسِيلَهِ ازْوَ ظَاهِرَ مُوشَهَ."^٢

چُونِ هِيرُودِيسِ بَخَاطِرِ هِيرُودِيَا خَاتُونِ بِرَارِ خُو فِيلِيپِيسِ، يَحْيَايِ
رَهَ كِرْفَتَارَ كَدَهَ بَسْتَهَ كَدَدَ وَ دَ بَنَدَيِ خَانَهَ آنَدَخْتَدَ،^٣ چَراَكَهِ يَحْيَايِ
دَزُو مُوكَفتَ: "بَلَدِهِ تُو رَوا نِيهَ كَهَ امِي خَاتُو رَهِ بِكِيرَى."^٤
اَكَرْجَهَ اوْ مِيَخَاستَ كَهَ يَحْيَايِ رَهِ بُكْشَهَ، مِكَمَ ازْ جَمِيعَتِ مَرْدُمَ^٥
تَرسَ خَورَدَ، چَراَكَهَ اُونَا اوْ رَهِ بَحَيَثِ يَكَ پَيَغَمَبرِ مِينَخَشِيدَ.

لِيَكِنِ وَختِيكَهِ جَشَنِ سَالِكِيرَهِ هِيرُودِيسِ رسِيدَ، دُخَنَرِ هِيرُودِيَا دَ
مَنِهِ مَجِلسِ رَقْصَ كَدَ وَ هِيرُودِيسِ رَهِ خَوْشَحَالَ كَدَ،^٦ دَ انْدازَهِ
كَهَ اوْ قَسَمَ خَورَدَهَ وَعَدَهَ كَدَ هَرِ چِيزَى كَهَ اوْ طَلَبَ كُنَهَ بَلَدِهِ ازْوَ
مِيدِيهَ.^٧ وَ اوْ دَ پَنَدِ آبِهِ خُو گَفتَ: "سِرِ يَحْيَايِ تَعْمِيدِ دِهْنَدَهَ رَهَ
دَ اَمِينَجَى دَ يَكَ پَطْنُوسَ دَزَ مَهِ بِدَى."^٨ اوْختَهِ پَادِشاَهِ عَمَّكَى
شُدَهَ، ولَسَهِ ازِى كَهَ قَسَمَ خَورَدَهَ بُودَ وَ امِ بَخَاطِرِ مِهْمَونَاهِ خُو
أَمَرَ كَدَ كَهَ سِرِ يَحْيَايِ رَهِ دَزُو بِدَى.^٩ پَسَ اوْ نَفَرَ زَبَى كَدَ وَ سِرِ

یحییٰ ره دَ بَنْدِی خانه از تَن شَی جدا کَد؛ ^{۱۱} اوخته سِر اُزو دَ

یگ پطُنُوس آورده شده دُختر دَدَه شُد و دُختر او ره دَ پیشِ

آبه خُو بُرد. ^{۱۲} بعد اُزو پَیرَوَای یحییٰ آمد و جَسَدِ اُزو ره بُردَه دَ

خاک دَفَن کَد و رفتَه دَ عِيسَى خَبَر دَد.

عِيسَى پَنْج هزار نَفَر ره نَان مِيدِيَه

وختِیکه عِيسَى اَی خَبَر ره شِنَید، او دَیگ کِشتَی سوار شُدَه

ازُونجی تنهای خُو دَیگ جَای گَوشَه رفت. مَگم وختی مردم

خبر شُد، اُونا از شارَای خُو پَای بَیَّدَه از پُشتِ اُزو رفت.

وختی عِيسَى دَ خُشَکَه رسِید، یگ جَمِعَیَتِ کَلَه ره دِید و دِل

شَی دَ حَالِ ازوا سوخت و او ناجورَای ازوا ره شَفَا دَد.

نَزِدِیکِ شام، يارَای شَی دَ پیشِ اُزو آمد و گُفت: "اینجی

بیابو آستَه و روز ام تیر شُدَه؛ مردم ره رُخَصَت کُو که دَ آغِيلا

بوره و بَلَدِه خُو نَان بَخَرَه. ^{۱۶} عِيسَى دَزَوا گُفت: "لَازِم نِبِيه

که مردم بوره؛ شُمو بَلَدِه ازوا یگو چِیز بَدِید که بُخوره."

اُونا دَزُو گُفت: "دَ اینجی بَعَيَر از پَنْج نَان و دُو ماهی دِیگه

چِیز نَدرَى. ^{۱۸} عِيسَى گُفت: "اُونا ره دَ اینجی دَ پیش مَه

بَیَّرَید. ^{۱۹} اوخته دَ جَمِعَیَتِ مردم اَمر کَد کَه دَ رُوی سَوْزَه

پشينه. بعد از امو پنج نان و دو ماهی ره گرفت و سون آسمو توخ کده شکرگزاری کد و نان ره ٹوٹه کده دیارای خود و یارا د جمعیت مردم بخش کد. ^{۲۰} پگ مردم خورد و سیر شد و اونا ٹوٹه-و-پرچه باقی مانده شی ره که جم کد، دوازده سبد پر شد. ^{۲۱} کسای که نان خورد، بغير از خاتونو و بچکیچا، تقریباً پنج هزار مرد بود.

عیسیٰ فوری یارای خود ره وادر کد که د کشتنی سوار شنه و پیشلون از د او طرف دریا بوره، تا خود شی امو جمعیت ره رُختست کنه. ^{۲۳} بعد ازی که مردم ره رُختست کد، خود شی تنها خود بله کوه رفت که دعا کنه. وختیکه شام شد، او د امونجی تنها بود. ^{۲۴} مگم کشتنی که دمزو غیت از خشکه غدر دور بود، د جلپه های دریا بند ماندد، چراکه باد از دم روی شی میزد. ^{۲۵} د پیره چارم شاو عیسیٰ د روی او دریا راه رفته سون ازوا آمد. ^{۲۶} وختی یارا او ره هوش کد که د روی دریا راه موره، اونا وحشت کده گفت: "ای آرواح آسته." و اونا از ترس چیغ-و-شور کد. ^{۲۷} مگم عیسیٰ فوری قد ازوا گپ زده گفت: "باجرات بشید! ما آستم، ترس نخورید." ^{۲۸} پترس د جواب شی گفت: "یا مولا، اگه تو آستی دز مه امر کو تا د

رُوی آو راه رفته دَ پیشِ ازْتُو بییم.^{۲۹} عیسیٰ گفت: "بیه."

پترس از کِشتی تا شُد و دَ رُوی آو رَیی شُد تا دَ پیشِ عیسیٰ^{۳۰} بییه.

مَگم وختی با دِ شَدید ره دید، ترس خورد و دَ حالِیکه دَرو غَرق مُوشُد، او چیغ زَده گفت: "یا مَولا، مَره نِجات

بِدی!"^{۳۱} عیسیٰ فوری دِست خُوره دراز کده او ره گِرفت و

دَزشی گفت: "آی کم ایمان، چرا شک کدی؟"^{۳۲} وختیکه اونا

دَ کِشتی سوار شُد، باد آرام شُد.^{۳۳} و امُوكسای که دَ کِشتی

بُود او ره سَجده کده گفت: "واقعاً تُوبَّا چه خُدا آستی."

بعد از تیر شُدو از دریا، اونا دَ سرزمینِ گِنیسارت آمد.^{۳۴}

وختیکه مردمِ امزُو جای عیسیٰ ره شِنَخت، اونا دَ سرتاسِ^{۳۵}

امُزو منطقه خبر رَیی کد و مردم تمامِ ناجورا ره دَ پیشِ ازو

آورد^{۳۶} و دَ پیش شی عذر-و-زاری کد که ناجورا ره بیله تا

فقط دَ دامونِ چَن شی دِست بِزنَه؛ و هر کسی که دِست زَد،

شفا پَیدا کد.

دَ بارِه پاکی و ناپاکی

۱ دَ امزُو غَیت بعضی از فَرِیسیا و عالِمای دِین از

اورُشَلِيم دَ پیشِ عیسیٰ آمَدَه گفت: ^۲ ”چرا یارای تُو از رسم-و-رَواج با به کلو نا سرکشی مُونه؟ چون اُونا پیش از نان خوردو دِستای خُو ره نَمُوشیه؟“ ^۳ او دَ جوابِ ازوا گفت: ”چرا شُمو بخاطری رسم-و-رَواج خُو از حُکمِ خُدا سرکشی مُونید؟ چون خُدا امر کده که، آته و آبِه خُو ره احترام کُو و هر کسی که دَ آته یا آبِه خُو دَو-و-دشنام بِدیه، باید کُشته شُنه. ^۴ مگم شُمو مُوگید: اگه یگ نفر دَ آته یا آبِه خُو بُگیه، ”امُو کومَک که از دِستِ ازمه دَز شُمو میرسید، دَ خُدا وقف شُد.“ ^۵ اوخته او نفر باید دَ آته و آبِه خُو احترام نَکنَه. ^۶ دَ امزی رقم شُمو بخاطرِ رسم-و-رَواج خُو حُکمِ خُدا ره تَی پای مُونید. ^۷ آی ریا کارا! اشعیای نَبی دَ باره شُمو خُوب پیشگویی کد، و ختیکه گفت:

^۸ ای مردم قد لبای خُو دَز مه احترام مُونه،

مگم دِل های شی از مه دُور آسته.

^۹ اُونا بے فایده مَره پرسِتِش مُونه،

چون اُونا رسم-و-رَواجی ره تعليِيم میدیه که اصولِ انسانی آسته.“

^{۱۰} اوخته عیسیٰ جمعیتِ مردم ره کُوی کده دَزوَا گفت:

”بِشَنَوِيد و بُفَامِيد: ^{۱۱} چیزی که دَدان موره انسان ره نَجِس نَمُونه، بَلْکِه چیزی که از دان بُر مُوشه، او انسان ره نَجِس مُوكُنه. ^{۱۲}“

^{۱۳} دَامْرُو غَيْت يارای شی آمد و دَزوَا گفت: ”آیا مِيدَنی که فَرِيسِيَا از شِنِیدوْن امزی توره تُو رَنْجِيد؟“ ^{۱۴} عیسیٰ دَجوابِ ازوَا گفت: ”هر نِهالی ره که آته آسمانی مه نَشَنَدَه بشه، از رِيشه کَنَدَه مُوشه. ^{۱۵} اونا ره دَحال شی ايله کُنِيد؛ اونا كوراي آسته که راهنمای کورا يَه. هر وختیکه يَگ کور راهنمای کور دِیگَه شُنَه، هر دُوی شی دَچاه موْفته.“

^{۱۶} مَكْمِپِتُرس دَزشی گفت: ”معنای امزی مَثَل ره دَز مو تَشْرِيْح کُو.“ ^{۱۷} اوخته عیسیٰ پُرسِيد: ”آیا شُمو ام هنوز پَی نَمُوبِرِيد؟“ آیا نَمُوفَامِيد که هر چیزی که دَدان داخِل مُوشه دَمِعَدَه موره و بعد اُزو بُر شُدَه دَكِنارآب پورته مُوشه؟ ^{۱۸} مَكْمِ چیزای که از دان بُر مُوشه از دِل سرچشمِ مِيگِيره و امي چِيزا آسته که انسان ره نَجِس مُونه. ^{۱۹} چُون از دِل انسان آسته که اينى چِيزا سرچشمِ مِيگِيره: فِكْر های خراب، قتل، زِنا، فِسادِ اخلاقی، دُزی، شاھِدی دروغ و تُهمَت. ^{۲۰} اينَمِي چِيزای آسته

که انسان ره نجس مُوکنه، ولے نان خوردو قد دستای ناشسته
انسان ره نجس نمُوکنه. ”

^{۲۱} بعد ازو عيسى اونجى ره ايله کده د منطقه هاي صور و
صيidon رفت. ^{۲۲} اوخته يگ خاتونِ كنعانى امزوجاي د پيش
عيسى آمد و چيغ زده گفت: ”يا مولا، باچه داود، دز مه
رَحْمَ كُو، چراكه دُخترِ مه سخت گرفتارِ جنیات آسته.“ ^{۲۳} مگم
عيسى دزو هيچ جواب نداد تا اي که ياراي شى آمد و ازو
خاهيش کده گفت: ”او ره رىي كُو، چون او از پشت مو چيغ-و-
شور کده مبيه.“ ^{۲۴} او د جوابِ ازوا گفت: ”ما فقط بلده
گوسپندوي گمشده خانوارِ إسرائيل رىي شدیم.“ ^{۲۵} ليکن امو
خاتو آمده پيش پاي شى افتاد و گفت: ”يا مولا، دز مه
كومك كُو!“ ^{۲۶} او د جواب شى گفت: ”خوب نبيه که نان
بچكيچا ره بگيري و د پيش سگا پورته کني.“ ^{۲۷} ليکن امو
خاتو گفت: ”آرے مولا، قبول درم، مگم سگا ام از ميدگي
های که از دسترون بدارشى موفته مُوخوره.“ ^{۲۸} اوخته
عيسى د جواب شى گفت: ”آي خاتو، ايمان توقى آسته!
خاهيش تۇ پوره شنه.“ و د امزوج لحظه دختر شى شفا پيدا کد.

عیسیٰ از اونجی حرکت کد و از لب لب دریای جلیلیه آمده
 ۳۰ آخته یگ دَبِله یگ کوه بُر شُد و دَامونجی شِشت. جمعیتِ کِنگه و غَدر ناجورای دِیگه ره قد خُو گِرفته اُورد و دَپیش پایای ازو ایشت و او اونا ره شفا دَد. ۳۱ مردم وختی دید که گنگه ها توره مُوگه، آدمای شَل جور مُوشه، لَنگا راه موره و کورا مینگره، حیر و مَند و خُدای اسرائیل ره حمد و ثنا گفت.

عیسیٰ یارای خُو ره کُوى کده گفت: "دل مه دَحال امزى جمعیت موسوزه، چون سِه روز شده که قد ازمه آسته و هیچ چیز بَلده خوردو نَدره. ما نَمیخایم که اونا ره گشنه رَیی کُنم، چون امکان دَر که دَبَین راه از حال بوره." ۳۳ یارای شی دَزرو گفت: "دِای بیابو از کُجا اُوقس نان کلو پیدا میتنی که ایطور یگ جمعیتِ کِنگه ره سیر کُنم؟" ۳۴ عیسیٰ ازوا پُرسان کد: "چند نان دَرید؟" اونا گفت: "هفت نان و چند ماهی ریزگگ. " ۳۵ پس دَ جمعیتِ مردم امر کد که دَ روی زمی پشینه. ۳۶ اخته امو هفت نان و ماهايا ره گِرفته شُکرگزاری کد و طوته کده دَ یارای خُو دَد و یارا دَ جمعیتِ مردم بَخش کد.

پگ ازوا خورده سیر شد و اونا ٹوٹه-و-پرچه باقی مَنَدَه ره که
جم کد، هفت سَبَد پُر شد.^{۲۸} کسای که نان خورد بَغَير از
خاتُونو و بچکِيچا چار هزار مَرد بُود.

بعد از رُخْصَت کدونِ مردم عیسیٰ دیگ کِشْتی سوار شد و
د منطقه مَجَدَل رفت.

طلبِ معجزه

۱۶ اوخته فریسیا و صدوقيا د پیشِ عیسیٰ آمد و از رُوى
آزمایش ازو تقاضا کد که بَلِدَه ازوا یگ مُعجزه آسمانی نشو
بَدِيه. او د جوابِ ازوا گفت: "د وختی آفتو شِشْتو شُمو
مُوگِيد که هوا خوب مُوشَه، چراکه آسمو سُرخَدِيل آسته." و
د وختِ صبح مُوگِيد که اِمروز هوا بَد مُوشَه، چراکه آسمو
سُرخ و گِرفته آسته. شُمو مِیدَنید که رنگِ آسمو ره چى رقم
پیشِبینی کنید، مگم علامت های زمان ها ره پیشِبینی کده
نمیتنید؟ ای قومِ شریر و زناکار مُعجزه طلب مُونه، مگم هیچ
معجزه دَزوا نِشو دَده نَمُوشَه بَغَير از مُعجزه یونُس پیغمبر.^{۳۰}
بعد ازو عیسیٰ اونا ره ايله کده رفت.

خِمیرماپه فَرِيسِيَا وَ صَدُوقِيَا

وختی یارای شی د او طرف دریا مورفت، از یاد ازوا رفتند که
قد خو نان ببره.^۶ عیسیٰ دزوا گفت: "باخبر بشید که از
خِمیرماپه فَرِيسِيَا وَ صَدُوقِيَا احتیاط کنید." ^۷ اوخته اونا د بین
خو توره‌گویی کده گفت: "ای ره از خاطری گفت که مو نان
قد خو نوردے." ^۸ عیسیٰ ای ره پی بُردہ گفت: "ای کم
ایمانا، چرا د باره ازی که نان ندارید د بین خو توره مُوگید؟
آیا هنوز ام نِمُوفامید؟ امو پنج نان و پنج هزار مرد د یاد شُمو
نییه؟ و ای که چند سَبَد جم کدید؟ ^۹ و یا امو هفت نان و چار
هزار مرد و ای که چند سَبَد جم کدید؟ ^{۱۰} پس چطور پی
نمُوبِرید که ما د باره نان قد شُمو توره نگفتم، بلکه گفتم که
از خِمیرماپه فَرِيسِيَا وَ صَدُوقِيَا احتیاط کنید." ^{۱۱} اوخته اونا
پی بُرد که او دزوا نگفتند که از خِمیرماپه نان احتیاط کنه،
بلکه از تعلیم فَرِيسِيَا وَ صَدُوقِيَا.

اقرار کدون پترس د باره مسیح

وختیکه عیسیٰ د منطقه قیصریه فیلیپس آمد، او از یارای
خو پُرسان کده گفت: "مردم «باقه انسان» ره کی میدنه؟"^{۱۲}

اونا گفت: "يگ تعداد يَحیای تعِمید دهنده؛ يگ تعداد دِیگه إلیاس پیغمبر و يگ تعداد دِیگه ام ارمیا و يا يکی از پیغمبرای دِیگه." ^{۱۵} عیسیٰ ازوا پُرسان کد: "شُمو مَره کِی میدَنید؟" ^{۱۶} شِمعون پِترُس دَ جواب شی گفت: "تُو مسیح آستی، باچه خُدای زِنده." ^{۱۷} اوخته عیسیٰ دَ جواب شی گفت: "نيک دَ بَخت تُو، آی شِمعون باچه يونا، چُون چِسم و خُون ای ره دَز تُو معلُومدار نَکده، بلکه آتِه مه که دَ آسمو آسته، معلُومدار کده." ^{۱۸} و ما ام دَز تُو مُوگُم که تُو پِترُس آستی و ما دَ رُوی امزی قاده جماعتِ ايماندارای خُوره آباد مُونم و درگه های دوزَخ دَ سرِ ازو زور نَمُوشه. ^{۱۹} ما کِلی های پادشاهی آسمو ره دَز تُو میدِیم و هر چیزی ره که دَ زمی بَند کُنی دَ آسمو ام بَند مُوشه و هر چیزی ره که دَ زمی واز کُنی، دَ آسمو ام واز مُوشه. ^{۲۰} اوخته او دَ يارای خُوره آمر کد که دَ هیچ کس نَگیه که او مسیح آسته.

عیسیٰ دَ بارِه مَرگ خُور پیشگویی مُونه

^{۲۱} بعد امزُو زمان عیسیٰ شروع کد که دَ يارای خُور معلُومدار کُنه که او باید دَ اورُشَلیم بوره و از دِستِ رِيش سفیدا، پیشوایونِ عالی مقام و عالمای دِین رَنج-و-عذابِ کَلو بِنگره و

کُشته شُنَه و دَ روزِ سِوّم دُوباره زِنَدَه شُنَه. ^{۲۲} پِتْرُس عِيسَى رَه
دَيگ گوشَه بُرد و شُروع کَد کَه او رَه مَنَعْ كُنه و گَفت: "يا
مَولا، خُدا نَكُنه کَه هرگِز قد ازْتُو اَي رقم يَگ واقِعَه رُخ
بِديه." ^{۲۳} مَكْمُ او دَور خورده دَ پِتْرُس گَفت: "ازْ مَه دُور شُو،
آي شَيْطَو! چُون تُو مانع راهِ مَه آستَى، چراکَه فِكر تُو دَ چِيزَاي
اللهى نَيَّيه، بَلَكِه دَ چِيزَاي إنسانى آستَه."

اوخته عِيسَى دَ ياراي خُو گَفت: "اَگَه كَسَى مِيخَايَه کَه اَز
مه پَيَرَوي کُنه، او بَايد خود خُو رَه اِنكار کُنه و صَلِيب خُو رَه
باله کَدَه اَز پُشتِ ازْمَه بِيَه. ^{۲۵} چُون هر كَسَى کَه بِخَايَه جان
خُو رَه نِجَات بِدَيَه، او رَه اَز دِسْت مِيدَيَه، مَكْمُ هر كَسَى کَه
بخاطِر ازْمَه جان خُو رَه اَز دِسْت بِدَيَه او رَه دَ دِسْت مِيرَه.
بَلَدِه إنسان چَي فَايَدَه دَرَه کَه تمامِ دُنيا رَه دَ دِسْت بِيرَه، مَكْمُ
جان خُو رَه اَز دِسْت بِدَيَه؟ يا إنسان دَ عِوَضِ جان خُو چِيزَخِيل
دَدَه مِيتَنَه؟ ^{۲۷} چراکَه «باِچَه إنسان» دَ بُزُرَگَي-و-جلالِ آتَه خُو قد
ملَايِكَه هَاي خُو مِيءَه و اوخته هر كَس رَه دَ مُطابِقِ اعمَال شَي
أَجَرْ يا جَزا مِيدَيَه. ^{۲۸} ما حَقِيقَت رَه دَز شُمو مُوكَمْ، بعضِي
كسَاي کَه دَ اينجَى ايَستَه يَه مَزِه مَرَگ رَه نَمِيقَشَه تَا أَمَدونِ
«باِچَه إنسان» رَه دَ پادشاھي شَي نَنَگَرَه."

١٧

^١ بعد از شَش روز عَيسَى پُترُس، يعقوب و بِرار شَى يوختا ره جدا کده قد خُو د سِرِيگ کوه قِيل بُرد. ^٢ د أونجى شَكْلِ عَيسَى دَپِيشِ رُوى ازوا تَبْدِيل شُد و چهِرِه شَى رقم آفتَو الّى روشنَى دَد و كالاى شَى رقم نُور سفید شُد. ^٣ بے بلغه مُوسَى و إِلياس دَزوا ظاهِر شُد و قد عَيسَى دَتُوره گُفتَو شُد.

^٤ اوخته پُترُس دَعَيسَى گُفت: "يا مَولا، كَلو خُوب أَسْتَه كَه مو دَإينجى أَسْتَى. اگه بِخاهى ما سِه سَايَه بَان دَإينجى جور مُونُم: يِگ بَلَدِه ازْتُو، يِگ بَلَدِه مُوسَى و يِگ ام بَلَدِه إِلياس."

^٥ دَحَالِيكه هنوز تُوره مُوكَفَت، بے بلغه يِگ آُورِ نُورانِي دَبَلَه ازوا سَايَه كَد و از آُورِيگ آواز أَمَدَه گُفت: "أَيْنَمِي باِچَه دَوَست دَشَتنِي مَه يَه كَه از شَى خوش-و-راضِي أَسْتَم. از آيد شَى شُنِيد." ^٦ وختى يارا امى آواز ره شِنِيد، اونا رُوى دَخَاك افَتَه غَدر ترس خورد. ^٧ لِيکِن عَيسَى نَزَدِيک أَمَدَه دَبَلَه ازوا دِست ایشت و گُفت: "بَالِه شُنِيد، ترس نَخُورِيد." ^٨ وختى كه اونا چِيمَاي خُو ره واز کد هيچ کس ره نَدِيد بَغَير از عَيسَى كَه تنها بُود.

^٩ دَحَالِيكه اونا از کوه تاه مِيمَد، عَيسَى دَزوا أَمَر کده گُفت:

”دَ بَارِهِ چِيزِي كَه دِيدِيدَ هِيجَ كَس نَقلَ نَكْنِيدَ تَا زَمانِي كَه
»بَاقِهِ إِنسان« از مُرَدَه هَا دُوبَارَه زِنَده نَشُدَه.“^{١٠} يَارَايِ شِي
ازُو پُرسَانَ كَدَه گُفتَ: ”پَس چَرا عَالِمَايِ دِينِ مُوَكِّيهِ كَه إِلياس
بَایدَ اولَ بِيَيهِ؟“^{١١} اوَ دَ جَوابِ ازوَا گُفتَ: ”دُرُستَ أَسْتَهِ كَه
إِلياسِ مِيَيهِ وَ تَمَامِ چِيزَا رَه إِصلاحَ مُونَه.“^{١٢} مَكْمَ ما دَزْ شُمو
مُوكِّمَ كَه إِلياسَ گَاهَ أَمَدَه، وَلَسَ اُونَا اوَ رَه نَشِنَختَ وَ هَرَچِيزِي
كَه خَاستَ دَ حَقِّي ازوَا كَد. دَ امْزُو رَقْمَ »بَاقِهِ إِنسان« ام از دِسْتِ
ازُوا رَنجَ-وَعَذَابِ مِينَگَرَه.“^{١٣} اوَخْتَهِ يَارَا فَامِيدَ كَه دَ بَارِهِ
يَحِيَايِ تَعْمِيدَ دِهِنَدَه قَد ازوَا تُورَه مُوكِّيهِ.

شَفَاعَهِ دَدُونِ بَاقِهِ مِرَگَى

وَخْتَيِ اُونَا دَ پَيَشِ جَمِيعَتِ مَرْدُومِ رسِيدَ، يَكَ آدمَ دَ دِيرِ ازوَا^{١٤}
أَمَدَ وَ دَ پَيَشِ رُويِ شِي زَانُو زَادَه گُفتَ: ”يَا مَولا، دَ حَالِ
بَاقِهِ مَه رَحَمَ كُو، جُونَ اوَ مِرَگَى دَرَه وَ سَخَتَ رَنجَ-وَعَذَابِ
مِينَگَرَه؛ اوَ بَارَهَا دَ آتِشَ اُفتَدَه وَ بَارَهَا دَ مَنِهَ آو.“^{١٥} اوَ رَه دَ
پَيَشِ يَارَايِ تُو آُورَدَمَ، مَكْمَ اُونَا نَتَنِيَتَ كَه اوَ رَه شَفَاعَهِ بدِيهِ.“
عِيسَى دَ جَوابِ شِي گُفتَ: ”آيَ نَسْلِ بَسِ ايمَانَ وَ گُمراَهَ، تَا^{١٦}
كَيَ قَد شُمو بَشُمَ؟ وَ تَا چَيِ وَخَتَ شُمو رَه تَحَمُّلَ كَنْمَ؟ اوَ رَه
پَيَشِ ازْمَه بَيرِيدَ.“^{١٧} پَس عِيسَى دَ سِرِّ جِنَ هَيَبَتَ كَدَ وَ جِنَ ازوَا

بُر شُد و امُو باچه دَ امُزو لحظه شفا پَيدا کد.

^{۱۹} اوخته يارا دَ پيشِ عيسىٰ آمد و دَ تنهايي ازو پُرسان کد:

“چرا مو نَتِنستي که امُو جن ره بُر کُنى؟” ^{۲۰} عيسىٰ دَزوا گفت: “بخاطري که ايمان شُمو کم آسته. ما حقيقیت ره دَز شُمو مُوگُم، اگه شُمو دَ اندازه يك تُخْ شَرَشَم ايمان دَشته بشِيد، مِيتَنَيَد دَ امزى کوه بُگِيد، حَرَكَتْ كُو، ازِينجى دَ أونجى بورُو، وَ او حَرَكَتْ مُونه؛ اوخته هیچ چیز نِييه که بَلَدِه شُمو نامُمکِن بَشه.” ^{۲۱} [ليكن اى رقم جِنيات جُز دَ وسِيله دُعا و روزه دِيگه رقم بُر نَمُوشة.]

^{۲۲} وختيکه اونا دَ جليليه جم شُد، عيسىٰ دَزوا گفت: “باچه إنسان» دَ دستِ مردم تسلیم مُوشه ^{۲۳} و اونا او ره مُوكشه و او دَ روز سِوم دُوياره زِنده مُوشه.” پس اونا غَدر كوژيوبار شُد.

مالیه بَلَدِه خانِه خُدا

^{۲۴} وختيکه اونا دَ كفرناحوم رسِيد، کسای که مالِيه دُو درَهم ره جم مُوكد دَ پيشِ پترُس آمده گفت: “آيا أَسْتَادْ شُمو مالِيه دُو درَهم ره نَمِيدِيه؟” ^{۲۵} پترُس گفت: “مِيدِيه.” وختيکه پترُس دَ

خانه داخل شد، عیسیٰ اُزو کده پیش د توره گفتوا شد و

پُرسید: "آی شمعون چی فکر مونی، پادشايون دنيا از کدم

کسا ماليه و جزيه ميگيره؟ از بچكيچاي خو يا از بيگنه‌گو؟"

٢٦ پترس د جواب شى گفت: "از بيگنه‌گو." عیسیٰ دزو

گفت: "پس بچكيچا معاف آسته." ٢٧ مگم بخاطري که مو اونا

ره آزرده نکنى، د لب دريا بورو و چنگك ماھي گيري ره د

دریا پورته کو؛ اولين ماھي ره که گرفتى دان شى ره واز کو و

يگ سكه چار درهمى پيدا موكنى. او ره بگير و بله ماليه

خود خو و ازمه دزوا بدی."

کي د مينكل مردم بزرگ آسته

١٨ ١ د امزو غيت يارا د پيش عيسى آمد و ازو پرسان کد:

"بزرگترین کس د پادشاهي آسمو کي آسته؟" ٢ اوخته عيسى

يگ بچكيچه ره کوي کده د مينكل ازوا ايستالجي کد ٣ و

گفت: "ما حقiqت ره دز شمو موگم، تاكه خود ره إصلاح

نکنيد و رقم بچكيچاي ريزه نشنيد، شمو هرگز د پادشاهي

آسمو داخل نموشيد." ٤ پس هر کسي که رقم امزي بچكيچه

خود خو ره شکسته نفس کنه، اونمو د پادشاهي آسمو

بُزُرگتَرین أَسْتَهُ.^٥ وَ هُرْ كَسِي كَهْ امِي رَقْم بَچِكِيچِه رَهْ دَنَامِ
ازْمَه قَبْول كُنَه، مَرَه قَبْول مُونَه.

لِيَكِنْ اَكَهْ كُدَمْ كَسْ باعِثِ گُمراهِي يِكِي امِزِي رِيزِه گِينا شُنَه
كَهْ دَزْ مَهْ ايَمَانْ دَرَه، بَلَدِه اَزُو بِهَتَرْ أَسْتَه كَهْ يِكَگِ سنَگِ آسِيَا دَ
گَرْ دونْ شِي اَوزِو شُدَه دَ چُقُورِي درِيَا پُورَتَه شُنَه.^٦ وَايِ دَحَالِ
امِزِي دُنيَا بَخاطِرِ گُمراهِيَا شِي! لَازِمْ أَسْتَه كَهْ گُمراهِيَا بِيَهِ،
مَكْمَغْ وَايِ دَحَالِ كَسِي كَهْ گُمراهِي دَ وَسِيلِه اَزُو مِيَهِ!^٧ پَسْ اَكَهْ
دِسْتْ تُوْ يَا پَايِ تُوْ باعِثِ مُوشَه كَهْ تُوْ گُمراه شُنَى اوْ رَه قَطْعَه
كَده دُورْ پُورَتَه كُو، چُونْ بَلَدِه تُوْ بِهَتَرْ أَسْتَه كَهْ چُنَّتَه يَا لَنَگِ
داخِلِ زِندَگِي اَبَدِي شُنَى نِسْبَتْ دَزِي كَهْ قَدْ دُوْ دِسْتْ يَا دُوْ پَايِ
دَ آتِشِ اَبَدِي پُورَتَه شُنَى.^٨ وَ اَكَهْ چِيمْ تُوْ باعِثِ مُوشَه كَهْ تُوْ
گُمراه شُنَى، اوْ رَه بُرْ كَده دُورْ پُورَتَه كُو، چُونْ بَلَدِه تُوْ بِهَتَرْ
أَسْتَه كَهْ قَدْ يِكَگِ چِيمْ دَاخِلِ زِندَگِي اَبَدِي شُنَى، نِسْبَتْ دَزِي كَهْ
قدْ دُوْ چِيمْ دَ آتِشِ دَوَرَخْ پُورَتَه شُنَى.

مَثَلِ گُوسِپُونِ گُم شُدَه

١٠ توخْ كُنِيدْ كَهْ هِيَچْ كُدَمْ امِزِي رِيزِه گِينا رَهْ تَوهِينْ-و-تحَقِيرْ
نَكْنِيدْ؛ چُونْ ما دَزْ شُمُو مُوكِمْ كَهْ ملايِكَه هَايِ ازوَا دَ عَالِمِ بالَهِ

دایم رُوی آتِه مَرَه که دَ آسمو آسته، مِینگره. ^{۱۱} [چُون «بِاچِه

إنسان» آمَدَه تا گُم شُدَه ره نِجَات بِدِيه.]

^{۱۲} شُمو چِي فِكِر مُونِيد؟ اگه يگ نفر صد گُوسِپو دَشْتَه بَشَه و

يکى ازوا گُم شُنَه، آيا امُو نَوَد-و-نُه گُوسِپو ره دَ كَوه ايله

^{۱۳} نَمُونَه و بَلَدِه پالِيدُونِ امْزُو گُوسِپُونِ گُم شُدَه نَمُورَه؟ ما

حَقِيقَت ره دَز شُمو مُوكُم، اگه او نفر او ره پَيَدا كُنه، بَلَدِه امْزُو

گُوسِپو كَلوَتَر خوش مُوشَه نِسَبَت دَ نَوَد-و-نُه گُوسِپُونِي که گُم

^{۱۴} دَ امْزِي رقم خاست-و-إِرَادِه آتِه شُمو که دَ آسمو

آستَه، إِي نِيَيَه که حتَّى يکى امْزِي رِيزَه گِينَا ام از دِست بورَه.

بِرارِي که دَ ضِدِ از شُمو گَناه مُوكُنَه

^{۱۵} اگه بِرارِ تُو دَ حق تُو گَناه کده بَشَه، بُورُو و خطَائِي شَي ره

دَز شَي بُكَي، ولَسِ إِي فقط بَيَنِ از تُو و ازْوَ بَشَه. اگه تورِه تُو

ره گُوش کد، بِرارِ خُو ره پَس پَيَدا كَدي ^{۱۶} و اگه گُوش نَكَد،

يگ يا دُو نفرِ دِيَگَه ره قد خُو قَتَى بُبرِ تا هر قضَيَه دَ وسِيلَه دُو

يا سِه شاهِد ثَابِت شُنَه. ^{۱۷} و اگه از آيِدِ ازوا ام نَشَد، دَ جماعتِ

ايَمانِدارا بُكَي و اگه دَ تورِه جماعتِ ايَمانِدارا ام گُوش نَدَد،

^{۱۸} اوخته بَيل که او بَلَدِه تُو مِثَلِ يگ كافِر يا ماليَه گِير بَشَه. ما

حِقِيقَت ره دَز شُمو مُوْگُم، هر چِيزِي ره که شُمو دَ زمي بَند
کُنِيد، دَ آسمو ام بَند مُوشَه و هر چِيزِي ره که دَ زمي واز
کُنِيد، دَ آسمو ام واز مُوشَه.

”بَسَم دَز شُمو مُوْگُم، اگه دُو نفر از شُمو دَ زمي دَ باره^{١٩}
هر چِيزِي که در خاست مُونِيد اتفاق کُنِيد، دَ وسِيلَه آتِه مه که دَ
آسمو آسته بَلِدِه شُمو انجام دَده مُوشَه.^{٢٠} چُون دَ هر جايِي که
دُو يا سِه نفر دَ نامِ ازمه جم شُنه، ما دَ أونجَى دَ مينكِلِ ازوا
حاضرِيَر آستُم.“

مَثَلِ غُلامِي که نَمُوبخشَه

اوخته پِترُس دَ پِيشِ عيسَى أَمَدَه گُفت: ”يا مَولا، اگه بِرار^{٢١}
مه دَ ضِيد مه گُناه کُنه تا چند دفعه باید او ره بُبخشم؟ آیا تا
هفت دفعه؟“^{٢٢} عيسَى دَ جواب شَى گُفت: ”ما دَز تُو مُوْگُم
هفت دفعه نَه، بَلِكِه هفتاد و هفت دفعه.

دَمْزِي دِليل پادشاهي آسمو رقمِ يَك پادشاه آسته که قَصد^{٢٣}
کد قد خدمتگاراي خُو حساب-و-كتاب کُنه. وختيکه^{٢٤} حِساب-و-كتاب ره شروع کد، يَك نفر ره دَ پِيشِ ازُو آورَد که

۲۵ دها هزار قَنْطَار اُزْوَ قَرْضَادَار بُود. و ازی که او نَمِيَتَنِست

قرض خُو ره بِدِيه، بادار شی اَمِرَ كَدَ کَه او ره قد خاتُو و

بچِکِیچا و تمامِ دارایی شی سَوْدَا كُنَه و قرض ره از شی

بِكِيره. ۲۶ اوخته امُو خِدمتگار دَپِيشِ پای بادار خُو افتَدَ و

گُفت: 'دَزْ مَه وَخْت بِدِي تا تمامِ قَرْضَاءِ تُورَه دَزْ تُوبِدُم.' ۲۷

پس بادار امُو خِدمتگار دَزُو دِلْسوزی کده او ره ايله کد و

قرض شی ره ام بخشید. ۲۸ مَكْمُون خِدمتگار وختیکه بُرو

رفت، قد يکی از همکارای خُو رُوي دَرُوي شُد که او صد

دینار قَرْضَادَار شی بُود. اوخته او ره گِرفَت و قَبَه کده گُفت:

۲۹ 'قرضی ره که دَبَلِه تُورَه دَرُوم بِدِي!' اوخته امُو همکار شی دَ

پایای اُزْوَ افتَدَ و عذر کده گُفت: 'دَزْ مَه وَخْت بِدِي تا تمامِ

قَرْضَاءِ تُورَه دَزْ تُوبِدُم.' ۳۰ مَكْمُون او قبُول نَكَد، بلکِه رفت و

۳۱ او ره دَبَندی خانه پورته کد تا قرض خُو ره بِدِيه. وختی

همکارای شی ای واقِعه ره دِيد، غَدر غَمَگی شُد و اُونا رفته

۳۲ هر چیزی ره که دَأُونجَى شُدد، دَبادار خُو نقل کد. اوخته

بادار شی او ره طلب کده گُفت: 'آی خِدمتگار شِرِير، ما تمامِ

قرض ره دَزْ تُوبخشیدم، فقط بخاطری که تُورَه دَپِيش مه عذر-

۳۳ و-زاری کدی. پس آیا دَزْ تُولازِم نَبُود که دَه همکار خُو دل

۳۴ مُوسوختنَدی امُو رقم که ما دَزْ تُو دِل سوختنَدُم؟' اوخته

بادار شی قار شُدہ او ره دَ عسکرای بَندی خانه تسِلیم کد تا

شِکنجه-و-عذاب شُنہ و تا وختیکه تمام قرض خُو ره نَدده،

ایله نَشنہ.^{۳۵} پس آته آسمانی مه ام قد هر کُدم شُمو امی رقم

رفتار مُونه اگه شُمو پِرار خُو ره از دِل نَبَخشید.

د بارِه طلاق

١٩ وختیکه عیسیٰ از گفتون امزی تورا خلاص شُد، او جلیلیه ره ایله کده دَ منطقه یهودیه دَ او طرف دریای اردن رفت.^۱ یگ جمعیت کله از پُشت شی آمد و او اونا ره د اونجی شفا دَد.

۲ دَمزُو غَیت بعضی فریسیا دَ پیش اُزو آمد تا او ره آزمایش کُنه و اُزو پُرسان کده گفت: "آیا بَلَدِه یگ مرد روا آسته که خاتون خُو ره دَ هر عِلتی که بَشه طلاق بِدیه؟"^۴ او دَ جواب ازوا گفت: "آیا شُمو نَخاندید که خالِق ازوا دَ شروع اونا ره مرد و زَن خَلق کد و گفت، امزی خاطر مرد آته و آپه خُو ره ایله کده قد خاتون خُو یگجای مُوشہ و هر دُوی شی یگ جسم مُوشہ؟"^۵ دَمزی صُورت اونا دِیگه دُو جسم نِبیه، بَلکِه یگ

جِسم آسته. پس چیزی ره که خُدا یېگجای کده انسان نباید جدا کنه.^۷ اونا دَزُو گفت: "پس چرا مُوسى امر کد که دَخاتون خُو طلاقنامه بدى و او ره ايله کو؟"^۸ او دَزوا گفت: "مُوسى بخاطر سنگدلی شُمو اجازه دَد که شُمو خاتون خُو ره طلاق بِدید. لیکن از اوّل ای رقم نبُود.^۹ و ما دَز شُمو مُوكم، هر کسی که خاتون خُو ره بغير از عَلَت زِنا طلاق بِديه و قد دِيگه خاتُو توي کنه، او زِنا مُونه."^{۱۰}

ياراي شى دَزُو گفت: "اگه وضعیت مرد دَ برابر خاتون شى امى رقم بَشه، پس توى نَکدو بِهتر آسته."^{۱۱} لیکن او دَزوا گفت: "هر کس نَمیتنه ای توره ره قبول کنه، بَلکه تنها او کسای قبول مُوكنے که بَلده ازوا عطا شده.^{۱۲} چون بعضی کسا آسته که خُشنا دُنيا آمدە؛ بعضی کسا دَ وسیله مردم خُشنی شده و کسای ام آسته که از خاطر پادشاهی آسمو خودون خُوره خُشنی کده. کسی که میتنه ای ره قبول کنه، بیلید که قبول کنه."^{۱۳}

اوخته بچکیچای ریزه دَ پیش عیسیٰ اوُرده شُد تا او دِست خُوره دَ سر ازوا بیله و دُعا کنه. مگم ياراي شى کسای ره که بچکیچا ره اوُرده بُود، سرزنش کد.^{۱۴} ولے عیسیٰ گفت:

”بیلید که بچکیچای ریزه پیش ازمه بیله و اونا ره از آمدو د پیش ازمه مَنع نَكْنِيد، چراکه پادشاهی آسمو دَمزی رقم کسا تعلق دَره.“^{۱۵} اوخته دستای خُوره د سر ازوا ایشت و ازُونجی رفت.

جوان دَولتمَند

دَامْزو زمان يگ آدم دَپیش عیسیٰ آمده گفت: ”أُستاد، ما چی کار نیک انجام بِدم تا زِندگی آبدی ره د دست بیرم؟“^{۱۶} عیسیٰ دَزو گفت: ”چرا دَباره کار نیک از مه پُرسان مُونی؟“ تنها يگ وجود دَره که نیک آسته وبَس. لیکن اگه تُو میخاهی دَزِندگی آبدی داخل شُنی، احکام ره د جای بیر.“^{۱۷} او آدم پُرسان کد: ”کُدم احکام ره؟“ عیسیٰ گفت: ”قتل نَكُو، زِنا نَكُو، دُزی نَكُو، شاهِدی دروغ نَدی،“^{۱۸} د آته و آپه خُواحتِرام کُو و همسایه خُوره رقم خود خُوالی دوست دَشته بش.“^{۱۹} امُو آدم جوان دَزو گفت: ”ما پِگ امزیا ره د جای اوُردیم. دِیگه چی کمبُود دَرم؟“^{۲۰} عیسیٰ دَزو گفت: ”اگه میخاهی که کامل شُنی، بورُو، دارایی خُوره سَودا کُو و پیسِه شی ره د غَرِيبا بِدی؛ اوخته تو د عالم باله صاحِبِیگ گچ مُوشی. بعد ازُوبیه و از مه پَیرَوی کُو.“^{۲۱} وختیکه امُو آدم

جوان ای توره ره شِنید، غَمگی شُد و ازْونجی رفت، چراکه او مال-و-دولتِ کلو داشت.

اوخته عیسیٰ دیارای خو گفت: "ما حقیقت ره دَز شُمو مُوگم، بَلده آدمِ دولتمَند غَدر سخت استه که دَپادشاهی آسمو داخِل شُنه.^{۲۴} بسم دَز شُمو مُوگم که تیر شُدون اُشتر از نیفه سیز و آسوتر استه نِسبَت دَ داخِل شُدون آدمِ دولتمَند دَپادشاهی خُدا.^{۲۵} وختی یارا امی توره ره شِنید، اونا غَدر حَیرو شُد و گفت: "پس کی میتنه نِجات پیدا کُنه؟"^{۲۶} عیسیٰ سُون ازوا توخ کده گفت: "بَلده انسان ای کار ناممکن استه، لیکن بَلده خُدا پَگ چیزا مُمکن استه."

اوخته پِترس دَ جواب شی گفت: "اینه، مو تمام چیز خُو ره ایله کده و از تُو پیروی مُونی. پس دَز مو چیز خیل میرسه؟"^{۲۷} عیسیٰ دَزوا گفت: "ما حقیقت ره دَز شُمو مُوگم، وختیکه تمام چیزا از نَو جور مُوشه و «باقِه انسان» دَ تَخت بُزرگی-و-جلال خُو میشینه، شُمو کسای که از مه پیروی کدید ام دَ دوازده تَخت شِشته دَ بَلده دوازده طایفه إسرائیل قضاوت مُوکنید.^{۲۸} و هر کسی که خانه ها یا بِرارو یا خوارو یا آته و آبه یا خاتو یا بچکیچا یا زمینای خُو ره بخارطِ نام ازمه ایله

کده بَشَه، صد برابر شی ره دَ دِست میره و وارِثِ زِندگی آبَدی
ام مُوشَه.^{۳۰} مگم غَدر کسای که اوّل آسته آخر مُوشَه و آخرها
اوّل.^{۳۱}

مَثَلٍ كَارْگَرَى بَاغِ انْگُور

۲۰ ^۱ ”چون پادشاهی آسمو رقمِ یگ صاحِبِ زمی آسته که
صَباَحَگاه بُرو رفت تا بَلِدِه بَاغِ انْگُور خُو کارگر بِگیره.^۲ او قد
کارگرا روزِ یگ دینار قرارداد کد و اُونا ره دَ بَاغِ انْگُور خُو
رَبَی کد.^۳ قرِيبِ ساعتِ سوّم او بسم بُرو رفت و بعضی کسای
دِیگه ره دید که دَ بازار بیکار ایسته يه.^۴ او دَزوا گفت: ‘شُمو
ام دَ بَاغِ انْگُور بورِید و هر چیقس که حق شُمو شُد بَلِدِه شُمو
مِیدُم.’ پس اُونا ام رفت.^۵ قرِيبِ ساعتِ شَشم و ساعتِ نُهم او
بسم بُرو رفت و عَيْنِ کار ره کد.^۶ قرِيبِ ساعتِ يازَدَهُم او بسم
بُرو رفت و چند نفرِ دِیگه ره دید که بیکار ایسته يه. ازوا
پُرسان کده گفت: ‘چرا تمامِ روز دِینجی بیکار ایسته شُدید؟’^۷
اُونا دَزشی گفت: ‘بخارطِر که هیچ کس مو ره دَ کار
نَگِرفت.’ او دَزوا گفت: ‘شُمو ام دَ بَاغِ انْگُور بورِید.’^۸

^{۱۰} وختیکه شام شُد، صاحِبِ باغ انگور دَ ناظِر خُو گُفت:

کارگرا ره طلب کُو و از کارگر آخر گِرفته تا کارگر اوّل مُزدِ ازوا ره بَدی.^۹ اوخته کارگرای که قریب ساعتِ یازدهم دَ کار

آمدَد، هر کُدم شی پیش آمد و یگ دینار گِرفت.^{۱۰} وختی

کسای که اوّل دَ کار آمدَد پیش آمد، اونا دَزی فِکر بُود که کلوتر مِیگیره، مگم بَلدِه هر کُدم ازوا ام یگ دینار دَدَه شُد.

امی که اونا مُزد خُو ره گِرفت، دَ صاحِبِ زمی شِکایت کده^{۱۱}

گُفت:^{۱۲} امی کسای که آخر آمد تنها یگ ساعت کار کد و

تو اونا ره قد ازمو برابر حِساب کدی، دَ حالِیکه سختی و

گرمی روز ره مو تَحْمُل کدی.^{۱۳} لیکن او د جوابِ یکی ازوا

گُفت: آی رفیق، ما د حق از تو کُدم ظُلم نَکدیم. آیا خود تو د

یگ دینار قد ازمه جور نَمَدی؟^{۱۴} حق خُو ره بِگیر و بورُو. ما

میخاییم د امزی کارگر آخری ام د اندازه از تو مُزد بِدیم.^{۱۵} آیا

حق نَدرُم قد دارایی خُو هر چیزی که میخاییم انجام بِدُم؟ یا ازی

که دِستِ واز دَرُم دِیده تو نَمییه؟^{۱۶} پس آخر اوّل مُوشَه و اوّل

آخر.

سِوّمنه پیشگویی عیسیٰ د باره مُردون شی

^{۱۷} وختیکه عیسیٰ سُون اورُشَلیم مورفت، دَ بَینِ راه دوازده یار

خو ره دَ يِگ گوشه بُرد و دَزْوا گُفت: ^{۱۸} "اینه، مو د اورشلیم موری و «باقه انسان» د دست پیشوایون عالی مقام و عالمای دین تسليیم موشه و اونا او ره محکوم د مرگ مونه؛ ^{۱۹} و او ره د دست مردمای غیر یهود تسليیم مونه تا اونا او ره ریشخند کده قمچی بزنه و د صلیب میخکوب کنه، ولے او د روز سوم دُوباره زنده موشه." ^{۲۰}

تقاضای یگ آبه

اوخته آیه باقه های زیدی قد بچکیچای خو د پیش عیسی ^{۲۱} عیسی پُرسان کد: "چی میخاهی؟" او گفت: "بُگی امی دو باقه مه د پادشاهی تُو یگ شی د دست راست تُو و دیگه شی د دست چپ تُو پیشینه." ^{۲۲} عیسی د جواب شی گفت: "شمو نمیدنید که چیز خیل طلب مونید. آیا میتنید از جامی و چی کنید که ما و چی کدنی آستم؟" اونا د جواب شی گفت: "آر، میتنی." ^{۲۳} او دزْوا گفت: "دُرست آسته که شمو از جام ازمه و چی مونید، لیکن ای که د دست راست مه پیشینید و د دست چپ مه، ای د اختیار ازمه نییه که دز شمو بدمیم، بلكه بله کسای آسته که د وسیله آته مه بله ازوا آماده

شُدَه.“

وختی دَه يارِ دِیگه ای توره ره شِنید، اُونا دَ بَلَه امْزُو دُو پِرار ^{۲۴} قار شُد. لیکِن عیسیٰ اُونا ره کُوي کد و گُفت: ”شُمو میَدَنید که حُکمرانی مردمای غَیر یهُود دَ بَلَه ازوا باداری مُونه و کُته کلوна دَ بَلَه ازوا جَبر-و-سِتَم مُوكُنه.^{۲۵} مَگم دَ بَیْن ازشُمو باید ای رقم نَبَشه، بلکِه هر کسی که دَ مینکل شُمو میخایه کُله بَشه، باید خِدمتگار شُمو بَشه.^{۲۶} و هر کسی که دَ مینکل شُمو میخایه پیش قَدَم بَشه، باید غُلام شُمو بَشه.^{۲۷} امُو رقم که «بَاقِه اِنسان» نَمَدَه تا خِدمت شُنه، بلکِه تا خِدمت کُنه و جان خُو ره دَ راهِ غَدر کسا فِدا کُنه.“

شفای دُو آدم کور

وختیکه عیسیٰ و یارای شی از شارِ آریحا بُرو میَمَد،^{۲۹} جمعیَتِ کُله مردم از پُشتِ ازوا رَیی شُد. دَ امْزُو غَیت دُو آدم کور دَ بغلِ راه شِشَتُد. اُونا وختی شِنید که عیسیٰ ازْونجی تیر مُوشَه، چیغ زَده گُفت: ”یا مَولا، باقِه داُود، دَ بَلَه ازمو رَحَم کُو!“^{۳۰} جمعیَتِ مردم اُونا ره سرزنش مُوكَد که چُپ شُنه، مَگم اُونا کَلوَتَر چیغ مِیَزَد و مُوكَفت: ”یا مَولا، باقِه داُود، دَ

بَلِه ازمو رَحْم كُو! ”^{۳۲} اوخته عيسى ایسته شُد و د آوازِ بلند

گفت: ”چي ميخاهيد که ما بَلِدِه شُمو انجام بِدُم؟“^{۳۳} اونا

گفت: ”يا مَولا، مو ميخاهى که چيمى مو واز شُنه.“^{۳۴} دِلِ

عيسى سوخت و او دَ بَلِه چيمى ازوا دِست کشيد؛ فورى
چيمى ازوا بينا شد و اونا از پُشتِ ازو رَبي شد.

داخِل شُدون پيروزمندانه عيسى دَ اورُشَليم

٢١ وختى اونا دَ اورُشَليم نزديك شُد و دَ بَيت فاجى دَ

کوه زيتون رسيد، عيسى دُو نفر از ياراي خُوره رَبي کده

دَزوا گفت: ”د آغيلى که پيش رُوي شُمو أسته بوري و دَ

أونجى دِستى يگ الاغ ره پيدا مُونيد که قد كُره خُوبسته يه.

أونا ره واز كُنيد و دَ پيش ازمه بيري. ^{۳۵} اگه يگو کس دَز شُمو

کدم چيز گفت، بُكِيد که مَولاي مو أميا ره لازم دَره؛ و او

أونا ره فورى قد شُمو رَبي مُونه.^{۳۶} اي کار شُد تا توره که دَ

وسيله پيغمبر گفته شُدد، پوره شُنه، چون پيغمبر گفتند:

”د دُختر صَهْيون بُكِيد:^{۳۷}

أونه، پادشاه تُو دَ پيش تُو مييه،

او فروتن آسته، سوار د بله الاغ،

د بله يگ کره، چوچه حیوان بارکش. ”

پس امُو دُويار رفت و چیزی ره که عیسیٰ دزوا امر کدد، د
جای اوُرد. ^۶ اونا الاغ ره قد کرده شی اوُرد و چپن های خُوره د
پُشت ازوا آندخت و عیسیٰ د بله چپن ها شِشت. ^۷ جمعیت کِله
مردم چپن های خُوره د سر راه اوَار کد و يگ تعداد دیگه
شاخچه های درخت ره بُریده د راه فرش کد. ^۸ جمعیت مردم که
پیشلوں اُزو مورفت و از پُشت اُزو میمَد، چیغ زَده مُوگفت:

”هوشیعانا د باچه داُود!

مُبارک آسته کسی که د نام خداوند میبیه!

هوشیعانا د بلندترین جای عالم باله!“

وختیکه عیسیٰ د اورشلیم داخل شد تمام شار د شور آمدُد و
مُوگفت: ”ای کی آسته؟“ ^{۱۰} جمعیت مردم مُوگفت: ”ای
عیسیٰ پیغمبر آسته از ناصِرِه جلیلیه.“

عیسیٰ د خانه خدا

اوخته عیسیٰ د حولی خانه خدا داخل شد و تمام کسای ره ^{۱۲}

که د خانه خدا خرید و فروش مُوكد، بُرو بُر کد و میزای صرافا

و چوکی های کوتر فروشا ره ام سرچپه کده ^{۱۳} دزوا گفت:

”نوشته شده که“

”خانه مه جای عِبادت گفته مُوشه،“

”مگم شُمو ای ره غارِ دُزا جور کدید.“

اوخته کورا و شل ها د خانه خدا د پیش ازو آمد و او اونا ره ^{۱۴}

شفا دد. ^{۱۵} مگم وختی پیشوایون عالی مقام و عالمای دین

چیزای عجیب ره که عیسیٰ انجام دد، دید و شنید که

بچکیچای ریزه د خانه خدا چیغ زده مُوگیه: ”هوشیاعنا د باچه

داود،“ اونا قار شد ^{۱۶} و دزو گفت: ”آیا میشنوی که آمیا

چیزخیل مُوگیه؟“ عیسیٰ د جوابِ ازوا گفت: ”آرے، میشنویم!

آیا شُمو هرگز نخاندید که،

”آی خداوند، از دانِ نِلغه گو و شیرخورا

حمد-و-ثنا ره بَلَدِه خُو جاری کدی؟ ”

اوخته عیسیٰ اونا ره ايله کد و از شار بُر شُده دَبَيت عنیا
رفت و شاو ره دَأونجی تیر کد.

عیسیٰ درختِ انجیر ره لعنت مُوکنه

صَبَاحَگاه وختیکه پس سُون شار میمَد، او گُشنه شد.

اوخته او دَبَغل راه يگ درختِ انجیر ره دید و نزدیک شی
رفت، مگم بعیر از بلگ دَزو هیچ چیز پیدا نکد. اوخته دَ
درخت گفت: ”بعد ازی دیگه هرگز دَز تُو میوه بُر نشنه.“ و
امو درختِ انجیر فوری خشک شد.

وختی يارا ای کار ره دید، حیر و شُده گفت: ”چطور ای
درختِ انجیر ایقس زُود خشک شد؟“ ^{۲۱} عیسیٰ دَ جوابِ ازوا
گفت: ”ما حقِیقت ره دَز شُمو مُوگم، اگه ایمان میداشتید و
شك نمودید، نه فقط امی کار ره که قد درختِ انجیر شد
انجام دده میتنستید، بلکه اگه دَ امزی کوه ام مُوگفتید که
کنده شو و دَ دریا پورته شو، امو رقم مُوشد.^{۲۲} هر چیزی ره
که قد ایمان دَ دُعای خو طلب کنید، دَ دست میرید.“

سوال د باره اختیار عیسی

عیسی^{۲۳} د خانه خدا داخل شد و د حالیکه تعلیم میداد، پیشوایون عالی مقام و ریش سفیدای قوم د پیش ازو آمده گفت: "تو قد کدم اختیار ای کارا ره مونی و کی ای اختیار ره دز تو دده؟"^{۲۴} عیسی د جواب ازوا گفت: "ما ام از شمو یگ سوال پرسان مونم. اگه شمو جواب مره بدید، ما ام دز شمو موگم که قد کدم اختیار ای کارا ره انجام میدم:^{۲۵} غسل تعمید یحیی از کجا بود؟ از عالم باله یا از انسان؟" اونا قد یگدیگه خو مشوره کده گفت: "اگه بگی که از عالم باله بود، اوخته او موگیه، پس چرا دزو ایمان نوردید؟"^{۲۶} و اگه بگی که از انسان بود، از مردم میترسی که موره نگشه، چون پگ یحیی ره پیغمبر میدنه.^{۲۷} پس اونا د جواب عیسی گفت: "مو نمیدنی." او دزوا گفت: "ما ام دز شمو نموگم که قد کدم اختیار ای کارا ره انجام میدیم.

مثل دو باچه

دزی باره شمو چی فکر مونید؟ یگ آدم دو باچه دشت. او د پیش آولنه رفت و دزو گفت: باچه مه، امروز د باغ انگور

بورو و د اونجى کار کو.^{۲۹} او د جواب شى گفت: 'ما

نمورم،^{۳۰} مگم پسانتر پشيمو شد و رفت. بعد ازو آته د پيش باچه دومى رفت و دزو ام امو رقم گفت. او د جواب شى گفت: 'مورم صاحب.^{۳۱} ولئے نرفت. کدم امزو دو نفر خاهش آته خو ره د جای آورد؟ "أونا گفت: "آولنه." عيسى دزوا گفت: "ما حقیقت ره دز شمو موگم، ماليهگира و فايشه ها از شمو کده پيشتر د پادشاهي خدا داخل موشه،^{۳۲} چراكه يحيى آمد تا راه عدالت ره دز شمو نشو بدие و شمو د توره ازو باور نکدید، مگم ماليهگира و فايشه ها د توره ازو باور کد. و حتى بعد از ديدون امزى ام شمو پشيمو شدید و د توره ازو باور نکدید."

مَثَلٌ بِاغْوَانَى ظَالِمٍ

"يگ مَثَلٌ دِيگَه ره گوش كُنيد: يگ صاحب زمى يگ باغ انگور جور کد و د گرداگرد شى ديوال باله کد، يگ چرخشت د مَنِه شى جور کد و يگ بُرج پيرهدارى ام بَلِدِه شى آباد کد. اوخته او ره د باغوانا اجاره دد و خود شى د سَفَر رفت.

وختيکه فصل ميوه نزديك شد، او غلاماي خو ره د پيش باغوانا رىي کد تا اونا حق ميوه شى ره بِگيره؛^{۳۴} مگم باغوانا

غُلامای اُزو ره گِرفته يَكْون شی ره لَت-و-کوب کد، يَكْون شی
ره کُشت و يَكْون شی ره سنگسار کد. ^{۳۶} او بسم غُلامای

دِیگه ره رَبی کد که کلوتَر از دفعه اول بُود. و باغوانا قد ازوا

ام امُو رقم رفتار کد. ^{۳۷} آخرِکار، او باچه خُو ره دَپیشِ ازوا

رَبی کده گفت: "أونا دَباچه مه احترام مُونه." ^{۳۸} مگم وختی

باغوانا باچه ره دید، اونا قد يَگدِیگه خُو گفت: "اینمی وارث

استه. بسید که ای ره بُکشی و میراث شی ره بِگیری." ^{۳۹} پس

او ره گِرفته از باعِ انگور بُرو پورته کد و کُشت. ^{۴۰} دَامزی

حالت وختیکه صاحِبِ باع بیله، او قد باغوانا چیز کار مُونه؟"

أونا دَجواب شی گفت: "أو امُو آدمای شرِیر ره عذاب-کُش

مُونه و باعِ انگور ره تسلیم دِیگه باغوانا مُونه که میوه شی ره

دَفصل شی دَزو بِدیه."

اوخته عیسیٰ دَزوا گفت: "آیا شُمو هرگز دَکتاب مُقدَّس

نَخاندید که:

سنگی ره که أستاکارا رد کد، سنگِ مُهمِ تادو شُده؟

ای کار ره خداوند کده

و د نظرِ ازمو عجیب آسته.

”امزی خاطر دَز شُمو مُوگُم که پادشاهی خُدا از شُمو گِرفته
مُوشه و دَ قومی دَدہ مُوشه که ثمر شی ره بیره.^{۴۳} هر کسی
که دَ بَلِه امزُرو سنگ بُفتہ تِکه-و-پرچه مُوشه و اگه امُو سنگ
دَ بَلِه کُدم کس بُفتہ او ره جَو جَو مُونه.“^{۴۴}

وختی پیشوایون عالی مقام و فریسیا مَثَل های شی ره
شِنید، اونا پَی بُرد که او دَ باره ازوا توره مُوگیه.^{۴۵} اوخته اونا
قصد کد که او ره دِستگیر کُنه، مگم از مردم ترس خورد،
چراکه مردم او ره پیغمبر میدَنست.

مَثَل توی

۲۲ ^۱ عیسیٰ بسم دَ مَثَل قد ازوا گپ زَده گفت: ^۲ ”پادشاهی
آسمو رقمِ یگ پادشاه آسته که بَلِدِه باچه خُو توی گِرفت.^۳ او
غلامای خُو ره رَیی کد تا کسای ره که دَ توی دعَوت شُدد
کُوی کُنه، لیکِن اونا نَخاست که بییه.^۴ او بسم غلامای دِیگه
ره رَیی کد و دَزوا گفت: دَ کسای که دعَوت شُده بُکِید:
”اینه، ما نان خُو ره تیار کدیم، گاو ها و گوسله های چاغی

مه حلال شده و تمام چیز آماده استه؛ دَ توى بېید. ”^۵ مگم

أونا خیال خو ره ام نورد و هر کس د راه خو رفت، يگ شى د
بئله زمینای خو، دېگە شى د کاروبار خو^۶ و باقىمندە های
شى غلامای ازو ره گرفته دو-و-دشنام دد و کشت. ^۷ اوخته
پادشاه غدر قار شد و عسکرای خو ره رېي کده امو قاتلا ره
از بین بُرد و شار ازوا ره سوختند. ^۸ اوخته او د غلامای خو
گفت: ” جشن توی آماده استه، مگم کسای که دعوت شد
لایق شى ره ندشت. آلى د کوچه-و-بازار بورید و هر کسی ره
که پیدا کدید دَ توى دعوت کنید. ^۹ پس غلاما د کوچه-و-
بازار رفت و هر کسی ره که پیدا کد چى خوب و چى بد گرفته
اوُرد، د اندازه که توی خانه از مهمونا پُر شد. ^{۱۰} مگم وختى
پادشاه آمد که مهمونا ره بِنگره، يگ آدم ره د اونجى دید که
کالای توی د جان شى نبود. ^{۱۱} پادشاه ازو پُرسان کد: ” رفیق،
بُدون کالای توی چطور د اینجى آمدی؟ ” او بے جواب مَند.
اوخته پادشاه د حاضرباشای خو گفت: ” دست و پای ازو ره
بسته کنید و او ره د تریکى بُرو پورته کنید، د جایى که چخرا
و دندوخيي استه. ^{۱۲} چون کسای که دعوت شده کلو يه، مگم
کسای که انتخاب شده کم استه. ”

سوال د باره مالیات

اوخته فریسیا رفت و جلسه کد که چی رقم عیسیٰ ره قد تورای خود شی د دام پورته کنه.^{۱۶} اونا پیروای خُو ره قد طرفدارای هیرودیس قتی د پیش عیسیٰ زی کد و گفت: "أَسْتَادُ، مَوْمِيدَنِي كَهْ تُو آَدَمْ صَادِقٌ أَسْتَى وَ رَاهِ خُدَا رَهْ دَ رَاسْتَى تَعْلِيمِ مِيدَى وَ دَغَمِ كَسْ نِيَسْتَى كَهْ چَى مُوكِيَه، چُون تُو دَظَاهِرِ إِنْسَانْ تَوْخَ نَمُونَى.^{۱۷} پس دَزْ موْبُكَى كَهْ نَظَرْ تُو دَزِي بَارَهْ چَى أَسْتَه؟ آَيَا مَالِيَهْ دَدَوْ دَقَيْصَرْ رَوا أَسْتَهْ يَا نَه؟"

مَكْمَعِ عِيسَى مَقْصِدِ شَرِيرَانَهْ ازوَا رَهْ فَامِيدَ وَ گَفْتَ: "آَى رِيَاكَارَا، چَرا مَرَهْ آَزمَايِشْ مُونِيدَ؟^{۱۹} سِكِّه رَهْ كَهْ بَلَدِه مَالِيَهْ مِيدِيدَ دَزْ مَهْ نِشَوْ بِدِيدَ." اُونا يِگ سِكِّه يِگ دِينَارِيَ دَزُو آُورَدَ.^{۲۰} اوخته او ازوَا پُرسَانَ کد: "أَمِي عَكْسَ وَ نَشَانَ اَزْ كَيَ أَسْتَه؟"^{۲۱} اُونا دَجَوابَ شَى گَفْتَ: "ازْ قَيْصَرَ." عِيسَى دَزوَا گَفْتَ: "پس چِيزَى رَهْ كَهْ اَزْ قَيْصَرَ أَسْتَهْ دَقَيْصَرِ بِدِيدَ وَ چِيزَى رَهْ كَهْ اَزْ خُدَا أَسْتَهْ دَخُدَا."^{۲۲} وَختى اُونا اَمِي جَوابَ رَه شِنِيدَ، حَيْرَوْ مَنَدَ وَ أُورَهْ اَيْلَهْ کَدَهْ رَفَتَ.

بَحْثٌ دَ بَارِهِ قِيامَتٍ

۲۳ دَ امْزُو روز صَدُوقِيَا وَجُود نَدرَه دَ پِيشِ عِيسَى أَمَد وَ ازْوَ
سوال کده گفت: ۲۴ "أَسْتَاد، مُوسَى گفته که اگه يگ مرد
بے أَوْلَاد بُمْرَه، بِرار شی باید قد خاتُون ازْوَتُوی کُنَه تا بَلَدِه
بِرار خُو أَوْلَاد پَيَدا کُنَه. ۲۵ يگ زمان دَ مِينَكَل از مو هفت بِرار
بُود. اوْلَنِه شی خاتُو گِرفَت و مُرَد و ازِی که أَوْلَاد نَدَشَت،
خاتُون ازْوَ دَ بِرار شی مَنَد. ۲۶ دَوْمَنِه و سِوْمَنِه ام امی رقم کد
تا بِرارِ هَفْتَم. ۲۷ و دَ آخِر امُو خاتُو ام مُرَد. پس دَ روزِ قِيامَتٍ
اوْ خاتُونِ كَدَم امْزُو هفت بِرار مُوشَه، چُون پَگِ ازوا قد ازْوَ
تُوی کده بُود؟ ۲۹ "عِيسَى دَ جوابِ ازوا گفت: "شُمو گُمراه
استَید، چراکه نَه دَ بَارِهِ كِتابِ مُقدَّس مِيدَنِید و نَه دَ بَارِهِ قُدرَتِ
خُدا. ۳۰ چُون دَ روزِ قِيامَت نَه کسی خاتُو مِيگِيرَه و نَه شُوی
مُونَه، بَلَكِه رقمِ ملايِكَه ها دَ عَالَمِ باله أَسْتَه. ۳۱ مِنْکَم دَ بَارِهِ
قيامتِ مُرَدَه ها، آيا نَخانِدَيَد که خُدا دَز شُمو چَی گفتَه؟ اوْ
گفتَه: ۳۲ "ما خُدَای إِبراهِيم، خُدَای إِسْحاق و خُدَای يعقوب
آسْتَم. خُدا، خُدَای مُرَدَه ها نَبِيَّه، بَلَكِه خُدَای زِنَدَه ها أَسْتَه."
وختی جمعیَّتِ مردُم امی جواب ره شِنِید، از تعليِم ازْوَحَيرَو
منَد.

بُزُرگتَرِین حُكْم خُدا

وختی فَرِيسِیا شِنید که عیسیٰ دانِ صَدُوقیا ره بَند کده، اونا ۳۴
یگجای جَم شُد. و یکی ازوا که عالِم شریعت بُود، بَلَدِه ۳۵
آزمایش از عیسیٰ سوال کده گفت: ۳۶ "أُستاد، كُدَم حُكْم ذ
شریعت بُزُرگتَرِین أَسْتَه؟" ۳۷ عیسیٰ ذ جواب شی گفت:
"خُداوند، خُدای خُوره قد تمامِ دل و تمامِ جان و تمامِ عقل خُ
مُحَبَّت کُو. ۳۸ ای اوّلین و بُزُرگتَرِین حُكْم أَسْتَه. و دوّمی ام
رقمِ اوّلی أَسْتَه: همسایه خُوره رقمِ خود خُوالی دوست داشته
بَش. ۳۹ تمامِ تورات و نویشه های آنبيا ذ امزى دُو حُكْم
بَستَگی دَره." ۴۰

مسيح کي أَسْتَه

وختیکه فَرِيسِیا یگجای جم شُدد، عیسیٰ ازوا پُرسان کده ۴۱
گفت: "ذ بارِه مسيح چی فِکر دَرِيد؟ او باچه کي أَسْتَه؟" ۴۲
أونا دَزو گفت: "باچه داُود."
أو دَزوا گفت: "پس چطور داُود ذ هِدایتِ روح الْقُدْس او ره
مولا مُوگیه؟ چون او مُوگیه که ۴۳

٤٤ خُداوند دَ مَولَى مَه گُفت:

”دَ دِستِ راستِ مَه بِشَى“

تا دُشْمَنَى تُو رَه دَ تَى پَاي تُو بِندَزُم.“

٤٥ پس اَكَه دَاؤُود مَسيح رَه مَولا مُوگَيه، چِطُور مِيتَنه كَه باچَه

شَى بَشَه؟“ ٤٦ هَيَّچَ كَس نَتَنِست كَه دَزُو يَگ جَواب بُكَيه و اَم

بعد اَمْرُو روز كَس دِيَگَه جُرَات نَكَد كَه اَزُو سَوال كُنَه.

بَرَمَلا كَدونِ كارَاي غَلَطِ فَريسيَا و عُلَمَاءِ دِينِي

٤٧ ٢٣ اوختَه عيسَى دَ جَمِيعَتِ مرْدُم و يارَاي خُو گُفت:

”عالِمَاءِ دِين و فَريسيَا دَ چَوَكَى مُوسَى شِشَتَه، ٤٨ اَمْزِي خاطِر

هر چِيزِي كَه دَز شُمَو مُوگَيه، دَ جَاي بِيرِيد و نِگَاه كُنَيْد؛ مَكَم

دَ مُطَابِقِ كِردارِ ازوا رَفتَار نَكَنِيَد، چُون چِيزِي رَه كَه اُونَا

مُوگَيه، خودون شَى انجام نَمِيَديَه. ٤٩ اُونَا بارَاي گِرنَگ رَه بَستَه

مُونَه كَه بُرُدون شَى سَخَت آسَته و دَ بَلِه شَانَه مرْدُم مِيلَه، مَكَم

خودون ازوا نَمِيخاَيَه كَه بَلِده حَركَت دَدون ازوا حتَى يَگ كِلَك

خُو رَه اَم شَور بِديَه. ٥٠ تمامِ كارَاي رَه كَه اُونَا انجام مِيدَيَه بَلِده

ازی آسته که مردم اونا ره بِنگره. چون اونا پیشانه بَند خُو ره
دِرازتر جور مُوكنه.^٦ اونا خوش دَرَه که دَمهمانی ها دَ باله-
جای پِشینه و دَ عِبادت خانه ها چوکی های مُهم ره دَشته بشه
و مردم دَ کوچه-و-بازار اونا ره احترام کده سلام بِدیه و أَستاد
کُوي کُنه.

مَگم شُمو نَباید أَستاد کُوي شُنید، چراکه شُمو يگ أَستاد
درِيد و باقی پگ شُمو بِرارو أَستید.^٩ هیچ کس ره دَ روی زمی
آته نَگید، چون شُمو يگ آته درِيد، امُو که دَ آسمو آسته.
امْچنان شُمو نَباید پیشوا کُوي شُنید، چون شُمو يگ پیشوا
درِيد و او مسیح آسته.^{١١} کسی که دَ مینکل شُمو بُزرگترین
آسته او خِدمتگار شُمو بشه.^{١٢} چون هر کسی که خود ره باله
حساب کُنه، خار-و-ذلیل مُوشه و هر کسی که خود ره خار-و-
ذلیل حساب کُنه او سرِبلند مُوشه.

”واي دَ حال شُمو آي عالِمای دِين و فَرِيسِيَاي رِياكار،^{١٣}
چراکه شُمو درِگه پادشاهی آسمو ره دَ روی مردم بسته مُونید،
خودون شُمو داخل نَمُوشید و کسای که میخایه داخل شنه،
أونا ره نَمیلید.^{١٤} [واي دَ حال شُمو آي عالِمای دِين و
فرِيسِيَاي رِياكار، چون شُمو خانه های خاتونوی بیوه ره قورت

مُونید و از رُوی ریاکاری نماز خُو ره دراز مُونید. امزی خاطر سخت‌ترین محاکومیت ره مینگرید.]

۱۵ واى د حال شمو آی عالمای دین و فریسیای ریاکار! چون شمو د دریا و خشکه میگردید تا یگ نفر ره د دین خُو بیرید و غیتیکه او آمد، او ره دو برابر بدتر از خود باچه دوزخی جور مُونید.

۱۶ واى د حال شمو آی راهنما های کور که مُوگید: هر کسی که د خانه خُدا قسم بُخوره پروا نَدره، ولے هر کسی که د طِلای خانه خُدا قسم بُخوره، او باید د قسم خُو وفا کُنه.

۱۷ آی آدمای نادان و کور! کُدم شی بُزرگتر استه: طِلای خانه خُدا که طِلای ره مقدّس جور مُونه؟ ^{۱۸} امچنان شمو مُوگید: هر کسی که د قربانگاه قسم بُخوره پروا نَدره، ولے هر کسی د هدیه که د بَلِه قربانگاه استه قسم بُخوره، او باید د قسم خُو وفا کُنه.

^{۱۹} آی آدمای کور! کُدم شی بُزرگتر استه: هدیه یا قربانگاه که هدیه ره مقدّس جور مُونه؟ پس هر کسی که د قربانگاه قسم بُخوره، د قربانگاه و هر چیزی که د بَلِه شی

^{۲۰} استه قسم خورده؛ و هر کسی که د خانه خُدا قسم بُخوره، د خانه خُدا و د امزو که د مَنِه اُزو ساکن استه قسم خورده؛ ^{۲۱} و

هر کسی که د آسمو قَسْم بُخوره، د تَخْتِ خُدا و د امْزُو که د
بَلِه شی شِشته قَسْم خورده.^{۲۳}

وای د حال شُمو آی عالِمای دین و فَرِيسِیاَی ریاکار، چون
شُمو از نعناع و شِبت و زِیره دَه-یگ مِیدِید، مَكْم چِیزای
مُهِمَّتِر شریعت ره که عدالت و رَحْمَة و صِدَاقَة أَسْتَه، نادِیده
مِيگِيرِید. اینَمِيا ره شُمو باید انجام مِيدِید بُدونِ که دِيگَای
شی ره نادِیده مِيگِرَفتید.^{۲۴} آی راهنُما های کور، شُمو آو خُو
ره از يگ پاشه صاف مُونِيد، ولے اُشتُر ره قُورت مُوكِنِيد.

وای د حال شُمو آی عالِمای دین و فَرِيسِیاَی ریاکار، چون
شُمو بُرونِ پیله و مِشقاَب ره پاک مُونِيد، ولے داخِل ازوا پُر از
حرص و خودخاهی أَسْتَه.^{۲۵} آی فَرِيسِی کور! اوّل داخِل پیله و
مشقاَب ره پاک کُو، اوخته بُرون شی ام پاک مُوشَه.

وای د حال شُمو آی عالِمای دین و فَرِيسِیاَی ریاکار، چون
شُمو رقمِ قبر های سفید شُدِه أَسْتِيد که از بُرو خُوبشی معلوم
مُوشَه، مَكْم داخِل ازوا پُر از استُغونای مُرده ها و دِيگَه نَجِسَى
ها أَسْتَه.^{۲۶} امي رقم شُمو ام د ظاهِر بَلِدِه مردم عادِل معلوم
مُوشِيد، ولے باطِن شُمو پُر از ریاکاری و شرارَت أَسْتَه.

وای د حال شُمو آی عالِمای دین و فریسیای ریاکار، چون
 شُمو قبر های پیغمبرا ره آباد مُونید و قبر های مردمای عادل
 ره نقش-ونگار مُونید ^{۳۰} و مُوگید: اگه مو د زمان با به کلونای
 خو زنده مُوبودی، د ریختندون خون پیغمبرا قد ازوا شریک
 نَمُوشدی. ^{۳۱} د امزی رقم شُمو د ضِدِ خودون خو شاهدی
 میدید که اولادِ کسای استید که پیغمبرا ره د قتل رَسَنده.
^{۳۲} پس بورید و کارِ ناتکمیل با به کلونای خو ره پوره کنید.
^{۳۳} آی مارها و آی اولادای تیرمار! شُمو چطور میتینید که از
 جزای دوزخ دُوتا کُنید؟

امزی خاطر ما پیغمبرا، مردمای دانا و عالِمای دین ره د
 پیش شُمو رَبی مُونم و شُمو بعضی ازوا ره مُوكشید و د
 صلیب میخکوب مُونید و بعضی های شی ره د عِبادت خانه
 های خو قمچی میزندید و شار د شار پُشت ازوا میگردید ^{۳۵} تا
 خون تمام مردمای عادل که د روی زمی ریختنده شده د گردون
 از شُمو شنه؛ از خون هابیل عادل گرفته تا خون زکریا با چه
 بِرخیا که او ره د بین خانه خُدا و قربانگاه کشتید. ^{۳۶} ما
 حقیقت ره دز شُمو مُوگم، تمام امزی چیزا د بله امزی نسل
 میبیه.

“آی اورُشَلِیم، آی اورُشَلِیم که پیغمبرَا ره مُوكْشی و

رُسُولای ره که دَپیش تُو رَبی مُوشه سنگسار مُونی! چندین
دفعه خاستم که بچکیچای تُو ره یگجای جم کُنم، رقمیکه یگ

مُرغ چُوچه های خُو ره زیر بال خُو جم مُونه، مگم تُو نخاستی.

^{۳۹} اينه، خانه شمو بَلِدِه شمو بیرو باقی مُومَنه، ^{۴۰} چُون ما دَز

شمو مُوگیم، ازی بعد دِیگه مره نَمِينَگِرید تا وختیکه بُگید:
“مبارک أسته کسی که دَنام خُداوند مییه.”

خرابی خانه خُدا و بَلا های آخر زمان

۴۱

وختیکه عیسی از خانه خُدا بُر مُوشُد و مورفت،
يارای شی دَپیش ازو آمد تا تَوجُه شی ره سُون ساختمان خانه
خُدا جَلب کُنه. اوخته عیسی دَزوا گفت: “آیا تمام امزی چیزا
ره نَمِينَگِرید؟ ما حقِیقت ره دَز شمو مُوگم که دَاینجی یگ
سنگ ام دَبَله سنگِ دِیگه باقی نَمُومَنه، بَلکِه پگ شی زیر-
و-زیر مُوشه.”

۴۲

وختیکه عیسی دَسِر کوه زَيْتون شِشته بُود، يارای شی
تاشَکی دَپیش ازو آمد و گفت: “دَز مو بُگی که امی واقِعه

چی وخت رُخ مِیدیه و نشانی آمدون ازْتُو و آخر زمان چی
استه؟ ”

عیسیٰ د جواب ازوا گفت: ”هوش خوره بِگیرید که کس
شُمو ره گمراه نَکُنَه. چون غَدر کسا د نام ازمه مییه و مُوگیه
که ‘ما مسیح آستُم،’ و غَدر کسا ره گمراه مُوکُنَه. شُمو د
باره جنگ ها و خبرِ جنگ ها میشنوید؛ بِنگرید که وَرخطا
نَشُنید، چون ای واقعه ها باید رُخ بِدیه، لیکن آخر هنوز
نَرسِیده. چون یگ قوم د ضِدِ قومِ دیگه و یگ مملکت د ضِدِ
مملکتِ دیگه باله مُوشه و قحطی ها و زلزله ها د جای های
مُختلف رُخ مِیدیه. ولے پگ امزیا شروع دَرد زَیدو آسته.

د او زمان شُمو ره تسلیم مُونه تا شِکنجه شُنید و کُشته شُنید
و تمام مِلت ها بخاطر نام ازمه از شُمو بد مُویره. اوخته
غَدر کسا از ایمان خُو میگردد و یگدیگه خُو ره د گیر مِیدیه و
از یگدیگه خُو بد مُویره. ۱۱ و غَدر پیغمبرای دروغی بُر شده
غَدر کسا ره گمراه مُونه. ۱۲ از خاطرِ کلو شُدون گناه مُحبَت
غَدر کسا سرد مُوشه. ۱۳ مگم هر کسی که تا آخر صَبر-و-
حوصله کُنه، نِجات پیدا مُونه. ۱۴ و امی خوشخبری پادشاهی
آسمو د سراسرِ دُنیا اعلان مُوشه تا بَلِدِه تمام مِلت ها یگ

شاھدی بَشَهْ؛ و اوخته آخِر مِيرَسَهْ. ”

۱۵ ”پس وختیکه امُو زِشتِ بیروکار ره که دانیال پیغمبر دَ بارِه
شی گفته، د جایگاه مُقدَّس ایسته مینگرید -- خاننده پَی بُرہ
۱۶ اوخته کسای که د یهودیه آسته باید د کوه ها دوتا کُنه؛
۱۷ و هر کسی که د بَلِه بام خانه آسته، باید بَلِه گِرفتون کُدم
چیز د خانه تاه نَشْنَه؛ ۱۸ و هر کسی که د سِرِ کِشت آسته، باید
بَلِه گِرفتون کالای خُو پس نَرَوَه. ۱۹ واى د حالِ خاتُونوی که د
امُزو روزا شِکامتو بَشَهْ و يا نِلغِه شِيرخور دَشته بَشَهْ! ”

۲۰ ”پس دُعا کُنید که روزِ دُوتای شُمو د زِمستو یا د روزِ آرام
رُخ نَدِيه، ۲۱ چُون د او زمان مُصِيبَتِ غَدر سخت مییه د اندازِه
که از شروعِ دُنیا تا آلی ره نَمَدَه و بعد ازو هرگز نَمَيیه. ۲۲ اگه
او روزا کوتاه نَمُوشَد، هیچ بَشر نِجات پَیدا نَمُوكَد، لیکن
بخاطرِ انتِخاب شُدَه ها امُو روزا کوتاه مُوشَه. ”

۲۳ ”د امُزو زمان اگه کُدم کس دَز شُمو مُوگیه: اینه، مسیح د
اینجی آسته! یا اونه، مسیح د اونجی یه! باور نَکُنید؛
۲۴ چراکه مسیح های دروغی و پیغمبرای دروغی بُر مُوشَه و
معجزه ها و چیزای عجیب انجام میدیه تا اگه إمکان دَشته

بَشَه، حتَى اِنتِخاب شُدَه ها ره گُمراه كُنه.^{٢٥} اينه، ما شُمو ره پييش از پييش خبر كُدم.^{٢٦} پس اگه دَز شُمو مُوگيه، 'ونه، او و ببابو آسته، 'شُمو دَ اونجى نَرَوِيد؛ و اگه مُوگيه، 'ونه، او و پسخانه آسته، 'باور نَكْنِيد.^{٢٧} چون رقمى كه آتِشك از شَرق مييه و تا غَرب روشنى شى معلوم مُوشَه، آمدون «باچه إنسان» ام امُونجى جم مُوشَه.^{٢٨}

فَورِى بعد از رَنْج-و-مُصِيبَتِ امْزُو روزا^{٢٩}

آفتَو تِرِيك مُوشَه

و ما ه روشنى خُو ره نَمِيدِيه؛

سِتاره ها از آسمو تاه موافته

و قُدرت های آسمونا تکان مُوخوره.

اوخته علامت «باچه إنسان» دَ آسمو ظاهر مُوشَه و دَ امزُو^{٣٠} غَيْت تمام طاييفه های دُنيا ماتم مِيگِيره و «باچه إنسان» ره مِينگره كه دَ بَلَه آور های آسمو خُن قُدرت و جلال بُزرگ

مییه. و او ملایکه های خُوره قد آوازِ بلندِ شیپور رَبی مُونه
و اونا انتخاب شده های ازو ره از چار گوشِه دُنیا، از سرتا
آخر آسمو جَم مُوكنَه.

آلی از درختِ انجیر یگ درس یاد بگیرید: امی که شاخه
های شی تازه شده بلگ مُونه، شُمو مُوفا مید که تایستو
نزدیک استه. ^{۳۳} امی رقم شُمو ام وختیکه تمامِ امزی چیزا ره
مینگرید، بُفا مید که او نزدیک استه، بَلکِه دَدان درگه رسیده.
^{۳۴} ما حقیقت ره دَز شُمو مُوگم، تا تمامِ امزی چیزا واقع نشنه،
ای نسل از بین نموره. ^{۳۵} آسمو و زمی از بین موره، ولے کلامِ
ازمه هرگز از بین نموره.

انتظار بَلدِه پس آمدونِ مسیح

دَباره امزُرو روز و ساعت هیچ کس نمیدانه، نه ملایکه های
آسمو و نه ام باچه، بَلکِه فقط آته آسمانی میدانه و بس.

چون امُو رقم که روزای نوح بود، ظهور «باچه انسان» ام
امُو رقم استه. آر، دَ روزای پیش از طوفان تا وختِ داخل
شدونِ نوح دَکشته، مردم مُخورد و وُچی مُوكد، خاتُو

^{۳۹} میگرفت و شُوی مُوكد؛ ^{۴۰} اونا نموفا مید که چی مُوشه تا ای

که طوفان آمد و پگ ازوا ره بُرد. ظهور «باقه إنسان» ام امى رقم مُوشه.^{۴۰} اوخته دُونفر که د سر کِشت بَشه، يگ شی بُرده مُوشه و يگ شی مُومنه.^{۴۱} و دُو خاتُو که دِستاس مُونه، يگ شی بُرده مُوشه و يگ شی مُومنه.

پس بیدار بَشِيد، چون شُمو نَمِيدنِيد که مَولاي شُمو دَكَدم ساعت مييه.^{۴۲} مگم اى ره بِدَنِيد که اگه صاحِب خانه مِيدَنِست که دُز دَكَدم وختِ شاو مييه، او بیدار مِيشِشت و نَمِي ايست که دُز دَخانه شی داَخِل شُنه.^{۴۳} امزى خاطر شُمو ام آماده بَشِيد، چون «باقه إنسان» د ساعتى مييه که شُمو إنتِظار شى ره نَدرِيد.

پس کى أَسته امُو غُلامِ صادق و دانا که بادار شى او ره د سرپَرستى خانه خُو مُقرَر کده تا بَلَدِه دِيگه غُلاما د سر وخت خوراك بِديه؟^{۴۵} نيك د بَختِ امزُو غُلام که وختى بادار شى مييه، او ره سرِ کار مِينگره.^{۴۶} ما حقيقَت ره دَز شُمو مُوگيم، بادار شى او ره سرپَرستِ تمامِ داريَي خُو مُقرَر مُونه.^{۴۷} ليکِن اگه او يگ غُلامِ شرِير بَشه و قد خود خُو بُگيه، بادار مه طال خورده،^{۴۸} و شروع دَلت-و-کوبِ غُلاماى كُنه که همکار شى أَسته و قد شرابخورا مصْرُوفِ خوردو و وُچى كدو شُنه،

بادارِ امزُو غُلام مییه، ولے دَ روزی که او هیچِ انتِظار شی
ره نَدره و دَ ساعتی که او هیچِ خبر نَدره؛^{۵۱} اوخته بادار شی او
ره تِکه کده قد ریاکارا دَ یگ جای پورته مُونه، دَ جایی
که چخرا و دَندو خَیی آسته.

مَثَلِ دَه دُخترِ جوان

۲۵ دَ او زمان پادشاهی آسمو رقمِ دَه دُخترِ خانه مُوبشه
که چراغای خُو ره گِرفته دَمِ راهِ داماد رفت. پَنجِ ازوا نادان
بُود و پَنجِ شی دانا. دُخترونِ نادان چراغای خُو ره گِرفت،
ولے هیچِ روغو قد خُو نَبرد. مَگم دُخترونِ دانا ظرفای پُر از
روغو ام قد چراغای خُو بُرد. وختیکه آمدونِ داماد طال
خورد، تمامِ ازوا ره خاو گِرفت و اونا خاو رفت. دَ نِیمِ شاو
یگ آوازِ بلند شُد که مُوگفت: اینه داماد! دَمِ راهِ شی
بیید. اوخته تمامِ امزُو دُخترونِ خانه باله شُدہ چراغای خُو ره
آماده کد. و دُخترونِ نادان دَ دُخترونِ دانا گُفت: کم وَری
امزو روغون خُو دَز مو ام بِدید، چراکه چراغای مو دَ حالِ گُل
شُدو یه. مَگم دُخترونِ دانا دَ جواب ازوا گُفت: نَموشه،
چون اوقس نِییه که ام مو ره بس کُنه و ام شُمو ره؛ بهتر آسته

که شُمو دَ پیشِ سَوداگرَا بورِید و بَلَدِه خُو بِخِرِید. ^{۱۰} مَگم

وختِیکه اُونا روغُو خِرِيدو رفتُد، داماد رسِید و کسای که تیار بُود قد ازُو قتى دَ توی رفت و درگه بسته شُد. ^{۱۱} بعد ازُو امُو دُخترونِ دِیگه ام آمد و گُفت: 'صاحب، صاحب، درگه ره بَلَدِه مو واز کُو.' ^{۱۲} مَگم او دَ جوابِ ازوا گُفت: 'ما حَقِيقَت ره دَز شُمو مُوگم، ما شُمو ره نَمِينَخشم.' ^{۱۳} پس بیدار بشِید، چراکه شُمو ازُو روز و ساعت خبر نَدرِيد.

مَثَلِ سِه غُلام

آمدونِ امزُو روز رقمِ يگ آدم آسته که قَصْد داشت سَفر کُنه. او غُلامای خُو ره کُوی کد و دارایی خُو ره دَ پیشِ ازوا یشت: ^{۱۴} دَ يگ شی پَنج قَنْطَارَ دَد، دِیگه شی دُو قَنْطَارَ و دَ سِوّمنِه شی يگ قَنْطَار، يعني دَ هر كُدَم ازوا برابر توانایی شی دَد. اوخته سُون سَفر خُو رفت. ^{۱۵} آدمی که پَنج قَنْطَار ره گِرفته بُود، رفته قد ازوا تُجارت کد و پَنج قَنْطَارِ دِیگه فایده کد. ^{۱۶} دَ امزی رقم آدمی که دُو قَنْطَار ره گِرفته بُود، ام دُو قَنْطَارِ دِیگه فایده کد. ^{۱۷} مَگم آدمی که يگ قَنْطَار ره گِرفته بُود، رفته زمی ره کَند و پَیسِه بادار خُو ره دَ اونجی تашه کد.

بعد از یگ مُدَتِ کلو بادارِ امزُو غُلاما پس آمد و قد ازوا

حساب-و-کتاب کد. ^{۲۰} اوخته آدمی که پنج قنطار ره گرفته بود پیش آمد و پنج قنطارِ دیگه ره ام گرفته اورد و گفت:

صاحب، تُو بَلِدِه مه پنج قنطار دَدِی، اینه، پنج قنطارِ دیگه ام فایده کُدم. ^{۲۱} بادار شی دَزُو گفت: آفرین، آی غلامِ خوب و

صادِق! تُو دَ امزی چیزای کم صداقت خُو ره معلوم کدی؛ آلی تُو ره مسئولِ چیزای کلو جور مُونُم. بیه و دَ خوشی بادار خُو

شِریک شُو! ^{۲۲} امو کسی که دُو قنطار گرفته بود، ام پیش آمد و گفت: صاحب، تُو بَلِدِه مه دُو قنطار دَدِی؛ اینه، دُو

قنطارِ دیگه ام فایده کُدم. ^{۲۳} بادار شی دَزُو گفت: آفرین آی غلامِ خوب و صادِق! تُو دَ امزی چیزای کم صداقت خُو ره

معلوم کدی؛ آلی تُو ره مسئولِ چیزای کلو جور مُونُم. بیه و دَ خوشی بادار خُو شِریک شُو! ^{۲۴} اوخته آدمی که یگ قنطار

گرفته بود، ام پیش آمد و گفت: صاحب، ازی که ما تُو ره میشنَختم که تُو یگ آدم سختگیر آستی، از جای که هیچ

کِشت نکدی دِرو مُونی و از جای که هیچ تُخم پاش نَددی حاصل جم مُونی. ^{۲۵} امزی خاطر ما ترس خوردم و رفته امو

یگ قنطار تُو ره دَ زیر زمی تашه کُدم. اینه، پیسِه تُو.

^{۲۶} لیکن بادار شی دَ جوابِ ازو گفت: آی غلامِ شریر و

بیکاره! تُو مُوفا مِیدی از جای که ما کِشت نَکدیم دِرَو مُونُم و
از جای که تُخْم پاش نَدَدیم حاصل جم مُونُم.^{۲۷} امزی خاطر تُو
باید پیسِه مَره دَ صرافا مِیدَدی تا وختِیکه پس آمَده بُودُم،
پیسِه خُو ره قد فایدِه شی قَتَی پس مِیگِرفَتم.^{۲۸} آلی امُو یگ
قَنطار ره ازو بِگِیرِید و دَ کسی بِدِید که دَه قَنطار دَره،^{۲۹} چُون
هر کسی که دَره دَزُو دِیگه ام دَده مُوشَه تا پَرِیمو دَشته بشَه،
مَگ هر کسی که نَدره حتَّی چِیزی ره که دَره ام از شی گِرفته
مُوشَه.^{۳۰} و امی غُلام بَسِ اَرْزِش ره دَ تَرِیکی بُرو پورته کُنید، دَ
جایی که چخرا و دَندو خَیی آستَه.

روزِ قضاوت

وختی «باچه انسان» دَ بُزرگی-و-جلال خُو قد تمامِ ملایکه^{۳۱}
های خُو میبیه، اوخته او دَ تَختِ پُر جلال خُو میشینه.^{۳۲} تمامِ
مِلَّت ها دَ حُضُور ازو جم مُوشَه و او اونا ره از یگدیگه شی
جدا مُونه امُو رقم که یگ چوپو گوسپندو ره از قد بُزا جدا
مُونه.^{۳۳} او گوسپندو ره دَ دِستِ راست و بُزا ره دَ دِستِ چپ
خُو ایستَلْجی مُونه.^{۳۴} اوخته پادشاه دَ کسای که دَ دِستِ
راست شی آستَه مُوگیه: آی کسای که از طرفِ آته مه بَرکت
یافتیید، ببِید و وارِث امزُو پادشاهی شُنید که از شروعِ دُنیا بَلَدِه

شُمو آماده شُده. ^{٣٥} چُون گُشنه بُودُم شُمو مَره نان دَدِيد، تُشنه بُودُم شُمو مَره آو دَدِيد، مُسافِر بُودُم شُمو مَره جای دَدِيد، ^{٣٦} لُچ بُودُم شُمو دَز مَه کالا دَدِيد، ناجور بُودُم شُمو خبرگیر مَه آمدِيد، بَندی بُودُم شُمو دَدِيدون مَه آمدِيد. ^{٣٧} اوخته مردمای عادِل دَ جواب شى مُوكِيَه: 'يا مَولا، مو چى وخت تُو ره گُشنه دَدِيد و بَلدِه تُو نان دَدِيد، يا تُشنه دَدِيد و دَز تُو آو دَدِيد؟ ^{٣٨} مو چى وخت تُو ره مُسافِر دَدِيد و تُو ره جای دَدِيد يا لُچ دَدِيد و تُو ره کالا دَدِيد؟ ^{٣٩} چى غَيْت تُو ره ناجور يا دَدِيد خانه دَدِيد و دَپيش تُو آمدِيد؟ ^{٤٠} اوخته پادشاه دَ جواب بَندی ازوا مُوكِيَه: 'ما حَقِيقَت ره دَز شُمو مُوكِم، هر چیزی که بَلدِه يکی از ریزه‌ترین امزی بِرارون مَه کَدِيد، دَ حَقِيقَت دَز مَه کَدِيد. ^{٤١} بعد ازُو دَكسای که دَدِستِ چَپ شى آسته مُوكِيَه: 'آی لعنتی ها! از مَه دُور شُنِيد و دَ آتِشِ آبَدِي که بَلدِه ایلیس و ملایکه های شى آماده شُده بُفتیید؛ ^{٤٢} چُون ما گُشنه بُودُم دَز مَه نان نَدِيد، تُشنه بُودُم دَز مَه آو نَدِيد، ^{٤٣} مُسافِر بُودُم دَز مَه جای نَدِيد، لُچ بُودُم دَز مَه کالا نَدِيد، ناجور و دَ بَندی خانه بُودُم خبرگیر مَه نَمِيدِيد. ^{٤٤} اوخته اُونا ام دَ جواب شى مُوكِه: 'يا مَولا، مو چى وخت تُو ره گُشنه يا تُشنه يا مُسافِر يا لُچ يا ناجور و يا دَ بَندی خانه دَدِيد و دَز تُو خدمت

نَكْدِي؟^{٤٥} اوختهُ أَوْ دَجَابِ ازوا مُوكِيَه: 'ما حَقِيقَت رَه دَر
شُمُو مُوكِم، هَر چِيزِي كَه بَلَدِي يَكِي از رِيزَه تَرِين امْزِيَا نَكْدِيَد، دَ
حَقِيقَت دَر مَه نَكْدِيَد.^{٤٦} وَأُونَا دَعَذَاب-و-جَزَائِيَّه مُورَه،
مَكْمَ مَرْدُمَي عَادِل دَزِندَگِيَّه أَبَدِي. "

نقشِه قتلِ عیسیٰ

٢٦ وَخَتِيكِه عِيسِيٰ تَامِ امْزِي تُورا رَه گُفْتَه خَلاصَ كَد،
أَوْ دَيَارِيَّه خُو گُفت:^{٤٧} "شُمُو مِيدَنِيَد كَه دُو رُوز بَعْد عِيدِ پَصَح
أَسْتَه و «بَاجِه إِنسَان» تَسْلِيم دَدَه مُوشَه تَا دَ صَلِيب مِيَخَكُوب
شُنَه.".

٤٨ دَ امْزُو وَخت پِيشوايُونِ عالِيَّه مَقام و رِيش سَفِيدَيِّيَّه قَوم دَ خَانِه
پِيشوايِّي بُزُرَگ كَه قَيَافَا نَام دَشت جَم شُد^{٤٩} و جَلسَه كَد كَه
عِيسِيٰ رَه تَاشَكِي گِرْفَتَار كُنَه و دَ قَتْل بِرَسَنَه.^{٥٠} مَكْمَ أُونَا
گُفت: "إِي كَار دَ رُوزَي عِيد نَشَنَه، چُونِ إِمْكَان دَرَه كَه دَ
بَيْنِ مَرْدُم شُورِش بُفْتَه."

مَسَحْ شُدُونِ عِيسَىٰ دَ بَيْتِ عَنِيَا

وَخَتِيكَهُ عِيسَىٰ دَ بَيْتِ عَنِيَا دَ خَانِهِ شِمْعُونِ كُولِي گِرْفَتَهُ بُودَ،^٦
يَگَ خَاتُوْ قَدْ يَگَ بُوتَلَ عَطَرِ قِيمَتَبَارِيْ دَ پِيشِ شَىْ أَمَدَ وَ^٧
غَيْتِيكَهُ عِيسَىٰ دَ سِرِ دِسْتَرَخُو شِشَتَ، اَمُو خَاتُوْ عَطَرَ رَه دَ سِرَ
شَىْ شِيوْ كَدَ. لِيَكِنَ وَخَتِيْ يَارَايِ شَىْ اَيِ كَارَ رَه دِيدَ، قَارَ
شُدَه گُفتَ: ”چَرا اَيِ عَطَرَ ضَاعَ شُدَ؟ چُونَ مُوشَدَ كَه اَمِيَ^٩
عَطَرَ دَ قِيمَتِ كَلو سَوَدا شُنَه وَ پِيسِيهِ شَىْ دَ غَريَباً دَدَه شُنَه!“^{١٠}
عِيسَىٰ اَيِ تُورَه رَه پَىْ بُرْدَه دَزَوا گُفتَ: ”چَرا اَيِ خَاتُوْ رَه
آزارِ مِيدِيدَ؟ اوْ يَگَ كَارِ نِيكَ دَ حَقِ اَزمَه كَدَه،^{١١} چُونَ غَريَباً
هَمِيشَه قَدْ شُمَوَ أَسْتَه، وَلَىَّ ما هَمِيشَه قَدْ شُمَوَ نِيَسْتَمُ.^{١٢} وَ اَيِ
خَاتُوْ دَ وَسِيلَه شِيوْ كَدوْنِ اَمْزِي عَطَرَ دَ بَلِهِ جِسمَ مَه، مَره بَلِده
دَفَنَ كَدوْ اَمَادَه كَدَ.^{١٣} ما حَقِيقَتَه دَزْ شُمَوَ مُوكَمَ، دَ هَرَ جَايِ
دُنيَا كَه اَيِ خَوشَبَرِيِ إعلانَ شُنَه، كَارِ اَمْزِي خَاتُوْ اَمَدَ عِنْوانِ
يادآورِي اُزوْ نَقلَ مُوشَه.^{١٤}

خِيَانَتِ يَهُودَىِ اِسْخَريَوطَىِ

اوْختَه يَكِي اَمْزُو دَوازَدَه يَارَا كَه يَهُودَىِ اِسْخَريَوطَىِ نَامَ^{١٥}
دَشَتَ، دَ دِيرِ پِيشَوايَونِ عَالَىِ مَقامَ رَفَتَ وَ گُفتَ: ”اَكَهَ“

عیسیٰ ره د شُمو تسلیم کنم دَز مه چند مِیدِید؟ ” اونا سی
سِکِه نُقره دُزو دد. ^{۱۶} بعد امزُو وخت یهودا د دُمبالِ فرصت
میگشت تا عیسیٰ ره دزوا تسلیم کنه.

آخری شام عیسیٰ قد یارای شی

^{۱۷} د روز اول عیدِ فطیر یارا د پیشِ عیسیٰ آمده گفت: ” د کجا
میخاهی بله تُو آمادگی بگیری تا نانِ پصَح ره د اونجی
^{۱۸} بُخوری؟ ” عیسیٰ د جوابِ ازوا گفت: ” د شار د پیشِ فلانه
نفر بورید و دُزو بُگید: أستاد مُوگیه، وخت مه نزدیک شده؛
ما نانِ پصَح ره قد یارای خُو د خانه از تو مُخورم. ^{۱۹} یارا امُو
رقم کد که عیسیٰ دزوا هدایت دده بُود و نانِ پصَح ره تیار کد.

^{۲۰} وختیکه شام شد عیسیٰ قد دوازده یار خُو د سرِ دسترخو
شِشت. ^{۲۱} د حالیکه اونا درو نان مُخورد، عیسیٰ گفت: ” ما
حقِیقت ره دز شُمو مُوگم، یکی از شُمو مره تسلیم مُونه.
^{۲۲} اونا غدر کوٹیوبار شد و یگ بعد از دیگه ازو پُرسان کد:
” یا مَولا، ما خُو نِیستم، یا آسْتم؟ ” ^{۲۳} او د جوابِ ازوا گفت:
” کسی که دست خُوره قد ازمه قتی د کاسه غوٹه مُونه، امُو
کس مره تسلیم مُوکنه. ” «باجهِ انسان» امُو رقم که د باره ^{۲۴}

شی نوشته شده از دُنیا موره. مگم وای دحال کسی که «باقه انسان» د وسیله ازو تسلیم مُوشه! بَلِدِه ازو نفر بهتر بود که هیچ زیده نمُوشد.^{۲۵} اوخته یهودا که او ره تسلیم کَدَنی بود، د جواب شی گفت: «أُستاد، ما خُونِيَّتُم، يا أَسْتُم؟» عیسی ا د جواب ازو گفت: «خود تُو گفتی.

^{۲۶} د حالیکه اونا دَرَو نان مُوحورد، عیسی نان ره گرفت و بعد از شکرگزاری او ره ٹوٹه کده دیارا دد و گفت: «بِگِيرِيد و بُخورِيد، ای جسم مه آسته.^{۲۷} بعد ازو جام ره گرفت و شکرگزاری کده دزوا دد و گفت: «پگ شُمو ازی وُچی کنید؛^{۲۸} چون ای خون مه آسته که بَلِدِه عهِد نَوَ د راه بخشش گناهای غدر مردم ریختنده مُوشه.^{۲۹} ما دَز شُمو مُوگم که بعد ازی امزي میوه تاگ انگور دیگه وُچی نمُونم تا روزی که او ره قد شُمو د پادشاهی آته خُون از نو وُچی کنم.^{۳۰} و اونا سرود خانده سُون کوه زیتون ریی شد.

پیشگویی د باره انکار پترس

^{۳۱} اوخته عیسی دزوا گفت: «إِمْشاوْ پگ شُمو بخاطر ازمه فراری مُوشید، چون نوشته شده:

و گوسپندوی رمه تیتپَرَک مُوشه.

^{۳۲} مگم بعد ازی که دُوباره زِنده شُدم، از شُمو کده پیش د جلیلیه موْرم. ^{۳۳} پِترس دَ جواب شی گفت: "حتی اگه پگ بخاطر ازْتو فراری شنه، ما هرگز دُوتا نَمُونم." ^{۳۴} عیسیٰ دَزُو گفت: "ما حقيقة ره دَزْ تو مُوكُم، امی امشاو پیش از بنگ خروس سه دفعه مره انکار نَمُونی." ^{۳۵} پِترس دَزُو گفت: "حتی اگه لازِم شنه، ما قدْ تو مُومرم، ولے تو ره هرگز انکار نَمُونم." و دیگه یارا ام امی رقم گفت.

دعای عیسیٰ د باعِ گتسیمانی

^{۳۶} اوخته عیسیٰ قد یارای خُو د یگ جای د نام گتسیمانی رفت و دَزوا گفت: "د امینجی بِشینید تا ما رفته د اونجی دعا کُنم." ^{۳۷} او پِترس و دُوباقه زِبدي ره قد خُوقتی بُرد و غَدر غَمگی و کوٹیبار شُد. ^{۳۸} اوخته دَزوا گفت: "جان مه از شِدَّتِ غَم نزدِیک آسته که بُمره. شُمو د امینجی بُمنید و قد ازمه بیدار بشِید."

بعد اُزو کم وَری پیش رفت و قد رُوی خُو دَ زمی اُفتَد و دُعا
کده گفت: "آی آتِه مه، اگه إمکان دَرَه ای جام ره از مه دُور
کُو، مَگم نَه دَ خاستِ ازمه بَلکِه دَ خاست-و-إرادِه خود خُو."^{۴۰}

اوخته دَ پیشِ یارای خُو آمد و دید که اُونا خاو رفته؛ پس دَ
پِترُس گفت: "آیا نَمیتِنستِید که یگ ساعت قد ازمه بیدار
بُمنیید؟^{۴۱} بیدار بشِید و دُعا کُنید تا د آزمایش قرار نَگیرید؛
روح واقعاً میخایه، ولے جِسم ضعیف استه."^{۴۲}

او دفعه دوم رفت و دُعا کده گفت: "آی آتِه مه، اگه إمکان
نَدره که ای جام بِدونِ وُچی کدو از مه دُور شُنه، بیل که
خاست-و-إرادِه ازْتُو انجام شُنه."^{۴۳} وختی عیسیٰ پس آمد بسم
اُونا ره دَ خاو دید، چراکه چیمای ازوا از خاو گِرنگ شُدد.
پس اُونا ره باز ام ایله کده رفت و بَلَدِه دفعه سِوم قد امزُو^{۴۴}
توره دُعا کد. اوخته دَ پیشِ یارا آمدَه دَزوا گفت: "شُمو
هنوز ام خاو آستَید و استراحت مُونید؟ اینه، ساعت شی رسیده
که «باقِه إنسان» دَ دِستِ گناهکارا تسلیم دَدَه شُنه.^{۴۵} باله
شُنید که بوری. اونه، کسی که مرَه تسلیم مُونه میرَسه!"^{۴۶}

گِرِفتار شُدُونِ عیسیٰ

۴۷ دَ حَالِيَّكَه عِيسَى هَنُوز تُورَه مُوْگَفْت، يَهُودَا يَكَى امْزُو دوازده
یارا رسِید و قد ازو قَتَى يَگ ڈَلِ كَتَه کَه سوَّله و شمشير دَشت
۴۸ از طرفِ پیشوایونِ عالی مقام و رِيش سفیدای قَوم آمدَد. و
امُو کسی کَه عِيسَى رَه تسلیم مُوكَد قد ازوا يَگ نشانی ایشته
گَفْتُد: "هَر كَسَى رَه کَه مَاخ كَدُم، اوْنَمُو أَسْتَه؛ اوْ رَه دِستِگِير
کَنِيد." ۴۹ فَوْرِي يَهُودَا دَپِيشِ عِيسَى آمَدَه گَفت: "سلام
أَسْتَاد." و اوْ رَه مَاخ کَد. ۵۰ عِيسَى دَزُو گَفت: "رَفِيق، بَلَدِه
کاری کَه آمَدَے، انجام بَدِی؟" اوخته اونا پیش آمد و دَبَلَه
عِيسَى دِست آندخته اوْ رَه دِستِگِير کَد.

۵۱ دَ امْزُو وخت يَكَى امْزُو کسای کَه قد عِيسَى بُود، دِست دَ
شمشير خُو بُرده اوْ رَه کَشِید و غُلامِ پیشوای بُزرگ رَه زَدَه
گَوش ازو رَه مُنْثَى کَد. ۵۲ اوخته عِيسَى دَزُو گَفت: "شمشير
خُو رَه دَ جَاي شَى بَيل، چُون هَر كَسَى کَه شمشير بَكَشَه قد
شمشير کُشته مُوشَه. ۵۳ آيا فِكَر مُونَى کَه ما نَمِيتَنُم از آتِه خُو
درخاست کُنم کَه کَلوَتَر از دوازده لشکرِ ملايِكَه رَه يَگْدَفعَهِي
بَلَدِه کوْمَك مَه رَيَّى کُنه؟ ۵۴ مَكَم دَ اوْ صُورَت نوِشته هَاي کَه
مُوْگَيه 'امَى چِيزا بَايد رُخ بَدِيه' چِطُور پُوره شُنه؟"

^{۵۵} دَ امْرُو سَاعَتِ عِيسَىٰ دَ امْوَ جَمِيعَتِ گُفت: "آيَا مَا رَاهَنَ

أَسْتُمْ كَهْ قَدْ شَمْشِيرْ وَ سَوْطَهْ بَلَدِهْ دِسْتِكِيرْ كَدوْنْ مَهْ أَمْدِيدْ؟ مَا
هَرْ رَوْزْ دَ خَانِهْ خُدا شِشْتَهْ تَعْلِيمِ مِيَدَدُمْ وَ شُمُوْ مَرَهْ گِرْفَتَارِ
^{۵۶} نَكَدِيدْ، مَكْمَ تَامِ امْزِي وَاقِعَهْ هَا رُخْ دَدْ تَا نُوشَتَهْ هَايِ آنَبِيا
پُورَهْ شُنَهْ." دَ امْرُو وَخَتْ تَامِ يَارَا أُو رَهْ اِيلَهْ كَدَهْ دُوتَا كَدْ.

محاكِمَهْ دَ حُضُورِ شُورَايِ يَهُود

^{۵۷} كَسَائِي كَهْ عِيسَىٰ رَهْ دِسْتِكِيرْ كَدْ، أُو رَهْ دَ پِيشِ قَيَا فَا

پِيشَوَايِ بُزُرَگْ بُرْدْ دَ جَايِي كَهْ عَالِمَايِ دِينِ وَ رِيشِ سَفِيدَا جَمِ
^{۵۸} بُودْ. مَكْمَ پِتْرُسِ ازْ دُورِ أُو رَهْ دُمْبَالِ مُوكَدْ تَاكَهْ دَ خَانِهْ
پِيشَوَايِ بُزُرَگْ رَسِيدِ وَ دَاخِلِ شُدَهْ قَدْ پَيَرَهَ دَارَا شِشَتْ تَا بِنَگَرَهْ
كَهْ آخِرِ كَارِ چَيِ مُوشَهْ.

^{۵۹} پِيشَوَايُونِ عَالِيِ مقَامِ وَ تَامِ أَعْضَاءِي شُورَا دَ تَلاشِ ازِي بُودْ
كَهْ يَيَگْ شَاهِدِي درَوغِ دَ ضِيدِ عِيسَىٰ پَيَدا كُنَهْ تَا أُو رَهْ دَ قَتْلِ
بِرَسَنَهْ. مَكْمَ أُونَا هَيَچْ شَاهِدِي پَيَدا نَتَنِسَتْ، باَوْجُودِ كَهْ غَدَرِ
شَاهِدَايِ درَوغِي پِيشِ أَمَدَهِ شَاهِدِي دَدْ. بِلَآخِرَهْ دُو نَفَرِ پِيشِ
أَمَدَهِ ^{۶۱} گُفت: "إِي نَفَرْ گُفْتَهْ كَهْ مَا مِيتَنُمْ خَانِهْ خُدا رَهْ بِيرَوِ
كَدَهْ دَ مُدَّتِ سِهِ رَوْزْ دُوبَارَهْ آبَادَ كُنَمْ." ^{۶۲} أَوْختَهِ پِيشَوَايِ

بُزْرگ باله شُد و دَ عیسیٰ گفت: "آیا تُو هیچ جواب نمیدی؟" ای چیزخیل آسته که آمیا دَ ضد تُو شاهدی میدیه؟" ^{٦٣} مگم عیسیٰ چُپ مند. اوخته پیشوای بُزْرگ دُزو گفت: "تُوره د خُدای زِنده قَسم مِیدُم دَز مو بُکگی که تُو مسیح باچه خُدا آستی یا نَه؟" ^{٦٤} عیسیٰ دُزو گفت: "خود تُو گفتی. بعد ازی شمو «باچه انسان» ره مینگرید که دَ دِستِ راستِ قادرِ مُطلق شِشته و دَ بَلِه آورهای آسمو مییه.

اوخته پیشوای بُزْرگ کالای خُوره پاره کده گفت: "او کُفر گفت! دِیگه مو دَ شاهد چی ضرورت دَری؟ شُمو امی آلی کُفرگویی ازُوره شِنیدید. ^{٦٥} صلاح شُمو چی آسته؟" اونا د جوابِ ازُو گفت: "او سزاوارِ مرگ آسته.

اوخته اونا د رُوی شی تُف آندخته او ره قد مُشت زَد و بعضی کسا قد چپات د رُوی شی زَد ^{٦٧} مُوگفت: "آی مسیح، بَلِدِه مو نَبُوت کُو، کِی تُوره زَد؟"

إنكارِ پترس دَ بارِه عیسیٰ

دَ امزُو وخت پترس دَ بُرو دَ حَولی شِشته بُود که بِبلغه يگ ^{٦٩}

کنیز د پیش ازو آمده گفت: "تو ام قد عیسای جلیلی بودی."

۷۰ مگم پترس د پیش روى پگ ازوا إنكار کده گفت: "ما هیچ نموفامم که تۇ چىزخیل مۇگى." ۷۱ وختىكە پترس بۇ شدە دالىز درگە رفت؛ د اونجى يىگ کنیز دىگە او ره هوش کد و دکسای که د اونجى بۇد گفت: "إِي آدم ام قد عیسای ناصرى بۇد." ۷۲ پترس بسم إنكار کده قسم خورد و گفت: "ما امى آدم ره نمیناخشم." ۷۳ بعد از چند لحظه کسای که د اونجى ايسته بۇد پیش آمد و د پترس گفت: "يَقِينًا تُو ام يكى امزوا استى، چون از لهجه تۇ فامىدە مۇشه." ۷۴ اوخته پترس د لعنت کدو و قسم خوردو شروع کد و گفت: "ما امى آدم ره نمیناخشم." د امزۇ لحظه خروس بىنگ دد.

۷۵ و پترس تورە عیسى ره د ياد خۇ اوئرد کە گفتىد: "پیش از بىنگ خروس سې دفعە مەرە إنكار مۇنى." اوخته او بۇ رفته زار زار چخرا کد.

محکوم شۇدون عیسى د مەرك

۷۶ ۱ وختىكە صبح شد، تمام پیشوایون عالى مقام و ريش

سفیدای قوم د باره عیسی جلسه کد و تصمیم گرفت که او ره بُکشە.^۲ بعد ازو عیسی ره بسته کده بُرد د پیلاتس، والى رُومی تسلیم کد.

یهودا که عیسی ره تسلیم کدد، وختی دید که او محکوم شد، او پشیمو شده امُوسی سِکه نقره ره د پیشوایون عالی مقام و ریش سفیدا پس دد^۳ و گفت "ما گناه کدیم، چراکه آدم بیگناه ره تسلیم کدیم." ولے اونا گفت: "دز مو چی غرض، تُو مُوفامی و کارتُو."^۴ پس یهودا امُونقره ره د خانه خدا پورته کده رَبی شُد و رفته خود ره د دار آوزو کد.

مگم پیشوایون عالی مقام نقره ره باله کده گفت: "پورته کدون امزی نقره د خزانه خانه خدا جایز نیسته، چراکه ای خونبها آسته."^۵ بعد از مشوره کدو، اونا قد امزُو پیسه زمین کوزه گر ره خربید تا بَلَدِه بیگنه گو قبرستو بشه.^۶ د امزی دلیل امُوزمی تا امروز د نام «زمین خون» مشهور آسته.^۷ د امزی رقم توره که د وسیله ارمیا پیغمبر گفته شُدد پوره شد که مُوگیه:

"اونا سی سِکه نقره ره گرفت،

قِيمَتِ کسی ره که قِيمَت شی دَ و سِيله بَنی اِسرائیل دَ

سِر اُزو ایشته شُدد؛

و اُونا امُو نُقره ره بَلدِه زمِين کُوزه گَر دَد،^{١٠}

امُو رقم که خُداوند دَز مه اَمر کُدد. ”

عيسیٰ دَ حُضُور پیلاتس

اوخته عيسیٰ دَ حُضُور والي رُومى ايسته شُد و والي اُزو

پُرسان کد: ”آيا تُو پادشاه يهوديا أَسْتَى؟“ عيسیٰ گفت:

”خود تُو مُوگی.“^{١٢} مَكْمَ وختیکه پیشوایون عالی مقام و

ریش سفیدا دَبِله اُزو تُهمَت کد، او هیچ جواب نَدَد.^{١٣} اوخته

پیلاتس دَزُو گفت: ”آيا تُو نَمِيشنَوی که اُونا چِيقس شاهِدی ها

دَ ضد تُو مِيدیه؟“^{١٤} لیکِن عيسیٰ حتی دِیگ توره اُزو ام

جواب نَدَد، بطوری که والي دَزی باره غَدر حَير و مَند.

رسم-و-رَواج والي ای بُود که دَ هر عِيد، یگ بَندی ره بَلدِه^{١٥}

مردُم ايله کُنه، هر کسی ره که اُونا میخاست.^{١٦} دَ امْزو غَيت

یگ بَندی نامی دَ نام باراباس دَ بَندی خانه بُود.^{١٧} وختیکه

مردُم جَم شُد، پِيلاتُس ازوا پُرسان کده گفت: "شُمو کُدم شی ره میخاهید که بَلِدِه شُمو ایله کُنم؟ باراباس ره یا عیسیٰ مشهور دَ مسیح ره؟"^{۱۸} چون او پَی بُرد که اُونا عیسیٰ ره از رُوی همچشمی تسلیم کده.

^{۱۹} دَ حالیکه پِيلاتُس دَ چوکی قضاوت شِشتُد، خاتُون شی دَزو پیغام رَیی کده گفت: "قد امزُو آدم بیگناه کار نَدَشته بش، چون امروز از خاطرِ اُزو دَ خاو غَدر عذاب شُدم."

^{۲۰} دَ عَین حال پیشوایون عالی مقام و ریش سفیدا مردُم ره تشویق کد تا اُونا درخاست کُنه که باراباس ایله شُنه و عیسیٰ کشته شُنه.^{۲۱} پس والی ازوا پُرسان کد: "کُدم امزی دُونفر ره شُمو میخاهید که بَلِدِه شُمو ایله کُنم؟" اُونا گفت: "باراباس ره."^{۲۲} پِيلاتُس دَزو گفت: "پس قد عیسیٰ مشهور دَ مسیح چیز کار کُنم؟" پَگ ازوا گفت: "دَ صلیب میخکوب کُو!" اوخته والی گفت: "چرا؟ چی بدی کده؟" اُونا کلوتر چیغ زَده گفت: "دَ صلیب میخکوب کُو!"

^{۲۳} وختی پِيلاتُس دید که کوشش شی هیچ فایده نَدره، بَلکه شورش شروع مُوشه، او آو طلب کد و دَ پیشِ رُوی مردُم دست

خو ره شُشته گفت: "ما د باره خون امزی آدم، بے گناه أستم!
شُمو مُوفا مید و کار شُمو!"^{۲۵} تمام مردم د جواب شی گفت:
"خون ازو د گردون ازمو و أولادای مو بشه!"^{۲۶} پس باراباس
ره بَلِدِه ازوا ايله کد و عيسی ره بعد از قمچی زدو د عسکرا
تسلیم کد تا د صلیب میخکوب شنه.

عسکرا قد عیسی ریشخندی مُوکنه

اوخته عسکرای والی عیسی ره د حولی قصر والی بُرد و
تمام عسکرای يگ قِشله د گِرد شی جم شُد.^{۲۷} اونا عیسی ره
لُچ کده يگ چَپَنْ آرغوانی د جان شی دد^{۲۸} و از خمچه خاردار
يگ تاج بافته د سر شی ايشت و يگ نَی ره د دِستِ راست
شی دده د پیشِ روی ازو زانو زَد و ریشخندی کده گفت:
"درود د پادشاه يهوديا!"^{۲۹} اونا د بَلِه ازو تُف کد و يگ نَی
ره گِرفته د سر شی د زَدو شُد.^{۳۰} بعد اзи که او ره ریشخند
کد، اونا چَپَنْ ره از جان شی بُرد و كالاي خود شی ره د
جان شی دد و او ره بُرد تا د صلیب میخکوب شنه.^{۳۱} وختیکه
أونا بُرو مورفت قد يگ آدم قیروانی د نام شمعون روی د روی
شُد و او ره مجبور کد که صلیب عیسی ره د شانه خو بُبره.

عیسیٰ دَ صَلِیبَ کُشته مُوشہ

وختی اونا دیگ جای دنام گلگتا که معنای شی «کاسه سر» استه رسید،^{۳۳} اونا شراب انگور ره که قد چیز تلخ گث شد دزو دد؛ مگم وختیکه او ره مزه کد او نخاست که وُچی کنه.^{۳۴} امی که اونا عیسی ره دَ صَلِیبَ میخکوب کد، اونا پشك آندخته کالای شی ره منه خو تقسیم کد^{۳۵} و داونجی بله نگاهوانی ازو ششت.^{۳۶} جرم ازو ره نوشه کده بالهتر از سر شی سخت کد که اینی رقم نوشه شدد: «اینمی عیسی^{۳۷} استه، پادشاه یهودیا!»

دَ امزُو غَيْتُ دُو راهَنَ ام قد ازو دَ صَلِيْبَ میخکوب شد،^{۳۸} یکی ازوا دِستِ راست شی و دیگه شی دِستِ چپ ازو. کسای که ازونجی تیر مُوشد او ره توهین-و-تحقیر کده سر خو ره شور میدد و مُوگفت: «تو که خانه خدا ره خراب مُوكدی و او ره دَ مُدَّتِ سِه روز آباد مُوكدی، خود ره نجات بدلی. اگه تو باچه خدا آستنی از صَلِيْبَ تاه بیه!^{۴۰}» دَ عَيْنِ رقم پیشوایون عالی مقام، عالمای دین و ریش سفیدا ام ریشخندی کده مُوگفت:^{۴۱} «او دیگرو ره نجات دد، مگم خود خو ره نجات دده نمیتنه. او پادشاه اسرائیل استه، امی آلی از صَلِيْبَ

تا بیبیه و مو دَزُو ایمان میری! ^{۴۳} او دَ خُدا تَوْکُل دَرَه، بیل که
خُدا او ره امی آلی نِجات بِدیه، اگه واقعاً از شی راضی
استه، چون او مُوگفت 'ما باچه خُدا آسْتُم!' ^{۴۴} امُو دُو راهَنَ
ام که قد ازو دَ صلیب میخکوب شُدد، او ره دَو-و-دشنام
میبدد.

مرَگِ عیسیٰ

از ساعتِ شَشْم تا ساعتِ نُهم، تریکی تمام زمی ره گرفت. ^{۴۵}
و نزدیکِ ساعتِ نُهم عیسیٰ قد آوازِ بلند چیغ زَده گفت:
"ایلی، ایلی، لَمَا سَبَقْتَنِی؟" یعنی "خُدای مه، خُدای مه،
چرا مرَه ایله کدی؟"

بعضی کسای که دَ اونجی ایسته بُود وختی ای ره شِنید، ^{۴۷}
گفت: "إِلْيَاسَ رَه كُوي مُونه." ^{۴۸} فوری یکی ازوا دَویده یگ
إِسْفَنج ره گرفت و او ره پُر از سِرکِه انگور کده دَ سِریگ نَی
بند کد و دَزُو پیش کد که وُچی کُنه. ^{۴۹} ولے دِیگرو گفت:
"بیل که بِنگری که إِلْيَاس میبیه تا او ره نِجات بِدیه یا نَه!"
عیسیٰ بسم قد آوازِ بلند چیغ زَد و روحِ خُو ره تسليیم کد. ^{۵۰}

دَ امْرُو لحظه پرده خانه خُدا از باله تا زیر دُو پاره شُد؛ زمی
 لَرْزه کد و سنگا شق شُد^{۵۲} و قبر ها واز شُد و غدر جسم های
 مُقدَّسین که مُرده بُود دُوباره زنده شُد.^{۵۳} بعد از دُوباره زنده
 شُدون عیسی، اونا از قبر ها بُرو آمد و دشَارِ مُقدَّس داخل شُد
 و دَغَدر کسا ظاهر شُد.

وختی قومندان و نفرای شی که از عیسی نگاهوانی مُوكد،
 زلزله و امُو واقعه های دیگه ره دید، اونا سخت ترس خورد و
 گفت: "راستی که ای آدم باچه خُدا بُود."

غَدر خاتُونو ام دُونجی بُود که از دور توخ مُوكد؛ اونا از
 جلیلیه از پُشتِ عیسی امدد تا او ره خدمت کنه.^{۵۶} د مینکل
 ازوا مریم مَجَدَلیه و مریم آیه یعقوب و یوسف بُود و امچنان
 آیه باچه های زیدی.

دفن کدون عیسی

دَ وختِ آفتَو شِشتو، يگ آدم دَولتمند که از شَارِ رامه بُود و
 یوسف نام داشت رسید؛ او ام پیر و عیسی شُدد.^{۵۸} اوخته او د
 پیش پیلاتس رفت و جسدِ عیسی ره ازو طلب کد؛ و پیلاتس

أمر کد که دَزُو دَدَه شُنَه.^{٥٩} پس یوسُف جَسَد ره باله کده بُرد و
او ره دَيگ رَختِ كتَانِ پاك پيچنده^{٦٠} دَقَبِرِ نَوَى که بَلَدِه خود
خُو دَقادَه کَنَدَه بُود، ايشت ويگ سنگِ کله ره دَدانِ قبر لول
دَد و رفت.^{٦١} مرِيمِ مَجَدَليه و امُو مرِيمِ دِيگَه ام دَأونجَى پيشِ
رُوي قبر شِشْتَد.

پَيرَدارِي از قبر

صَباحِ امزُو روز که يگ روز بعد از روزِ آمادَگَى عِيد بُود،^{٦٢}
پيشوايونِ عالي مقام و فريسييا دَپيشِ پيلاتس جَم شُده
گفت: "صاحب دَياد موَسته که امُو آدمِ گمراه کَنَنَدَه^{٦٣}
وختيکه زِنَدَه بُود گفت: "بعد از سِه روز دُوباره زِنَدَه مُوشَم."
پس امر کُو که تا سِه روز از قبرِ نگاهوانی شُنَه؛ نَشَنَه که^{٦٤}
ياراي شى دَغَيَتِ شاوَامَدَه او ره دُزِي کُنه و بعد ازِ دَمرَدَم
بُكَيَه که او از مُرَدَهَا دُوباره زِنَدَه شُده و اي گمراهِي آخر از
اول کده بدَتر بشَه." پيلاتس دَزَوا گفت: "پَيرَدارا ره بِكِيرِيد^{٦٥}
و بورِيد و هر رقمِ که مِيتَنِيد از قبرِ مُحافظَت کَنَيد." پس^{٦٦}
أونا قد پَيرَدارا رفت و سنگِ دانِ قبر ره مُهر-و-لاک کد و قبر
ره مُحافظَت کد.

۲۸

^۱ بعد از روزِ آرام، دَ وختِ روز واز شُدو دَ روزِ

یگشمه، مریم مَجَدَلِیه و امُو مریم دِیگه بَلَدِه دیدون قبر رفت

^۲ و دَ اُونجی بے بلغه يگ زلزله شَدید شُد، چون يگ ملايکه

خداوند از آسمو نازل شُده آمد و سنگ ره از دانِ قبر لول دده

^۳ دَ بَلَه شی شِشت. چهره شی رقمِ آتشکِ گُرگُر دراغ بُود و

کالای شی رقمِ بَرف وَری سفید. ^۴ از ترسِ ازو پیردارا دَ لَرْزه

آمد و رقمِ مُرده جور شُد. ^۵ مگم ملايکه دَ خاتُونو گفت: "شُمو

ترس نَخورِيد، چون ما مِیدَنُم که شُمو عیسیٰ ره مُوباَلِيد،

کسی ره که دَ صَلَیب میخکوب شُد. ^۶ او دَ اینجی نیسته. او

دُوباره زِنده شُده، امُو رقم که او گفتُد. بِیید، جایی ره که او

^۷ خاو بُود، توخ کُنید و زُود رفته دَ یارای شی بُکِید که او از

مُرده ها دُوباره زِنده شُده و از شُمو کده پیش دَ جَلِيلِيه موره و

"شُمو او ره دَ اونجی مِینگِرِيد. اينه، ما دَز شُمو گُفْتم."

^۸ اوخته خاتُونو دَ عَجله قد ترس و خوشی کلو از قبر رَبی شُد

و دَوِیده رفت تا دَ یارای شی خبر بَدیه. بے بلغه عیسیٰ قد

ازوا رُوى دَ رُوى شُد و گفت: "سلام." و خاتُونو پیش آمده دَ

پایای ازو افتَد و او ره سَجده کد. ^۹ اوخته عیسیٰ دَزوا گفت:

”ترس نَخورِید. بُورِید و دَبِرارون مه بُكِيد که دَجِلِيلیه بُوره؛
دَأونجی اُونا مَره مِينگره.“

ريشوت دَدو دَپَيره دارا

دَحاليکه خاتُونو مورفت، بعضى از پَيردارا دَشار رفت و
تمام چيزاي ره که رُخ دَده بُود، دَپيشوایون عالي مقام نَقل
کد.^{۱۱} بعد ازى که پيشوایون عالي مقام قد ريش سفیدا جم
شده دَبيَن خُو مشوره کد، اُونا يگ مقدار پيسه بَلدِه پَيردارا
دَد^{۱۲} و گفت: ”شمُو بُكِيد که ياراي شى دَوختِ شاو آمده او
ره دُزى کد دَغَيٰتِيكه مو خاو بُودى.^{۱۳} و اگه اى توره دَ
گوشِ والى رسِيد، مو او ره راضى مُونى و شُمو ره از جنجال
دور نِگاه مُونى.^{۱۴} پس اُونا پيسه ره گِرفت و امُور رقم که
بَلدِه ازوا گفته شُدد، امُور رقم کد. اى قِصّه تا إمروز دَبيَن
يهُوديا گفته مُوشه.^{۱۵}

وظيفه بُزرگ

اوخته يازده يار دَجِلِيلیه دَامْزو کوه رفت که عيسى بَلدِه
ازوا هدايت دَده بُود.^{۱۶} وختِيكه اُونا عيسى ره دید، او ره

پرستیش کد. مگم بعضی های شی شک کد. ^{۱۸} اوخته عیسیٰ پیش آمد و قد ازوا گپ زده گفت: "تمام اختیار-و-قدرت د آسمو و د رُوی زمی دَز مه دَدَه شُدَه. ^{۱۹} پس بورید و تمام مِلت ها ره پَیَرَو جور کده اُونا ره د نام آته و باچه و روح الْقُدُس غسلِ تعمید بِدِید ^{۲۰} و دَزوا تعلييم بِدِید تا از تمام چیزای که دَز شُمو امر کُدم اطاعت کُنه. و بِدَنِید که ما همیشه قد شُمو استم، تا آخر زمان."